

El santo evangelio según San Mateo

Jesucristo rujearoto riojuaju gāna
(Lc 3.23-38)

1 ¹ Abraham ñayoru ito yicōri David ñayoru janerābatia janami ñayiju Jesús. Jesús ñicusabatia wame muare gotigu ya yu. Ado bajiro wame cutiyoyijarā ñina:

² Abraham ñayoru macu ñayiju Isaac. Ito bero Isaac macu ñayiju Jacob. Jacob macu ñayiju Judá. Ito yicōri gājerā ñ ocabaji mesa cūni ñayijarā. ³ Judá rīa ñayijarā Fares ito yicōri Zara wame cutirā. Ñina jaco ñayijo Tamar. Ito bero Fares macu ñayiju Esrom. Esrom macu ñayiju Aram. ⁴ Aram macu ñayiju Aminadab. Aminadab macu ñayiju Naasón. Naasón macu ñayiju Salmón. ⁵ Salmón macu ñayiju Booz. Ñ jaco ñayoyijo Rahab. Ito bero Booz macu ñayiju Obed. Ñ jaco ñayoyijo Rut. Obed macu ñayiju Isaí. ⁶ Isaí macu ñayiju Uju David wame cutigu. David macu ñayiju Salomón. Ñ jaco ñayijo Urías ñayoru manojo godogo.

⁷ Ito bero Salomón macu ñayiju Roboam. Roboam macu ñayiju Abías. ⁸ Abías macu ñayiju Asa. Asa macu ñayiju Josafat. Josafat macu ñayiju Joram. Joram macu ñayiju Uzías. ⁹ Uzías macu ñayiju Jotam. Jotam macu ñayiju Acaz. Acaz macu ñayiju Ezequías. ¹⁰ Ezequías macu ñayiju Manasés. Manasés macu ñayiju Amón. Amón macu ñayiju Josías. ¹¹ Josías macu ñayiju Jeconías. Ito yicōri ñ ocabaji mesa cūni ñayijarā. Ito bajiro ñina baji ñariju Babilonia gāna Israel sita gānare ñina āmi wacōri ñinare moari masa cutiyijarā ñina ya cutoju.

¹² Ito bero mucusana Jeconías macu ñayiju Salatiel. Salatiel macu ñayiju Zorobabel. ¹³ Zorobabel macu ñayiju Abiud. Abiud macu ñayiju Eliaquim. Eliaquim macu ñayiju Azor. ¹⁴ Azor macu ñayiju Sadoc. Sadoc macu ñayiju Aquim. Aquim macu ñayiju Eliud. ¹⁵ Eliud macu ñayiju Eleazar. Eleazar macu ñayiju Matán. Matán macu ñayiju Jacob. ¹⁶ Jacob macu ñayiju José. Ñ ñayiju María manuju. Iso ñayijo Dios ñ cōaru Jesucristo jaco.

¹⁷ Abraham rīa janerābatia David ñ ñayorajuna catorce masa ñasuyoyijarā. Abraham macu ñayiju Isaac. Isaac macu ñayiju Jacob. Ito bajiro mani cōia

ruji waja David ĩ ñarajuna catorce ñarã ñayijarã ĩna. Ito bero mucana David macu ñayiju Salomón. Salomón macu ñayiju Roboam. Ito bajiro mani cõia ruji waja, Babiloniaju Israel sita gånare ĩna ãmi warajuna mucana catorce ñayijarã ĩna. Jeconías macu ñayiju Salatiel. Salatiel macu ñayiju Zorobabel. Ito bajiro mani cõia ruji waja Cristo ĩ rujejarajuna catorce ñayijarã mucana.

Jesucristo ĩ rujeare gaye

(Lc 2.1-7)

¹⁸ Jesús ĩ rujeare gaye ado bajiro bajiyiju: José manajo ñaroco ñayijo María. José rãca iso ñaroto riojajua Espíritu Santo ĩ masirisena ĩ queo sãjare macu sãñagõ ñayijo iso. ¹⁹ José iso manuju ñarocu queno yigu ñayiju. Ito bajiri masa ĩna tiro riojo bojoro iso tõbujaroca yi ãmobisiju José. Ito bajiri masa ĩna masibeto, “Mũre ãmobeaya” yi ãmobjayiju José isore. ²⁰ Ito bajiro ĩ tũoia cani waroca, ĩ cãiroju Dios ñaro gagu ángel goaioyiju ĩre. Goacõri ado bajiro gotiyiju ángel ĩre:

—Tũoya José David ñayoru janami mũ. Maríare manajo cuti giubesa mũ. Espíritu Santo ĩ masirise, ĩ queo sãjare macu sãñagõ ñamo iso. ²¹ Macu rucogo yigõji iso. Jesús wame wõgũ yigujaya mũ ĩre. Masare ĩna ñeñaro yirise waja yicõri masogũ yiguĩji ĩ. Ito bajiri Jesús wame cutigu yiguĩji ĩ, yiyiju ángel Josére.

²² Diore goti ĩsiri masu, “Ado bajiro rõtaro yiroja”, ĩ yiado bajiroti rõtayiju. Dios ĩ busire gotigu ado bajiro yiyiju Diore goti ĩsiri masu:

²³ Romio ãmũgũ rãca ajeiabeco macu sãñagõ ñagõ yigõji iso. Ito bajiri macu cutigo yigõji iso. Emanuel yirã yirãji masa ĩre, yiyiju Diore goti ĩsiri masu. “Dios ñami mani rãca”, yireoni ña iti Emanuel yire.

²⁴ Ito bajiri yujiguti ángel ĩ gotiado bajiroti yiyiju ĩ. Maríare manajo cutiyiju ĩ ĩja. ²⁵ Iso macu ñasugõ rucoroto riojua, manajo macu bajiro bajiyiju José maji. Iso rucõja bero Jesús wame yiyijarã ĩna ĩre.

Ñocõare riasotiri masa Jesure ĩna eja tire gaye

2 ¹ Judea sitaju Belén wame cutiri cutoju rujeayiju Jesús. Iti rodori ĩ rujearoca iti sita ujua ñayiju Herodes wame cutigu. Iti rodori Jerusalénju ejayijarã ãmacañi joeja wadiro gãna ñocõare riasotiri masa. ² Iti cuto ejacõri seniayijarã ĩna:

—¿No ñati judio masa ujua ñarocu, rujearu? ãmacañi joeja wadiro ñocõare ticõri, “Rujeañi ĩ”, yi masimu gua. Ito bajiri ĩre rucubũorona wadia gua, yiyijarã ĩna.

³ Ito bajiro ĩna seniãa ucuja tũocõri, ito gagu ujua Herodes buto tũoia giuyiju. ĩre bajiro riti tũoayijarã iti cuto Jerusalén gãna cuni. ⁴ Ito bajiro tũoãcõri paia ujarã, judio masa rotirise riasori masare cuni ji ñucayiju Herodes. ĩna ejaja ticõri, ado bajiro seniayiju ĩ: “¿Noju rujeagu yiguĩjida Cristo?” yiyiju ĩ ĩnare. ⁵ ĩnajua ado bajiro yiyijarã ĩre:

—Judea sita Belén wame cutiri cutoju rujeagu yiguĩji, yi ucañi sũgũ Diore goti ĩsiri masu. Ado bajiro baja ĩ ucare:

6 “Judea sitaju Belén wame cutiri cuto, jaibiti cuto ñabojarocati ñasari cuto ñaro yiroja iti cuto. Iti cuto gagu ɸju ñasagu rujeagu yiguji. Ñagũ yiguji yu ñarã Israel sita gãna ɸju. Ñnare tirũnugũ yiguji ã, yiyiju Dios”, yi ucare ña adi, yiyijarã judio masa rotirise riasori masa.

7 Ñna ito yija tɸocõri, mɸcana ñocõare riasotiri masare yeyoroacã ji ñucayiju Herodes. Ñna ejaja ticõri, ado bajiro seniayiju ã: “¿Nocãta ñocõa goasucati?” yi seniayiju ã ñnare. 8 Ito yija Belénju ñnare wa rotiyiju ã: —Wasa ã macuacãre amatẽña. Mua ãre ti bujaja yure gotirã wadiba. Yu cuni ãre rucubogug warocu ya, yiyiju ñnare rugu.

9 Ñito bajiro rotija tɸocõri, ã yiro bajiroti wayijarã ñna. Ñmacañi joeja wadiroju ñocõa ñna tiru ñna riojua wayiju mɸcana. Ñ wajasaroti tuja rügũyiju macuacã ã ñaro weca. 10 Ñocõagã wacõri ã tuja rügũja ticõri, buto wanuyijarã ñna, ñocõare riasotiri masa. 11 Ñocõagã ã ñaro roca ñari wi sãja wacõri ñna tija ito ñayiju macuacã ã jaco María rãca. Ñre ticõri ã riojo rijomunigãna ñini rüjũyijarã ñna. Ito yicõri ãre rucuboguyijarã ñna. Ito bajiro ñna yija bero ñna rucori jedori janayijarã ñna. Janacõri orore, ɸco queno sutirise, ito yicõri mirra wame cutirise iti amicõri ãre ãsiyijarã ñna. 12 Ito yija bero ñna cãiroju, “Herodes tu tũdi wabesa. Ito ñaguji macuacã”, ã yi masime yirona, yiyiju Dios ñnare. Ito bajiri iti masicõri Jerusalénju rãta wa amomena gaje maju tũdi wayijarã ñna.

Egipto sitaju ñna ware gaye

13 Ñocõare riasotiri masa ñna tũdija bero ángel goayiju Josére ã cãiroju. Ado bajiro yiyiju ã ãre:

—Yujiya, macuacãre, ã jacore cuni Egiptuju amĩ rudi wasa mũ. Itoju riti ñnama maji yu mure gotirocõjuti. Herodes macuacãre sãarocu ãre amagũ yiguji, yiyiju ángel Josére.

14 Ñito yija bero yuyiyiju José. Yujicõri macuacãre, ã jacore cuni Egiptuju ñnare amĩ wayiju ã. 15 Ito ñna ñaroca riti godacoayiju Herodes. “Egiptuju yu Macure ji ñucagũ yigujaja yu”, ãre goti ãsiri masuna suoriti Dios ã yija, ã gotiado bajiroti bajiyiju.

Herodes wame cutigu rãacare ã sãa rotire gaye

16 Ñocõare riasotiri masa ãre goti amomena gaje maju ñna tũdi waja tɸocõri, buto junisiniyiju Herodes. Ito bajiri junisinigũ Belén gãna rãaca ãmũare ito yicõri, iti cuto tu gãna rãacare cuni sãa roti jeocõyiju Herodes ã ya moari masare. Jua rodo tũjarãre ñna bero rujeanare cuni sãa roti jeocõyiju Herodes. “Jua rodo tũja ñocõa ã rujeaja bero”, ñocõare riasotiri masa ñna yija tɸocõri, jua rodo tũjarãre ito yicõri ñna bero rujeanare cuni sãa roti jeocõyiju Herodes. 17 Ito bajiro Herodes rãacare ã sãa rotija Diore goti ãsiri masu Jeremias wame cutigu ã ucado robo bajiroti rãtayiju. Ado bajiro ucañi ã:

18 Ramã sita gago iso rãare iso tũoĩa otija ruyuyiju. Ito bajiro oti ñagõti ñayijo iso, Raquel rãare otigo. Gãjerã ñna sobojarocati yisi amobisijo Raquel iso rãa godajare, yi ucayiju Jeremias.

¹⁹Egiptoju José ĩ ñaroca godayiju Herodes. ĩ godaja bero Egiptoju José ĩ ñaroca ĩ cãiroju sĭgũ ángel ĩre goañoiyju. Ado bajiro yiyiju ĩ ĩre:

²⁰—Yujiya, macuacãre ĩ jacore cuni Israel sitaju ámi tũdi wasa. Macuacãre sĩa ámoana goda jedicoama ĩna, yiyiju ĩ Joséré.

²¹Ito yija yujicõri, macuacãre ĩ jacore cuni Israel sitaju ámi wayiju José. ²²Ma wacuju tuoyiju José, “Herodes ñajacu macu Arquelao wame cutigu ĩ jacure wasoagu Judea sitaju ñayiju”, yija tuoyiju José. Iti tuocõri wa ámobisiju ĩ itoju. Mucana itoju cãiyiju ĩ. Ito bajiro cãicõri, “Galilea sitaju yu waja quena”, yiyiju ĩ. ²³Galilea sitaju ejacõri, Nazaret wame cutiri cutoju ñagũ wayiju ĩ. Diore goti ĩsiri masa, “Nazaret cuto gagũ ñagũ yiguĩji Jesús”, ĩna yi ucare ñajare ito bajiroti bajiyiju iti.

Yucu manojũ Juan idé guri masũ ĩ ña ucure gaye

(Mr 1.1-8; Lc 3.1-9, 15-17; Jn 1.19-28)

3 ¹Iti rodori ito bajija bero Juan masare idé guri masũ Judea sitaju yucu manojũ wayiju. ²Itoju ejacõri masare riasogu, ado bajiro yiyiju ĩ:

—Nocõ mejeti ĩre tuorũnurãre ĩ rotiroju miojugu yiguĩji Dios. Ito bajiri mua ñeñaro yirise tuoĩa bojori bujacõri jidicãña mua, yiyiju Juan masare.

³Diore goti ĩsiri masũ Isaías wame cutigu ĩ ucado bajiroti yiyiju Juan. “Ado bajiro yigu yiguĩji”, yirocu ucañi Isaías Juanre tuoĩa yugu:

Sĭgũ yucu manojũ muare ado bajiro oca sẽoro gotigu yiguĩji:

“Ñeñaro mua yirise jidicãña mani Ʋju ĩ ejaroto riojua, mua ya usiju ĩ queno ña masitoni. Ñeñaro yirise jidicãcõri quenarisejua tuoĩaña mua”, yigu yiguĩji sĭgũ, yi ucañi Isaías, Juanre tuoĩa yugu.

⁴Juan ĩ sãñaro yutabuju, camello joana suado ñayiju. Waibacu wiro ñayiju ĩ ya wecu wiro. Rujiro ñimia bayiju ĩ. Ito yicõri joa gaye beroa ide idiyiju ĩ. ⁵ĩre tuorã masa jãjarã ejayijarã. Jerusalén gãna, Judea sita gãna



(San Mateo 3.4)

ito yicōri Jordán wame cutirisa gāna cūni ejayijarã ĩre tuorã. ⁶Ĩna ñeñaro yirise ĩna goti rētojuja, Jordán wame cutirisaju ĩnare idé guyiju Juan.

⁷Jājarã fariseo gaye tuoīarã, ito yicōri saduceo gaye tuoīarã cūni ĩna ejaja ticōri, ado bajiro yiyiju Juan:

—Muare yu idé gure āmoboja m̄ua. Āña rima juniro bajiro ñeñaro yirã ña m̄ua. Ado bajiro tuoīaboja m̄ua: “Dios waja ĩ seniri r̄um̄a iti ejaroca manire waja senibiquiji Dios. Ñeñaro yirã mani ñabobarocati manire ti maicōri manire waja senibiquiji Dios”, yi tuoīaboja m̄ua. Ñeñaro m̄ua yirise m̄ua jidicābeja m̄ua tōbujaroca yigu yiguji Dios, yiyiju Juan ĩnare.

⁸M̄ucana ado bajiro gotiyiju Juan:

—Ñeñaro m̄ua yirise jidicācōri quenarise riti tuoīa ñaña m̄ua. Ito bajiro riti yisotiba, “Quenarisejua tuoīarã ñama ĩja”, masa muare yi ti masitoni. ⁹Ado bajiro yi tuoīabesa m̄ua: “Abraham ñayoru janerābatia gua ñare waja guare masogū yiguji Dios”, yi tuoīabesa m̄ua. Ado bajiro baja. Adi gūtana Abraham janerābatia robo bajiro ĩ godo weo āmoja, godo weo masiguji Dios, yiyiju Juan ĩnare.

¹⁰Ito yicōri ado bajiro goti masiore ocana gotiyiju Juan:

—Comeana yucure quēarocu ñacāmi sīgū. Ito bajiri yucu queno rica manigūre ti bujacōri quēagū yiguji ĩ. Ito yicōri jeana soegu yiguji ĩ. Ado bajiro yireoni ña iti: “Masa ĩna ñeñaro yiriseri waja senirocu ñacāmi Dios. Ito bajiri ĩna ñeñaro yirise jidicābeja ticōri, ĩnare ruyuriogu yiguji ĩ. Ito yicōri jeame ĩjuroju cōagū yiguji Dios ĩnare”, yiyiju Juan masare.

¹¹Gaje ado bajiro gotiyiju Juan:

—“Āna ñama ĩna ñeñaro yirise jidicārã”, yi ĩorocu idenati masare idé gua yu. Yu bero rētoro ñasagu ejagu yiguji. Yu rētoro ñasagu ĩ ñajare ĩre bajiro rētoro ñasagu meje ña yu. Īama muare Espiritu Santo queo sīgū yiguji ĩja. Ito bajiro muare queo sācōri queno muare m̄ua tuoīaroti ejabuagu yiguji ĩ, yiyiju Juan masare.

¹²Gaje ado bajiro gotiyiju Juan ĩnare:

—Yu bero ejagu trigo besegu bajiro yigu yiguji masare. Sīgū trigo otegu iti wirori coda batecōri ajeri riti seo masiguji ĩ. Ito bajiro ĩ codaja bero iti wirorire jeameju soeguji ĩ. Yatirime meje ñaroja itime jeame. Wirori ĩ soegori ajeriana trigo ĩ seoroju seogu yiguji ĩ. Ito bajiro yigu yiguji mani ĩju adoju ejagu. Trigo beseado bajiroti besegu yiguji manire, yi gotiyiju Juan masare.

Jesure idé gure gaye (Mr 1.9-11; Lc 3.21-22)

¹³Iti r̄um̄uri Galilea sitana wacōri Jordán wame cutirisa ejayiju Jesús. Juan tuj̄u ejacōri: “Yure idé guya m̄u”, yiyiju Jesús ĩre. ¹⁴Ito bajiro ĩ yibobarocati ĩre idé gu āmobisiju Juan. Ito bajiri ado bajiro yiyiju ĩ Jesure:

—Meje, muāma yure m̄u idé guja quena. Yure idé gu rotibitiruja m̄u. Yu rētoro ñasagu ña m̄u. Ito bajiri m̄ure idé gu masibea yu, yiyiju Juan Jesure.

¹⁵Ĩ ito yija tuocōri, ado bajiro yiyiju Jesús ĩre:

—Yũre mũ idé gure ãmoa yũ. Yũre mũ idé guja ñajediro Dios ï rotiro bajiro cudiana mani, yiyijũ Jesús Juanre.

—Bau ãmoa yũ, yicõri Jesure idé guyijũ Juan ïja. ¹⁶Jesús ï majaroca riti ùmacũjũ macãrucũro soje janayijũ. Ùmacũjũ Jesús ï ti mũorocati bujare bajiro bajigũna quedu sãja wadicõri Jesús joe quedu jeayijũ Espiritu Santo. ¹⁷Ito bajiro ï quedu jeaja bero ado bajiro oca ruyuyijũ ùmacũjũ:

—Ãni yũ Macu ñami, yũ maigũ. Ñre buto wanũa yũ, yi ruyuyijũ oca ùmacũjũ.

Rũmũa Ʃjũ Jesure ï Ʃsirio codere gaye

(Mr 1.12-13; Lc 4.1-13)

4 ¹Jesús ï idé gu rotija bero yucu manojũ Ñre ãmi wayijũ Espiritu Santo. Itojũ Jesús ï ejaroca, “¿Diore riti cudigu yiguĩjida Jesús?” yirocu Ñre Ʃsirio codeyijũ rũmũa Ʃjũ.

²Jũarã masacõ rãmuri bare babicũti ñayijũ Jesús yucu manojũ. Itocõ bero ñiocõyijũ mũcana. ³Ï ito bajijare, Ñre ruogu ejayijũ rũmũa Ʃjũ:

—Riti Dios Macu mũ ñaja adi gũtanati naju godu weogu yigũja mũ, yiyijũ ï Jesure.

⁴Ito bajiro rũmũ Ñre yibojarocati:

—Yibesa. Dios oca ado bajiro gotia: “Najuna riti meje catirã yirãji masa. Jeyaro Dios ocana queno wanũ quena ñarã yirãji masa”, yi gotia Dios oca, yiyijũ Jesús rũmũre.

⁵Ï ito yiroca riti Jerusalénjũ Jesure ãmi wayijũ rũmũa Ʃjũ. Ito ejacõri mũcana Dios ya wi joejũ Jesure ãmi mũja wayijũ rũmũ. ⁶Ito Ñre ãmi mũja ejacõri ado bajiro yiyijũ:

—Tũoya Jesús mũ. Ado bajiro gotia Dios oca:

Ï ñaro gãna ángel mesare mũre code rotigu yiguĩji Dios. Mũ quedu waja gũtagã joejũ quedu jeacõri mũ ya gũbo jeabe yirona mũre boca ãmirã yirãji ñna, yi gotia Dios oca, yiyijũ rũmũ Jesure.

Gaje ado bajiro yiyijũ ï:

—Riti Dios Macu mũ ñaja adojũna bubu quedu wacu yigũja mũ, yi tobũayijũ rũmũa Ʃjũ Jesure.

⁷Ï ito bajiro yibojarocati ado robojũa yiyijũ Jesús Ñre:

—Mũ ito bajiro yirisere cudibicũja yũ. Gaje ado bajiro gotia Dios oca tuti. Tite mũ: “ ‘No bajiro Dios ï yija ticũja yũ’, yirocu Ñre Ʃsirio codebesa”, yi gotia Dios oca, yiyijũ Jesús rũmũre.

⁸Ï ito yija tũocõri, cogũ gũtagũ ùmaricũ joejũ ãmi wayijũ rũmũ Jesure. Itojũ ãmi ejacõri adi sita gaye quenari cãtorire ïo jeocõyijũ rũmũ Jesure.

⁹Ito yicõri ado bajiro gotiyijũ rũmũ:

—Yũre rũcũbuogu mũ yũ riojo rijomunigãna ñini rũjũja, adi sita ñarocõti ñarise mũre ïsicũja yũ, yi ruoyijũ rũmũa Ʃjũ Jesure.

¹⁰Ito bajiro ï gotibojarocati:

—Wasa Satanás m̄. Ado bajiro gotia Dios oca: “Mani ʘj̄ Diore riti r̄c̄ub̄oc̄ōri c̄ud̄ija quena”, yi gotia Dios oca, yiyij̄ Jesús r̄m̄úre.

¹¹ Jesús ito ī yija t̄oc̄ōri, wacoayij̄ r̄m̄á īja. Ito yija bero ángel mesa Jesure ejabuarona ejayijarā īja.

Galilea sitaj̄ Jesús ī r̄iasos̄uore gaye

(*Mr 1.14-15; Lc 4.14-15*)

¹² “Tubiara wij̄ ñami Juan”, yire oca t̄oc̄ōri Galilea sitaj̄ t̄udi wayij̄ Jesús. ¹³ Itoj̄ ejac̄ōri ī ñaro Nazaret wame c̄ut̄iri c̄utoj̄ tujabisij̄ Jesús. Galilea wame c̄ut̄irita t̄unima t̄a Capernaum wame c̄ut̄iri c̄utoj̄ ñaroc̄u wayij̄ Jesús. S̄oj̄ meje ñayij̄ Zabulón sita ito yic̄ōri Neftalí sita c̄uni. ¹⁴ Iti c̄utoj̄ Jesús ī ñaja Diore goti isiri mas̄ Isaf̄as wame c̄utiḡ ī ucayore r̄etayij̄ īja. Jesure t̄oĩa yuḡ ado bajiro ucayoñi Isaf̄as:

¹⁵ Jordán jodej̄ Galilea wame c̄ut̄irita ñac̄. Itira t̄unima t̄a ñac̄ Zabulón sita ito yic̄ōri Neftalí sita. Iti sitaj̄ ñarā judio masa meje ñarāji īna.

¹⁶ Diore masibitic̄ōri r̄añiario bajiro ñarāji īna. Ito bajic̄ōri siḡ queno busuḡre ti wan̄rā yirāji īna. Diore masimena ñari godanare bajiro bajirāji īna.

Ito bajiri busuḡ ī eaja tic̄ōri, wan̄rā yirāji īna. Īna t̄uo masiroca yiḡ yiḡuñi ī. Ito bajiri mama r̄m̄u bajiro ejaro yiroja ñare, yi ucayoñi Isaf̄as. Ī ucare bajiroti iti sitaj̄ ejayij̄ Jesús.

¹⁷ Iti sitaj̄ ejac̄ōri masare Dios oca r̄iaso ucus̄oyij̄ Jesús. Ado bajiro gotiyij̄:

—Yoari mejeti ire t̄or̄ñ̄r̄re ī rotiroj̄ miojuḡ yiḡuñi Dios. Ito bajiri m̄a ñeñaro yirisere jidic̄ōri mama usi wasoaya m̄a, yi masare r̄iaso ucuyij̄ Jesús.

Wai jori masa juariar̄re Jesús ī jire gaye

(*Mr 1.16-20; Lc 5.1-11*)

¹⁸ Itajura Galilea wame c̄ut̄irita t̄unima wa ucuḡ wayij̄ Jesús. Ito wac̄uj̄ tiyij̄ Jesús, Simón Pedro ito yic̄ōri ī ocabaji Andrésre c̄uni. Wai jori masa ñayijarā īna. Yori yuc̄rina wai waya ñayijarā īna. ¹⁹ Īna t̄u ejac̄ōri ado bajiro yiyij̄ Jesús:

—Ȳ r̄aca waya. Masare jirā yirāji m̄a, Diore ĩna masitoni, yiyij̄ Jesús ñare.

²⁰ Ī ito yirocati yori yuc̄ri c̄uc̄ōri, ī r̄aca s̄ya wayijarā īna.

²¹ Ito yija ito s̄oj̄a bus̄a wa remoyij̄ Jesús. Jabeto wa remoc̄ōri tiyij̄ Jesús, Santiago, ī ocabaji Juanre c̄uni. Zebedeo r̄ia ñayijarā īna. Īna jac̄u r̄aca cumaj̄ yori yuc̄ri sia queno ñayijarā īna. Īnare tic̄ōri ñare jiyij̄ Jesús. ²² Ī ito yija t̄oc̄ōri, cumaj̄ti ĩna jac̄ure wagoyijarā īna. Ito bajiri Zebedeo r̄ia Jesús r̄aca wacoayijarā īna īja.

J̄jarā masare Jesús ī r̄iasore gaye

(*Lc 6.17-19*)

²³ Galilea sitaj̄ r̄iaso ucu jeoyij̄ Jesús. Co c̄uto r̄ayabeto judio masa minijuara wi s̄ajac̄ōri oca quenarise, “Īre t̄or̄ñ̄r̄re ī rotiroj̄ miojuḡ yiḡuñi Dios”, yire

oca gotiyijũ Jesús masare. Ñajediro cõrãre ãna cõrise bajiroti ãnare yisoyijũ Jesús. ²⁴Ito bajiro cõrãre Jesús ã yisioja Siria sita gãna cuni tuo jediyijarã ãna. Ito bajiri ñajediro cõrãre ãmi ejayijarã Jesús ã yisiotoni. Jeyaro ñarise cutirãre ãmi ejayijarã ãna. Rũmũ sãjagoana, ãsi jedi quediana, ruduanare cuni ãmi ejayijarã Jesús ã yisiotoni. ãna cõrise bajiroti ãnare yisoyijũ ã. ²⁵No Jesús ã waro jãjarã masa ãre sãya wayijarã. Tite. Galilea sita gãna, Decãpolis cuto gãna, Jerusalén cuto gãna, Judea sita gãna ito yicõri Jordán wame cutirisa sidũja gãna cuni Jesure sãya wayijarã ãna.

Tũria ñacõri masare Jesús ã riasore gaye

5 ¹Jãjarã masare ticõri tũria maja wayijũ Jesús. Itojũ maja wacõri rujiyijũ Jesús. Ito yija ã rãca riasotirã ã tu minijuayijarã. ²ãna ejaja ticõri, ado bajiro ãnare riasoyijũ Jesús:

Mani wanũ quenaroca yiroti gaye (Lc 6.20-23)

³—“Jaje rãya Dios oca queno yũ masi jeoroti”, mũa yi tũoãja, wanũ quenarã yirãji mũa. Ijajũ Dios ã rotirojũ ejacõri ã rãca rotirã yirãji mũa.

⁴Adocãta tũoã riorã mũa ñaja, wanũ quenarã yirãji mũa. Ijajũ mũa tũoã riorise rãtogũ yiguĩji Dios.

⁵“Gãjerã rãtoro ñasagũ meje ña yũ”, mũa yi tũoãja, wanũ quenarã yirãji mũa. Ijajũ Dios ã goticãdo bajiroti queno bũjarã yirãji mũa.

⁶Adocãta Diore cudi jeo ãmorã mũa ñaja, wanũ quenarã yirãji mũa. Mũare ejabũagũ yiguĩji Dios, ãre mũa cudi jeo masitoni.

⁷Gãjerãre ti maicõri mũa queno yija, wanũ quenarã yirãji mũa. Dios cuni mũare ti maicõri mũare queno yigũ yiguĩji ã.

⁸Dios ã ãmoro bajiro riti quenarise mũa tũoãja, wanũ quenarã yirãji mũa. Ijajũ Diore tirã yirãji mũa.

⁹Adocãta oca quenori masa mũa ñaja, wanũ quenarã yirãji mũa. Ijajũ, “Yũ rã ña mũa”, yigũ yiguĩji Dios.

¹⁰Diore mũa cãdire ticõri, gãjerã mũa tõbũjaroca ãna yija, wanũ quenarã yirãji mũa. Ijajũ Dios ã rotirojũ ejacõri, ã rãca rotirã yirãji mũa.

¹¹Yũre mũa cãdire ticõri, gãjerã mũare aja tudija, mũa tõbũjaroca ãna yija, ito yicõri mũare ãna busitubojaja cuni, wanũ quenarã yirãji mũa. ¹²Diore goti ãsiri masare cuni ito bajiroti ñẽnaro yiyijarã masa jane mejejũ cuni. Itire masicõri queno wanũ quenaña mũa. Ijajũ Dios tu ejacõri ñajediro ã seo ãsirisere queno bũjarã yirãji mũa, yiyijũ Jesús ã rãca riasotirãre.

**Moa oca quenarise robo bajiro bajirã ña mani, quenarise mani yija,
yi Jesús i riasore gaye
(Mr 9.50; Lc 14.34-35)**

¹³ Mɛcana ado bajiro gotiyijɛ Jesús i rãca riasotirãre:

—Moa ba ãmoama masa. Ito bajibojarocati iti ocabeja ñe waja ma moa. Juaji iti ocarise ejabeto yiroja. Iti ocarise jedija ticõri, itire cõacõrãji masa. Ito yicõri itire cudarã yirãji ña. Moa bajiro bajirã ña mani cuni. Mani queno yija ticõri, mani bajiro queno yi ãmorãji gãjerã cuni. Ito bajibojarocati mani queno yibeja, “Diore tuorũnũña mua cuni”, mani yi riasobojaja manire tuo ãmomenaji gãjerã, yiyijɛ Jesús.

¹⁴ Mɛcana ado bajiro gotiyijɛ Jesús:

—Ñami buto rãitiari ñami iti ñaja sõju jea iti busuja queno ruyuroja. Turia joe mani cuto menija masa jeyaro tirã yirãji jea iti busurise. Ito bajiroti mani queno yija masa jeyaro tirã yirãji ña. ¹⁵ Siabusuorise mani siaja sotɛ rocaju cūmenaji mani. Siabusuorise siacõri ũmacũju cūrã yirãji mani ñajediro iti wi gãna ña titoni. ¹⁶ Ito bajiroti queno yija mua “Queno yirã ñama Diore tuorũnũrã”, yi ti masirã yirãji masa jeyaro. Mua queno yirise ticõri mani Jacɛ ũmacũju gagure wanɛ rũcubũorã yirãji masa, yiyijɛ Jesús i rãca riasotirãre.

Moisés ñayoru i rotirise Jesús i riasore gaye

¹⁷ “Moisés ñayoru i rotirise ito yicõri Diore goti isiri masa ña riasorisere cõarocɛ wadiñi Jesús”, yi tuoĩabesa mua. Itire cõarocɛ meje wadia yɛ. Ña riasorisere mua queno tuoĩatoni wadibɛ yɛ. ¹⁸ Riti muare gotia yɛ. Dios i rotirise ñajediro ñatĩnaro yiroja. Adi macãrucũro jediroto riojua co wame godo cutibeto yiroja. Ñajediro Dios i gotiado bajiroti rãtaro yiroja. ¹⁹ No Dios rotirisere jabeto cudibicɛ, “No yibeja mani cudi jeobeja cuni”, yi riasogu quenabeami. Dios rotiroju ejacõri ñasagu meje bajiro ñagũ yiguĩji iocũ. No Dios rotirise cudicõri, “Jeyaro i rotirise mani cudi jeoja quena”, yi riasogu i ñami quenagũ. Ito bajiri Dios rotiroju ejacõri ñasagu ñagũ yiguĩji ñama. ²⁰ Riti muare gotia yɛ. Judio masa rotirise riasori masa ito yicõri fariseo gaye tuoĩarã ña queno yibojado rãtoro mua queno yibeja Dios rotiroju ejamenaji mua, yiyijɛ Jesús i rãca riasotirãre.

Gãjerãre junisini tibesa, yi Jesús i riasore gaye

(Lc 12.57-59)

²¹ Mɛcana gaje ado bajiro gotiyijɛ Jesús:

—Jane mejeju gãna ña rotigore tuogoana ña mua. Ado bajiro baja iti: “Gãjire siabesa. No gãjire siãgũti ire waja senigũ yiguĩji Dios”, yi rotiyijɛ Moisés ñayoru. ²² Yũama ado bajiro muare goti remoa: No gãjire junisini tigure waja senigũ yiguĩji oca quenori masɛ. No gãjire busitugure waja senirã yirãji oca quenori masa. No, “Rocati mecũri masɛ ña mɛ. Jeame ũjuroju warũja mɛ”, yiguti ijuare waja senirocɛ ire cõagũ yiguĩji Dios jeame ũjuroju, ya yɛ muare.

²³ Itire masicōri, gaje ocare cūni tūoiaña mua. Diore rūcubūorā ña soe ñsira casaboju ejaçōri, “Gāji rāca oca cutia yu”, mua yi tūoia bujaja Diore rūcubūorona ecarure siacōri soebeja maji. ²⁴ Itire cūña maji. Itire cūcōri oca quenorona mua baba tu wasa. Ī rāca oca quenocōri Diore soe ñsirona tūdi waja quena, ya yu mware.

²⁵ Gaje ado bajiro bajia. Gāji mware ĩ seti yija oca quenori masu tūju mua ejaroto riojuu oca quenona mua. Oca quenori masu tu ejamenati mua oca quenobeja ĩ mware poreciare ñsigū yiguūji. Īna poreciaju mware tubiarā yirāji. ²⁶ Riti mware gotia yu. Ñeñaro mua yigore mua waja yi jeobeto riojuu budimena yirāji mua. Iti robo bajiroti bajia Dios waja seniri rāmū ejaroto riojuu ĩ rāca mua oca quenobeja, ya yu mware, yiyiju Jesús ĩ rāca riasotirāre.

Gāji manojore rūcubūoya, yi Jesús ĩ riasore gaye

²⁷ Mucana gaje ado bajiro gotiyiju Jesús:

—Jane mejeju gāna ña rotigore tūogoana ña mua. Ado bajiro bajia: “Gāji manajo rāca ajebesa”, yi rotiyiju Moisés ñayoru. ²⁸ Yūama ado bajiro mware goti remoa: No romiore āmotigu ĩ tūoīarisena isore ajegu bajiro yami ñocū, ya yu mware, yiyiju Jesús.

²⁹ Mua ya riojocājuja cajeana ticōri ñeñaro mua yi āmoja iti cajeare ruacōña. Itire ruacōri cōatēña. Manire co dūja cajea manija quenabetoja. Ito bajibojarocati juu cajea, cajea cutirā ñabojarāti jeame ũjuroju mani waja, rēto busaro quenabeto yiroja. ³⁰ Mua ya āmona ñeñarise mua yija, itire jatacōña. Itire jatacōri cōatēña. Manire co dūja āmo manija quenabetoja. Ito bajibojarocati juu āmo, āmo cutirā ñabojarāti jeame ũjuroju mani waja, rēto busaro quenabeto yiroja. “Mua ñeñaro yirise jidicāña mua”, yirocu ito bajiro yiyiju Jesús ĩ rāca riasotirāre.

Manojore jidicābesa, yi Jesús ĩ riasore gaye

(Mt 19.9; Mr 10.11-12; Lc 16.18)

³¹ Mucana ado bajiro gotiyiju Jesús:

—Gaje ado bajiro gotia jane mejeju yigore: “Ūmugū ĩ manojore ĩ cōa āmoja papera ucarūja ĩre: Adio rāca manajo cutibojaguti isore cōagū ya yu. Yu manajo meje ñamo ĩja, yi ucarūja ĩre”, yi gotia jane mejeju yigore. ³² Yūama ado bajiro mware gotia: Sīgū ĩ manajo gāji rāca ajebitigoro ñabojarocati isore ĩ cōaja, isore buto ñeñaro yami ñocū. Gāji rāca iso manuju cutibojaja ĩre ajego yigōji iso. Ito yicōri no iso rāca manajo cutija isore ajegu yiguūji ĩ, yi gotiyiju Jesús ĩ rāca riasotirāre.

Riojo mani gotija quena, yi Jesús ĩ riasore gaye

³³ Mucana gaje gotiyiju Jesús:

—Jane mejeju gāna ña rotigore tūogoana ña mua. Ado bajiro bajia iti: “Riti ado bajiro yicūja yu”, Diore mua gotija mua goticādo bajiroti yiba, yi rotiyiju Moisés ñayoru. ³⁴ Yūama ado bajiro mware gotia: “Ado bajiro yicūja yu”, yicōri,

rijojo yiba. “Yũ goticãdo bajiroti yicũja yũ”, yirocũ “Riti gotia yũ Dios ï ñaro riyojo”, yibesa itioni. Ï ñaro ña ï rotirojũ. Ito bajiri, “Riojo gotia yũ”, yibesa iti wame rãca. “Adi macãrucũro riyojo cũni, riti gotia yũ”, yibesa itioni. ³⁵Adi macãrucũro ña Dios yaro. Ito bajiri, “Riojo gotia yũ”, yibesa iti wame rãca. “Jerusalén wame cutiri cuto riyojo cũni riti gotia yũ”, yibesa itioni. Mani Ujũ ñasagu cuto ña Jerusalén. Ito bajiri iti cuto wame rãca “Ado bajiro yicũja yũ”, yibesa. ³⁶“Yũ ya rijoganati riyojo gotia yũ”, yibesa itioni. Ñirise, botirise mani ya rijoga joa godo weo masibea mani. Dios sigũti ñami itioni godo weo masigũ. Ito bajiri iti wame rãca, “Ado bajiro yicũja yũ”, yibesa mua. ³⁷Mani riyojo gotija quena. Mani cudibeja cũni riyojo gotija quena. “Riti gotia yũ”, yirona gaje mani goti remoja rãmũa ujũ ejabuarisena goti remoa mani, yi gotiyijũ Jesús ï rãca riasotirãre.

Sigũ ñeñaro manire ï yija gãmebeja quena, yi Jesús ï riasore gaye
(Lc 6.29-30)

³⁸Mũcana gaje ado bajiro gotiyijũ Jesús:

—Jane mejeju gãna ñna rotigore tuogoana ña mua. Ado bajiro bajia iti: “Sigũ ï cajea jioja gãjire cũni cajea jioja quena. Sigũ ï guji jabejasãja gãjire cũni guji jabejasãja quena”, yiyijarã masa jane mejeju gãna. ³⁹Yũama ado bajiro mũare gotia. Sigũ ñeñaro mũare ï yija ïre gãmebeja. Ado bajirojũa yiba. Sigũ rio mũare ï jaja gaje duja cũni rotiba. ⁴⁰Sigũ mũ ya camisa ï ema ãmoja, rẽobeja ïre. Ï ãmoro ãmicõto. Ito yicõri ïre jai busaro ïsi remoña. ⁴¹Sigũ ï ya gajeoni coji cõrecõ ï ãma rotija juaji cõrecõ ïre ãma ïsima. “Ado bajiro yũre moa ïsiña”, gãji mũare ï rotija, ï rotiro rẽto busaro ïre moa ïsija quena. ⁴²Noa mũare gajeoni senirãreti ïsicõaja quena. Sigũ mũare wasoa ãmoja wasoaja quena. Ito yicõri “Mũre ïsicũju yũ”, yija quena, yiyijũ Jesús ï rãca riasotirãre.

Mani wajanare cũni mani ti maija quena, yi Jesús ï riasore gaye
(Lc 6.27-28, 32-36)

⁴³Jane mejeju gãna ñna busigore tuogoana ña mua cũni. Ado bajiro bajia iti: “Mũa babare queno ti maiña. Ito yicõri mũa wajacũre ti teya”, yiyijarã masa jane mejeju gãna. ⁴⁴Yũama mũare ado bajiro gotia: “Mũa wajanare ti maiña. Ñnare queno yiya. Mũa tõbũjaroca yirãre yiari Diore busi ïsiña”, ya yũ mũare. ⁴⁵Ito bajiro mũa yija mani Jacũ ãmacũju gagũ rĩa ñarã yirãji mũa, ï ãmoro bajiro riti mũa yisotija. Masa ñajedirore queno ejabũami Dios. Ïre cudimenare cũni ejabũami ï. Ï ñami quenarã, ñeñarãre cũni ãmacañi busuroca yigũ. Ï ñami riyojo cudirã, riyojo cudimenare cũni ide queo ïsigũ. ⁴⁶Mũare ti mairãre riti mũa ti maija ñe waja ma iti. Ito bajiro mũa yija ticõri, mũare waja yibiquiji Dios. Ujarãre yiari waja seni ïsiri masa ñnare mairãre riti ti mairãji ñna cũni. Ñnare bajiro yibesa mũa. Mũare ti terãre cũni maija quena. ⁴⁷Mũa ñarãre riti mũa seniãaja, ñe waja ma. Diore masimena cũni ito bajiroti yirãji ñna cũni. ⁴⁸Mani Jacũ ãmacũju gagũ, coji ñeñaro yĩabicũ ñami ï. Ïre bajiroti yiya mũa cũni, yiyijũ Jesús ï rãca riasotirãre.

Gãjerãre mani ejabuaja quena, yi Jesús i riasore gaye

6 ¹Queno mua yija, “Queno yama ña”, yijaro gãjerã yirona meje, queno yiba mua. Masa tiro riojo riti, “Ñani ñami queno Diore cudigu”, mua yi ïobojaja ñe waja bujamenaji mua, ïmacũju mani Jacu Dios tujũ mua ejaja. ²Ito bajiri bojoro bujarãre mua ejabuaja masa jeyarore goti batobeja. Ito bajiro yama minijuara wijũ, marijũ cuni, “Yiro robo yirã ña gũa”, yibojarãti yiro robo yimena. Bojoro bujarãre ña ejabuaja, “Queno yirã ñama”, masa ña yitoni yama ñaõna. Riti muare gotia yũ. Ito bajiro ña yirisenati waja bujacãma ña. Ñe gaje buja remomenaji Dios tujũ. Ñare masa rucubuojarocati Dioama ñare rucubuo bicu yiguĩji. ³Muama bojoro bujarãre mua ejabuaja, masa ña masibeto ito yicõri mua baba ñasagũ i masibeto masare ejabuaja quena. ⁴Reco meje masa ña tibeto bojoro bujarãre ejabuaba mua. Masa ña tibeto bojoro bujarãre mani queno yija, ti masiguĩji Dios manire. Ito bajiri waja yigũ yiguĩji manire, yiyijũ Jesús ñare.

Diore mani seniroti Jesús i riasore gaye

(Lc 11.2-4)

⁵Diore mua busija, “Yiro robo yirã ña gũa”, yibojarãti yiro robo yimena bajiro Diore busibeja mua. Ñama minijuara wijũ Diore ña busija rügõcõri busirãji. Ito yicõri ma tunima masa ña titoni Diore busirã yirãji ña. Ito bajiro ña yirisenati waja bujacãma ña. Ñe gaje buja remomenaji ña Dios tujũ. Ñare masa rucubuojarocati Dioama ñare rucubuo bicu yiguĩji. ⁶Muama Diore mua busija, mua ya sõa sõjacõri soje biaya maji. Ito bajiro yicõri mani Jacu rãca riti busiba mua. Ito bajiro masa mano mua yija ticõri, mani Jacu muare waja yigũ yiguĩji, yiyijũ Jesús ñare.

⁷Diore masimena ñre ña busija, coji gayeti busimucutiama ña. “Bũto mani busimucutiya Dios manire tũogũ yiguĩji”, yi tũoĩa busibojarãji ña. ⁸Ñare bajiro yibeja muama. Ñe manire ruyarise mani seniroti riojuaju masicãguĩji Dios. ⁹Ito bajiri Diore mua busija, ado bajiro busiba:

Gua Jacu, ïmacũju gagũ ña mũ. Mũ wame masicõri masa ñajediro rucubuojarõ ña.

¹⁰ Masa jeyaro Uju mũ ñaroti rũmũ ejare ãmoa gũa. ïmacũjuga tuti cuni mũ ãmoro bajiroti ñayija. Ito bajiri adi tutijũ cuni mũ ãmoro bajiro riti ñare ãmoa gũa.

¹¹ Co rũmũ ruyabeto gũa baroticõti gũare naju isiña.

¹² Gua ñeñaro yirisere ãcabojoya. Gua cuni ito bajiroti gũare ñeñaro yirãre ãcabojoa.

¹³ ¿No bajiro yũre cudirã yirãjida ña? yi tũoĩabesa gũare. Gua ñeñaro yibititoni gũare ejabuaya. Mũ ña uju ñatĩñarocũ. Mũ ña bũto masitĩñare gaye rucotĩñarocũ. Mũ ña masa jeyaro ña rucubuo tĩñarocũ. Itocõ ña. Amén. Ito bajiro Diore mua busija quena, yiyijũ Jesús i rãca riasotirãre.

14'Muare ñeñaro yirãre ñna ñeñaro yirisere mua ãcabojoja, mani Jacu ñmacũju gagu mua ñeñaro yirise ãcabojoju yiguĩji i cuni. 15Gãjerã ñna ñeñaro yirisere mua ãcabojobeja mani Jacu ñmacũju gagu cuni mua ñeñaro yirisere ãcabojobicu yiguĩji, yiyiju Jesús ñnare.

Bamena riti Diore mani busiroti Jesús i riasore gaye

16'Diore tuoia ãmorã bamena riti ñre mua busija, masa ñna tiro riojo bojori bujabeja mua. "Yiro robo yirã ñna gua", yibojarãti yiro robo yimena bamena riti Diore ñna senija, masa ñna tiro riojo bojori bujacã ñna. Masa ñna ti masitoni bojori bujabojacã ñna. Riti muare gotia yu. Itinati waja bujacãma ñna. Ñe gaje buja remomenaji ñna Dios tũju. Ñnare masa rucubuojojarocati Dioama ñnare rucubuoobicu yiguĩji. 17Bamena riti Diore mua busija, joa cuni queno siro, rio cuni queno coe yiba muare masa ti masime yirona. 18"Bamena riti Diore busirã ñnama ñna", masa yibe yirona wanu quenama. Mani Jacu mani rãca ñagũ i sigũti masitĩnagũ yiguĩji. Gãjerã masibeto i sigũti masigũ yiguĩji. Ito bajiri manire waja yigu yiguĩji i, yiyiju Jesús i rãca riasotirãre.

Ñmacũju Dios tu quenarise mani bujaroti gaye

(Lc 12.33-34)

19'Adi sitaju gajeoni jairo mio cũbesa. Adoju gajeoni mua mio cũbojarisere mutaracã barã yirãji gajeoni bari masa. Gajeoni jogaro yiroja, ito yicõri riniri masa rinirã yirãji. 20Yu tija ñmacũju mani Jacu tũju quenarise miojuja quena. Itoju gajeoni bari masa manaji. Gajeoni jogabetoja. Ito yicõri riniri masa cuni ejamenaji. Ñmacũju manire yiari queno yisotitĩnagũ yiguĩji Dios. Manire i queno yirise jedibetoja. 21Gajeoni mani rucoroju mani tuoiarise ñnaro yiroja manire. Ito bajiri ñmacũju mani Jacu tũju quenarise mani miojuja quena, yiyiju Jesús ñnare.

Mani ya cajea busurica robo bajiro baja, yi Jesús i riasore gaye

(Lc 11.34-36)

22'Mani ya cajea queno iti ruyuja, mani tuoiarise queno sosaroja manire. Ticõri queno mani tuoiaja mani ya usi cuni quenaroja manire. 23Ito bajibojarocati tibojarãti queno mani tuoiajeja, mani ya usi cuni quenabetoja manire. Rãitãaroju mani rũgõro robo bajiro bajiroja manire. "Ado bajiro ãmoami Dios", yi masibojarãti Diore mani cudibeja, ñre masirã meje ñna mani. Ito bajiri buto busa rãitãaroju mani rũgõro robo bajiro bajiroja manire, yiyiju Jesús ñnare.

Diore mani rucubuoja niyerure buto josare ma, yi Jesús i riasore gaye

(Lc 16.13)

24'Cocati mani ujarã jũarãre cudi masibea mani. Jũarã ñna ñaja sigũre queno ti maicõri, gãjire ti tudirã yirãji mani. Sigũre queno cudirã yirãji mani. Gãjire queno cudimena yirãji mani. Iti robo bajiroti Diore mani

cudija, niyerujuare buto tuoiamenaji mani. Niyerure riti mani buto tuoiaja Diore queno cudisabea mani, yiyiju Jesús inare.

Í ría masare tirúnugū yiguūji Dios, yi Jesús í riasore gaye
(Lc 12.22-31)

²⁵ Gaje muare ado bajiro gotia yu: “¿Ñe bacōri catiguti yu?” ito yicōri, “¿Ñe idicōri catiguti yu?” yi tuoiabesa. “¿Ñejua sãñacōri ñagūti yu?” yi tuoiabesa. Manire rujeoru ñacōri mani baroti, mani idiroti cuni isi masiguūji Dios.

²⁶ Minia umacūju wutirāre tuoiate mua. No ōno otemenaji ina. Ito yicōri no ōno bare miojumenaji ina. Ina baroti seomenaji ina. Ito bajiro ina bajibojarocati mani Jacu umacūju gagu inare bare ecaguūji. “Minoa rētoro ñasarā ña mani Dios í tija”, ¿yi masibeati mua? Minoare í tirúnuja buto busa manire tirúnugū yiguūji Dios. ²⁷ “Yoa busari cati āmoa yu”, yi mua oca jaija, ¿yoa busaro catirā yirājida mua? Meje, yoa busari catimenaji mua, yiyiju Jesús inare.

²⁸ “¿Ñe sãñagū yigujada yu?” yi tuoia oca jaibesa mua. Joa gaye gore tuoiate mua. Iti go moabetoja. Ito yicōri iti sãñaroti suabetoja iti. ²⁹ Ito bajibojarocati gore seyorise iti ñaroca yami Dios. Uju Salomón ñayoru gajeoni jaigu ñabojaguti go robo sãña jeobitioñi í. ³⁰ Gore seyorise iti ñaroca yami Dios. Goama seyorise ñabojaroti yoari mejeti siniaroja umacañi jeana. Iti siniaja ticōri, itire soerā yirāji masa. “Manire yutabuju isiguūji Dios”, ¿yi masibeati mua? Ire queno tuorūnusabea mua. ³¹ Ito bajiri, “¿Ñe barāti mani? ¿Ñe idirāti mani? ¿Ñe sãñarāti mani?” yi tuoīabitiruja manire. ³² Diore masimena itire tuoia oca jaicābojama ina. Manireama mani Jacu umacūju gagu ñacāmi, “Iti ruya inare”, yiri masu. ³³ “Dios ñami yu Uju. Í yagu ña yu”, mani yi tuoiaja quena. Iti ña ñasarise. “Ire bajiro quenarise riti yi āmoa yu”, mani yi tuoiaja quena. Ito bajiro mani yija, iti jeyaro manire ruyarise boca āmirā yirāji mani. ³⁴ “¿Jane busuri gaye ñe yigu yigujada yu?” yi tuoia oca jaibesa. Co rumu ruyabeto ricati riti bajiroja. Jane busuri oca ñaja mani rāca ñagū yiguūji Dios. Ito bajiri, “¿ñe yigu yigujada yu?” yi tuoia oca jaibesa, yiyiju Jesús í rāca riasotirāre.

Gājerāre seti yibesa, yi Jesús í riasore gaye
(Lc 6.37-38, 41-42)

7 ¹ Gājerāre seti yibesa, Dios muare í seti yibe yirona. ² Gājerāre mua seti yiro bajiroti muare cuni seti yigu yiguūji Dios. “Itocō seti ña inare”, gājerāre mua yiro bajiroti muare cuni, “Itocō ña seti”, yi masigū yiguūji Dios. ³ “Anire jabeto seti ña”, yibojarāti, “Guare jai busaro seti ña”, yi masibea mua. Seti cutirā ña mua cuni. Ado bajiro bajirā ña mua. Tuote. Mua babare cajeaju sūjuriacā iti ñaja ti masia mua. Ito bajibojarocati mua ya cajeaju sita jaje iti sãña biaja, ti masibea mua. ⁴ Mua ya cajeaju sita iti ñabojarocati mua babare cajeaju sūjuriacā āmicāto yiboja mua. Muamasireti bajirisereama ti masibea mua. ⁵ “Yiro robo yirā ña gua”, yirā ñaboja mua. Mua ya cajeaju sita sãñarisere āmicāña maji cajero. Iti sita mua āmicāja berojua queno ti masirā

yirāji mua. Ito yicōri mua babare cajeajū sūjuri ñarisere āmicā masirā yirāji mua. Ado bajirojua baja. Buto ñeñaro yirise mua jidicāja berojua, “Mū ñeñaro yirise jidicāna mū”, yi masirā yirāji mua babare, yiyijū Jesús ñare.

⁶Buto quenarise ña Dios oca. Īre ti terāre riaso josabeja. Yaiare quenarise ĩsibeā mani. Īnare mani ĩsibojaja, manire curutirā yirāji ĩna. Mūa ya ñaque perla wame cūtirisere yesea wato cōacūbeja. Mūa cōacūja itire cūda aborā yirāji ĩna. Ito bajiroti Dios oca quenarise ĩre ti terāre riaso josabeja ĩna tuo āmobeja ticōri, yiyijū Jesús ñare.

Diore mani senija cūdigū yiguīji, yi Jesús ĩ riasore gaye
(Lc 11.9-13; 6.31)

⁷Diore mani senija ĩsigū yiguīji. Īre mani āmaja bujarā yirāji. “Mure busi āmoa yū”, mani yija, busi rotigū yiguīji manire. ⁸No senigūti boca āmiguīji. No āmagūti bujagū yiguīji. “Busi āmoa yū”, yigūreti busi rotigū yiguīji Dios, yiyijū Jesús ñare.

⁹“Naju āmoa yū”, yi mua macū ĩ senija, ¿gūtagā ĩsirā yirājida mūa? Meje gūtagā ĩsimenaji mūa. ¹⁰“Wai āmoa yū”, mūa macū ĩ yija, ¿āña ĩsirājida mūa? Meje āña ĩsimenaji mūa. ¹¹Mūa ñeñaro yirā ñabojarāti mūa rīare queno yirāji mūa. Ito bajiri itire masicōri mani Jacū ũmacūjū gagū quenarise mani senija, “Manire ĩsi masiguīji ĩ”, yi tuoia mani, yiyijū Jesús ñare.

¹²Gājerā muare queno yire mūa āmoja ĩnare cūni queno yiya mūa. Ito bajiroti rotiyijū Moisés ñayorū, ito yicōri Diore goti ĩsiri masa ĩna ucayore cūni, yiyijū Jesús masare.

Eyabiti ma ña Dios tu wara ma, yi Jesús ĩ riasore gaye
(Lc 13.24)

¹³Dios tujū mani eja āmoja suari soje bajiri soje sājarāji mani. Jeame ũjuroju wara ma jaja ma ñaroja, ito yicōri soje sājarajū eyarijū ñaroja. Ito bajiri jājarā warāji itijure. ¹⁴Catitñarā wara ma eyabiti ma ñaroja. Ito yicōri iti soje sājarajū jaibiti soje ñaroja. Ito bajiri coriarāti sājarāji itojure, yiyijū Jesús ñare.

Ricana suori yucūgure ti masia mani, yi Jesús ĩ riasore gaye
(Lc 6.43-44)

¹⁵“Dios oca goti ĩsiri masa ña gūa”, yibojarāre masiña mūa. Ruori masa ñama coriarā. Mūa tu ĩna ejaja, oveja guamenare bajiro ejarāji ĩna. Ito bajibojarāti buto yaia guarāre bajiro ñarāji ĩna. ¹⁶Īna yirisejū ticōri masirā yirāji mūa. Jota yucūrijū rica manoja uyé. Jota marijū rica manoja higos wame cūtirise. ¹⁷Ito bajiroti yucū quenarise, quenarise rica cūtiroja. Ito yicōri yucū quenabitigū quenabiti rica cūtiroja. ¹⁸Yucū quenabitigū quenarise rica cūtibetoja. Ito yicōri yucū quenaricū ñeñarise rica cūtibetoja. ¹⁹Yucūgū queno rica manigūre itigūre quēacōri jeamejū soerā yirāji mani. ²⁰Ito bajiroti masare cūni ĩna yirise ticōri ĩnare ti masirā yirāji mūa, yiyijū Jesús ñare.

Dios ĩ rotiro ñasariju eja jedimenaji masa, yi Jesús ĩ riasore gaye
(Lc 13.25-27)

21 Jājarā, “Gua Uju ña mu”, yibojarāti coriarāti ũmacūju yu Jacu ĩ rotiroju ejarā yirāji ĩna. Yu Jacu ĩ āmoro robo bajiro yirā riti ejarā yirāji. 22 Iti rumu iti ejaroca jājarā ado bajiro yibojarā yirāji: “Gua Uju mu rotire rāca riti Dios oca busisoticu gua. Mu rotire rāca rāmúa sānarāre bucōacu gua. Ito yicōri mu wame rāca jaje tiyamani ĩocu gua”, yibojarā yirāji ĩna yure. 23 Ito bajiro ĩna yibojarocati ado bajiro ĩnare yigu yiguja yu: “Yu ñarā meje ña mua. Mure masibea yu. Yure wa camotadicoasa mua. Ñeñaro yiana ña mua”, yigu yiguja yu ĩnare, yiyiju Jesús masare.

Yure queno tuorūnūrā sita butiroju wi menirā robo bajiro bajirā ñama,
yi Jesús ĩ riasore gaye
(Mr 1.22; Lc 6.47-49)

24 Yure tuocōri yu rotiro bajiro yigu, ĩocū ñami queno tuoīgū. ĩ ñami sita butiroju wi menirūcū robo bajiro bajigu. 25 Sita butiroju wi ĩ menija bero ide quediujū. Riari jue jaiyiju. Ito yicōri buto mino wēayiju. Ito bajibojarocati sita butiroju ñacōri cadabisiju iti wi. 26 Yure tuobojaguti yu rotiro bajiro yibicu, tuoīa masibicu ñami ĩocū. ĩ ñami sita jujuroju wi menibojaru robo bajiro bajigu. 27 Iti wi ĩ menija bero ide quediujū. Riari jue jaiyiju. Ito yicōri mino wēayiju. Ito bajiri sita jujuroju ñacōri wi jujayiju, yiyiju Jesús masare.

28 Ito bajiro Jesús masare ĩ busija bero ruju ucayijarā ĩna. 29 Judio masa rotirise riasori masare bajiro meje queno busa riasoyiju Jesús. Dios ĩ cūre rāca ñasarise ĩ riasojare ruju ucayijarā ĩna masa.

Ruju cami jogagure Jesús ĩ yisiore gaye
(Mr 1.40-45; Lc 5.12-16)

8 1 Jesús ĩ turia roja ejaroca jājarā masa suyayijarā ĩre. 2 Ito ĩ waroca sīgū ĩ ya ruju cami jogagu Jesure canamuoijū. Jesús riojo rijomunigāna ñini rūjūyiju. Ito yicōri ado bajiro yiyiju ĩ Jesure:

—Yu Uju, yu ya cami mu ya āmoja, yagūja mu, yiyiju ĩ Jesure.

3 ĩ ito yija tuocōri, ĩ ya āmona moa jeoyiju Jesús.

—Āmoa yu. Mu ya cami yacūja yu, yiyiju Jesús ĩ ya ruju cami jogagure:

Ito bajiro Jesús ĩ yirocati ĩ ya cami yaticoayiju ĩre. 4 Ito yicōri ado bajiro rotiyiju Jesús ĩre:

—Tuoya, gājerāre goti batobeja. Riojo wacōri paire ĩotēña. Moisés ĩ rotiyoado bajiroti ecarure sīacōri Diore yiari soe ĩsima. Ito mu yija ticōri, “Cami yaticoañi”, yirā yirāji masa, yiyiju Jesús ĩ ya ruju cami jogagogure.

Surara ɛju ya moari masure Jesús i yisiore gaye
(Lc 7.1-10)

⁵ Capernaum wame cɛtiri cɛto Jesús i ɛjaroca sīgũ surara ɛju i tɛjua wayiju. Romano masu ñayiju i. Jesús tu ɛjacõri ado bajiro ire josayiju:

⁶—Tɔoya yu ɛju mu. Yu ya wiju yu ya moari masu cõ yosami. Buto juni wisi yosami, yiyiju i Jesure.

⁷ Ito yija tɔocõri, ado bajiro cɛdiyiju Jesús ire:


—Ire yisiogu wacu yiguja yu, yiyiju Jesús ire.

⁸ Ito bajiro i yiroca ado bajiro cɛdiyiju surara ɛju, Jesure:

—Yu ɛju, ñasagu meje ña yu, yu ya wi mu sãjabojaja cuni. Adojunati goti ñucaña mu. Ito yirocati yu ya moari masu caticoagu yiguji. ⁹ Gãjerã yu ɛjarã roca gagu ña yu. Ñna rotirise cɛdigu ña yu. Ito bajiri yu roca gãna yu ya surara yu rotirã ñama yure cuni. Sīgũre, “Wasa”, yu yija waguji i. Gãjire, “Waya”, yu yija wadiguji i. Ito yicõri yure ɛjabuari masu ire yu rotija, ire yu rotiro bajiroti yiguji i. Adojunati mu goti ñucaja yu ya moari masu caticoagu yiguji, yiyiju i Jesure.

¹⁰ Ito bajiro i yija tɔo ɛcacõri, “Yure tɔorũnɛsacõami ãni”, yi ti masiyiju Jesús ire. Ito bajiri ado bajiro yiyiju Jesús i rãca riasotirãre:

—Riti mware gotia yu. Israel sita gãna wato ire bajiro yure tɔorũnɛgũ tĩabiticu yu, yiyiju Jesús masare. ¹¹ Riti mware gotia yu. Jãjarã ãmacaãni i quedi sãjaro gãna i joejearo gãna cuni ãmacũju Dios i rotiroju ɛjacõri ba



(San Mateo 8.9-9)

rujirã yirãji ìna. Abraham, Isaac, ito yicõri, Jacob ñayoana rãca ba rujirã yirãji. ¹²Israel sita gãna Dios rotiroju ejaboanare rãitãroju ìnare cõagũ yiguĩji ì. Itoju ejacõri ñeñaro tõbujarã yirãji. Ito bajiri oticõri buto tũoĩa oca jairã yirãji, yiyiju Jesús masare.

¹³Ito yija surara ujure ado bajiro yiyiju Jesús:

—Mũ ya wiju tũdi wasa. Yure mũ tuorũnũro bajiroti mũre moa ìsiri masũ caticoagu yiguĩji, yiyiju Jesús ìre.

Ito ì yirijũti surara ujũ ya moari masũ ì ya wiju caticoayiju ì ìja.

Pedro mañicõre Jesús ì yisioire gaye

(Mr 1.29-31; Lc 4.38-39)

¹⁴Pedro ya wiju wayiju Jesús. Iti wi ejacõri, Pedro mañicõre tiyiju Jesús. Cama joeju iso cõ jesaja tiyiju Jesús. Buto ruju yayiju isore. ¹⁵Isore ticõri ãmo ì moaĩarocati ruju yarise jedicoayiju isore. Ito bajiri wũmũcõri masare eca bocasũoyijo iso.

Jãjarã ñarise cutirãre Jesús ì yisioire gaye

(Mr 1.32-34; Lc 4.40-41)

¹⁶Iti rãioroca jãjarã rũmũ sãñarãre Jesús tũju ãmi ejayijarã masa. Ito ìna bajija ticõri, coji ì busirisenati rũmũare bucõacõyiju Jesús. Ito yicõri ñarise cutirãre yisioyiju Jesús. ¹⁷Ito bajiro rẽtayiju Isaiás Diore goti ìsiri masũ ñayoru ì goticãdo bajiroti. Ado bajiro yiyiju Isaiás ñayoru: “Manire ruju gajajuarise ito yicõri mani ruju ñarise cutirise yisioyũ yiguĩji”, yiyiju Isaiás ñayoru yure tũoĩa yugũ, yiyiju Jesús masare.

Jesure tũo sũya ãmorã

(Lc 9.57-62)

¹⁸Jãjarã masa ì tũju ìna gãni biaja ticõri, “Gaje dũjaju jẽa wato mani”, yiyiju Jesús ì rãca riasotirãre. ¹⁹Ìna waroto riojua sigũ Moisés rotirise riasori masũ, Jesús tũ ejayiju:

—Riasori masũ, no mũ waroti mũre sũya ãmoa yũ, yiyiju ì Jesure.

²⁰Ado bajiro cũdiyiju Jesús ìre:

—Buyairoare ìna caniri goje ñacũ. Wũtirãre cũni ìna ya jibũ ñacũ. Ito bajibojarocati Masa Rĩjorũreama no cũñaraju ma ìreama. Ìti ña yũ Masa Rĩjorũ. Ito bajiri yure mũ sũyaja josari ñaroja mũre, yiyiju Jesús ìre.

²¹Ito yija gãji Jesús rãca riasotiri masũ ado bajiro yiyiju ìre:

—Yũ jacure codegũ ña yũ maji. Ì godaja bero mũre sũyacũja yũ maji, yiyiju ì Jesure.

²²—Adocãtati yure sũyaja quena. Godarãma godarãmasiti gãmeri yujejaro. Jeyaro mũ tũoĩa oca jairisere jidicãcõri yure sũyaja quena, yiyiju Jesús ìre. Yure tuorũnũmena godacãnare bajiro bajirã ñama. Ìnamasiti godarãre yujerã yirãji.

Minore, jacūrisere cūni Jesús ī rētoṛe gaye
(*Mr 4.35-41; Lc 8.22-25*)

23 Ī ito yija bero cumaju ī rāca riasotirā rāca sājayiju Jesús. 24 Itajura guḁareco īna tujaroca mino buto wēayiju. Ito bajicōri cumaju jacūsāyiju. Ito iti bajibojarocati canigū yiyiju Jesús. 25 Ito iti bajija ticōri, ī rāca riasotirā īre yujioyijarā. Īre yujiocōri ado bajiro yiyijarā īna īre:

—Gua Ūju rujarā ya mani. Ito bajiri guare masoña, yiyijarā īna Jesure.

26—¿No yija buto güiati mua? Yure queno tuorūnubea mua, yiyiju ī īnare. Ito yija wamu rūgūyiju ī. Ito yicōri minore, “Wēabesa”, ito yicōri jacūrise, “Jacūbesa”, yiyiju Jesús.

Ī ito yija bero ñe godo manoti tujacoayiju ĩja. 27 Ī rāca riasotiri masa itire ticōri ruju ucayijarā:

—¿Ñimūōcū masu ñatibe āni? Mino wēarise, ide jacūrise cūni ī rotija tuoā īre, yi tuoīayijarā īna.

Gadara gāna rūmúa sāñarā oca
(*Mr 5.1-20; Lc 8.26-39*)

28 Itajura gaje ḁujaju Gadara wame cutiri sita ejayijarā īna. Ito īna ejaroca jūarā ūmua masari cumaju budi wadiyijarā. Ito yicōri Jesús tu eja rūgūyijarā īna. Jūarājuti rūmúa sāñarā ñayijarā īna. Buto guarā ñayijarā īna. Ito bajiri īna tu rēta masia mañiju. 29 Jesure ticōri ado bajiro awasāyijarā īnare sāñarā rūmúa:

—Jesús, Dios Macu ña mu. ¿No yija gua tu wadiati mu? ¿Adocāta jeame ūjuroju guare cōacōri gua tōbujaroca yigu wadiri mu? yiyijarā īna Jesure.

30 Ito sōjua nocō mejeti jājarā ecana yesea āma ba ñayijarā. 31 Yeseare ticōri ado bajiro Jesure josayijarā rūmúa:

—Guare mu bucōaja, ōa yeseare guare sāja rotiya, yiyijarā īna Jesure.

32—Mūare roticā yu. Wasa, yiyiju Jesús rūmúare.

Ito ī yirocāti ūmua jūarājureti rūmúa budicoayijarā ĩja. Ito yicōri yeseajuare sāja wayijarā īna mūcana. Yeseare īna sājarocati turia ūmaquedi roja wacōri itajuraju quedi roacoayijarā īna. Ito bajiri ñarocōti ruja godacoayijarā īna ĩja.

33 Yeseare tirūnubojana ito iti bajija ticōri, güirā ūmaquedi wayijarā īna. Cutoju ejacōri, “Ado bajiro rētamu”, yirona goti jeoyijarā īna. Rūmúa sāñabojarāre īna rūmúa budigore gaye goti jeoyijarā īna iti cuto gānare.

34 Īna ito bajiro gotija tuocōri, Jesús tujuare minijua wayijarā masa, iti cuto gāna. Jesure güirā ī ware āmorā īre josayijarā īna.

Rudurure Jesús ī yisiore gaye
(*Mr 2.1-12; Lc 5.17-26*)

9 1 Ito yija mūcana cumaju sājayiju Jesús. Ito bajiri itajura gaje ḁuja jēa wacōri ī ya cutoju ejayiju. 2 Ito ī ejaroca rudurure cōrāre īna

jeorona ïre ãmi ejayijarã Jesús tu. “Yũre queno tũorũnurã ñama ïna”, yi ti masicõri ado bajiro yiyijũ Jesús rudurũre:

—Oca s̃oña yũ macũ. Mũ ñeñaro yirise ma mũre ïja, yiyijũ Jesús ïre.

³Ito ï yija tũocõri, ito gãna coriarã judio masa rotirise riasori masa ado bajiro tũoayijarã: “Ito bajiro ï busija, Diore rũcũbuobicũ yami ï”, yi tũoayijarã ïna.

⁴Ito bajiro ïna tũoïrise ti masicõri ado bajiro yiyijũ Jesús ïnare:

—¿No yija ito bajiro ñeñaro tũoïati mũa? ⁵¿Disejũa ñati josasabiti mũa tija? “Mũ ñeñaro yirise coecoajũ”, yũ yija, ¿quena ñarojada mũa tũoïaja? “Wũmũña, wasa”, yũ yija, ¿quena ñarojada? ¿Disejũa ñati josasabiti mũa tija? ⁶Yũ ña Masa Rĩjorũ. Adi sitajũ Dios ï cũre rãca ña yũ. Ito bajiri masa ñeñaro ïna yirisere ãcabojo masia yũ. “Riti Dios ï cũrũ ña mũ”, yũre mũa yi ti masitoni ado bajiro ya yũ rudurũre:

—Wũmũña. Mũ ya cama ãmiña. Mũ ya wijũ tũdi wasa, yiyijũ Jesús.

⁷Ito ï yirocati rudurũ ñabojarũ wũmũyijũ. Ito yicõri ï ya wijũ wacoayijũ ï ïja. ⁸Ï ito bajiro bajija ticõri, gũiyijarã masa. “Adi sita gagũre ï masirise jidicãni Dios”, yi tũoïacõri, Diore rũcũbuoyijarã masa.

Mateore Jesús ï jire gaye

(Mr 2.13-17; Lc 5.27-32)

⁹Itona wacõri yũ Mateo tũre ejaquĩ Jesús. Cũto ñari masare moa ïsigũ ïnare niyeru boca ãmirijũ ñacũ yũ. Yũre ti bujacõri ado bajiro yiquĩ Jesús yũre:

—Yũ rãca waya, yiquĩ Jesús yũre.

Jesús yũre ito bajiro yija tũocõri, ïre sũya wacũ yũ ïja.

¹⁰Yũ ya wijũ ejacũ gãa. Ito ejacõri basũocũ gãa. Niyeru boca ãmi ïsiri masa, ñeñaro yiri masa ñacã ïna cũni gãa rãca barona. Jesús rãca riasotirã cũni ñacã gãa rãca barona. ¹¹Ito bajiro iti bajija ticõri, fariseo gaye tũoïarã gãa rãca riasotirãre ado bajiro seniĩacã:

—¿No yija mũare riasori masũ niyeru boca ãmi ïsiri masa ito yicõri ñeñaro yiri masa rãca bati? yicã ïna.

¹²Ito bajiro ïna yija tũoquĩ Jesús:

—Ñarise mana, cõmena cũni uco masare ãmomenaji ïna. Cõrã riti uco masare ãmarãji ïna. ¹³Dios oca tuti gaye ticõri tũoïaña mũa. Ado bajiro gotia iti. “Gãjerãre mũa tuo maire ãmoa yũ. Gãjerãre tuo maibitibojarãti ecarũre siãcõri yũre mũa soe ïsibojaja ñe waja ma iti”, yi gotia Dios oca tuti, yiyijũ Jesús ïnare. Queno yirãre jirocũ meje adi sita wadicũ yũ. Ñeñaro yirãre ñeñaro ïna yirise jidicãtoni gaje adi sitajũ wadicũ yũ, yiquĩ Jesús ïnare.

Bamenati Diore rũcũbuore gaye

(Mr 2.18-22; Lc 5.33-39)

¹⁴Ito ñana Juan idé guri masũ rãca riasotirã Jesure seniĩarona ï tũ ejacã ïna:

—Gũa ito yicõri fariseo gaye tũoïarã cũni coji ruyabeto Diore rũcũbuorã bamenati ïre rũcũbuocũ gãa. ¿No yija mũ rãca riasotirãma bare bamenati ïre rũcũbuobeati ïna? yicã ïna Jesure.

15 Ìna ito yija t̄ocõri, ado bajiro ìnare goti masioquĩ Jesús:

—¿Sìgũ ì ãmo siari r̄umũ ì r̄ãca wan̄rona ì ji ñucana ì r̄ãca ñabojarocati bojori bujarã yirãjida ìna? Bojori bujamenaji. Yũ baba mesa c̄uni bojori bujamenaji ìna r̄ãca yũ ñarocama. Co r̄umũ yũre ìna ñiaroti r̄umũ ejaro yiroja. Yũre ìna ñiaja ticõri, bamenati yũre yiari Diore senirã yirãji yũ baba mesa, yiquĩ Jesús ìnare.

16 'Saya bucuro iti tadija, mamarona sere wõmenaji mani. Mamarona mani sere wõja t̄uatu wato bucuro tadiroja. Ito bajicõri jaja goje busa tadi waroja ìja. Mame oca yũ riasorise c̄uni bucürã oca r̄ãca t̄uoĩa wisabesa. 17 Ùyé mame ide wecũ wirowo bucũ baju jimenaji mani. Bucũ baju mani jiojama wirowo cuducoaroja. Ito yicõri idire wirowo c̄uni juajijũ godaroja. Ito bajiro uyé mame ide wecũ wirowo mama bajuna jiore ñaroja. Ito yicõri uyé ide, wecũ wirowo c̄uni corocõ ñaro yiroja, yiquĩ Jesús ìnare.

Jairo macore Jesús ì yisiore gaye

(Mr 5.21-43; Lc 8.40-56)

18 Ito bajiro Jesús ì gotiroca riti sìgũ judio masa uju ejaquĩ Jesús t̄u. Jesús riojo ìre r̄ucubuoḡũ ñini r̄ujũquĩ ì. Ito yicõri ado bajiro yiquĩ ì Jesure:

—Janeti yũ maco usi jedicoamo. Iso t̄u ejacõri isore mũ moaiaja t̄udi caticoago yigõji iso, yiquĩ ì Jesure.

19 Ito ì yija t̄ocõri, ìre s̄uya waquĩ Jesús. Ito bajiri gua ì r̄ãca riasotirã c̄uni wacũ. 20 Ito bajiro gua waroca sìgõ romio cõgõ Jesús judojua eja r̄ũgũcõ. Iso ñacõ romia ñarise cõgõ. Itire jua gubojeno rodori cõ ñayijo iso. Jesús judojua ejacõri ì ya yutabuju gaja moaiaçõ iso. 21 “Í ya yutabuju gaja yũ moaiajati caticoago yigoja yũ”, yi t̄uoĩari seyocõ iso. 22 Ito bajiro iso yija t̄uo masicõri, juda r̄ũgũquĩ Jesús. Ito yicõri ado bajiro isore gotiquĩ:

—Oca s̄eoña yũ maco. Yũre tuorũnugõ ñacõri caticoaja mũ ìja, yiquĩ Jesús isore. Ito bajiro ì yirocati tujacoacõ iso ìja.

23 Ito yija bero yoa busari wacõri uju ya wiju ejacu gua. Yujerona basa ìna menija ticũ gua. Ito yicõri ruje masa ìna oca cutirise ruyucũ. 24 Jesús ado bajiro gotiquĩ ìnare:

—Adijure budigoya mũa maji. Adio macoacã cõgõ meje yamo. Canigõ yamo, yiquĩ Jesús ìnare.

Ì ito yija t̄ocõri, ìre ajacã ìna. 25 Masa ìna budigoja bero macoacã t̄u sãja wacõri isore ãmo t̄ua ñiaquĩ Jesús. Ì ito yirocati jaja r̄ujũcõ iso. 26 Ito bajiro Jesús ì yija ticõri, iti sita ñarocõti oca batacũ.

Jũarã cajea timenare Jesús ì yisiore gaye

27 Itoju gua waroca cajea timena jũarã awasã s̄uyacã Jesure:

—Guare ti maiña David ñayoru janerãbatia janami mũ, yicã ìna Jesure.

28 Wiju gua sãja ejaroca ìna jũarã cajea mana c̄uni sãja ejacã. Ito bajiri ìnare ado bajiro seniãquĩ Jesús:

—“Gua ya cajea tiroca yigũ yiguĩji Jesús”, çyi t̄uoĩati mũa? yiquĩ Jesús ìnare.

—Ito bajiroti tuoña yu Uju gua, yicã ñna Jesure.

29 Ñna ito yijare, ñna ya cajeaju moa jeoquĩ Jesús:

—Yure mua tuorũnuro bajiroti mua ya cajea tiroca ya yu, yiquĩ Jesús ñnare.

30 Ito ñ yirocati ñna ya cajeari ticoacã ñna. Ito yicõri sëoro ado bajiro gotiquĩ Jesús:

—Queno tuoñama. Gãjerãre goti batobeja, yiquĩ Jesús ñnare.

31 Ito bajiro ñ yibojarocati yoari mejeti wacõri goti batoyijarã ñna iti sita gãnare Jesús ñ yigorere.

Busibicure ñ busiroca Jesús ñ yire gaye

32 Itijuna ñna wasuoroca coriarã ejaçã masa busibicure ñni ejarã. Rũmũ sãñagũ ñaqui ñ. 33 Jesús rũmũre ñ bucõaja bero busibicu ñnaboraru busisuoqui ñja. Itire ticõri ruju mcacã masa. Ito bajicõri ado bajiro yicã ñna:

—Israel sitaju ado bajirise tiãbiticu gua maji, yicã ñna.

34 Fariseo gaye tuoñarãma ado bajiro yicã:

—Ñniõcũ rũmũa uju ñ masirisena rũmũare bucõami ñni, yicã ñna.

Masare Jesús ñ tuo maire gaye

35 Co cuto ruyabeto gua ejarocõ curi cutori, mutari cutori cuni minijuara wiju masare riasoqui Jesús. “Ñre tuorũnrãre ñ rotiroju miojugu yiguñi Dios”, yire gaye masare riasoqui Jesús. Masa jeyaro ñna ñnarise cutirisere yisioqui Jesús.

36 Masa ñna cõja, ñna bojori bujaja ticõri, ñnare ti maiqui Jesús. Jesús ñ tija oveja uju mana robo bajiro bajirã ñnacã ñna. 37 Ito yija guare ado bajiro yiquĩ Jesús:

—Riti mũare gotia yu. Jaje ote bucua. Ito bajibojarocati coriarãti ñna itire ñmiri masa. 38 Ito bajiri ote ujure seniña, moari masare ñ cõatoni, yiquĩ Jesús guare. Ito bajiro ñ gotija ado bajiro yireoni yiri seyoqui Jesús: Jãjarã ñna maji coji Dios ocare tuoña yimena. Ito bajibojarocati coriarãti ñna ñnare ñ oca gotirona. Ito bajiri Diore seniña jãjarã busa gotiri masare ñ cõatoni.

Jua gubojeno apóstol mesare Jesús ñ besere gaye

(Mr 3.13-19; Lc 6.12-16)

10 1 Ito yicõri gua jua gubojeno ñnarãre jimiojuqui Jesús. Ito bajiro guare jimiojucõri rũmũa sãñarãre bucõa rotiquĩ ñ. Ito yicõri masa jeyaro ñna ñnarise cõrisere guare yisio rotiquĩ ñ. Ito bajiro yicõri cõrãre gua yisio masiroca yiquĩ Jesús.

2 Adocõ ña gua jua gubojeno ñnarã Jesús oca riaso ucutoni ñ cũana. Tite mua. Cajero Simón Pedro wame cutigu ito yicõri ñ ocabaji Andrés, ito bero Santiago, ito bero ñ ocabaji Juan, Zebedeo rãa ñna ñna. 3 Bero Felipe, bero Bartolomé, bero Tomás, ito bero yu Mateo ujarãre yiari waja seni ñsibojacacu, ito bero Santiago, Alfeo macu ñnami. Ito bero Tadeo. 4 Ito bero Simón, celote gaye tuoñagoru ñnami ñ, ito bero susari Judas Iscariote. Ñ ñnami Jesure ñna ñniatoni gotiru.

Dios oca ñna goti ucutoni ĩ rāca riasotirāre Jesús ĩ cōare gaye
(Mr 6.7-13; Lc 9.1-6)

⁵Ado bajiro gua jua gubojeno ñarāre riaso ucu rotiquĩ Jesús:

—Judio masa meje ñna ñari cūtori riaso ucubeja mua. Samaria sita cūtori cūni wabeja mua. ⁶Quenogoroama Israel sita gāna tū wasa. Ñna ñama oveja wisana robo bajiro bajirā. ⁷“Yoari mejeti ĩre tūorñurāre miojugū yigūĩi Dios”, yi riaso ucuba mua. ⁸Rujū jogarāre mua ti bujaja ĩnare yisioba mua. Gājerā gaje ñarise cutirāre cūni yisioba mua. Godanare cūni ñna catiroca yiba. Rūmūa sāñarāre cūni ĩnare bucōama mua. Ito bajiro mua yi masitoni waja manoti mūare jidicā yū. Ito bajiro mūare yū jidicājare mua yirise waja, waja senibeja mua cūni, yiquĩ Jesús guare.

⁹Mua waja niyeru cūjiri, oro cūjiri, cobre cūjiri āmi wabeja mua. ¹⁰Ito yicōri gajeoni sāra bajuri āmi wabeja mua. Coro mua sāñaro riti āmi waja. Gaje guboco mua wasoaroti āmi wabeja. Gajegu turigu āmi wabeja. Diore moa ĩsirā mua ñajare mua riasorājua mūare bare ñna ecaja quena, yiquĩ Jesús guare.

¹¹Jaja cūto jaibiti cūto cūni mua ejaja, yiro bajiro tūoĩagūre āmama. ĩocū mua bujaja ĩ tū canima mua. Iti cūto gānare mua riasoja ĩ tū riti ñama maji, mua waroto riojua. ¹²Wijū mua ejaja, ĩñati mua? yi seniācōri, “Queno ñaña mua”, yiba. ¹³Masa queno mūare ñna boca āmija, ito bajiroti, “Queno ñaña mua”, yi jidicāma ĩnare. Mūare ñna queno boca āmibeja, “Queno ñaña mua”, yi jidicābeja ĩnare. ¹⁴Mūare ñna boca āmi āmobeja, ito yicōri mūare ñna tūo āmobeja, iti wire ñabeja mua. Ito yicōri iti cūto ñabeja mua. Iti cūto jidicā warā mua ya gūbori sūjuri wārisere ja batecāma mua. Ito bajiro mua yija ticōri, “ĩnare queno boca āmibeja mani”, yi tūoĩa masirā yirāji ñna iti cūto gāna. ¹⁵Riti mūare gotia yū. Sodoma ito yicōri Gomorra gāna rēto busaro ñeñaro tōbujarā yirāji ñna masa ñna ñeñaro yirise waja Dios ĩ seniri rūmū, yiquĩ Jesús guare.

Dios oca mua gotija tūo junisinicōri ñeñaro mua
tōbujaroca yirā yirāji, Jesús ĩ yire gaye

¹⁶Yū mūare riaso ucu rotija, oveja robo bajiro yaia wato guijoroju mūare cōa yū. Queno āñare bajiro ñacāña mua. Ito bajibojarocati bujare bajiro queno yirā ñama mua. Itoju mua waroto riojua, “Ado bajiro mani yija quena”, yirona queno tūoĩama maji. Ito bajiri ito gāna mua ejaroca ñeñaro ñna yibojarocati queno yiba mūama ĩnare. ¹⁷Queno tūoĩama mua. Mūare ñiacōri ularā riojo āmi warā yirāji ñna. Ito yicōri minijuara wi cūni mūare bajarā yirāji ñna. ¹⁸Yū ocare mua riasojare gobierno masa ito yicōri cūto gāna ularā riojo mūare āmi warā yirāji ñna. Ito bajibojarocati ñna riojo yū gaye busirā yirāji mua. Ito yicōri judio masa meje ñarāre cūni gotirā yirāji mua. ¹⁹Oca quenori masu riojo mūare ñna āmi ejaja. “¿No bajiro tūoĩa busigutibe yū, yigu yigujada yū?” yi tūoĩa oca jaibeja mua. Mua busiraju iti

ejaja, mua busiroti muare gotigu yiguuji Dios. ²⁰Mua busija muario meje busiraji mua. Mani Jacu i ya usi mua rāca ñajare busirā yirāji mua, yiqui Jesús guare.

²¹Guijorise iti rētaja tirā yirāji mua. Masa ña ñarāreti gājerā ña siatoni ñia rotirā yirāji ña. Ito yicōri jacu mesa gājerā ña siatoni ña rīare ñia rotirā yirāji. Ito yicōri ña rīaju ñare ti junisinicōri gājerāre sīa rotirā yirāji ña. ²²Yu ocare mua goti ucujare, masa jeyaro muare ti tudirā yirāji. Noa yure jidicāmenati jeame ñjuroju ña waborere ñare, masogū yiguuji Dios. ²³Cutoju mua tōbujaroca ña yija, gaje cutoju rudi waja. Riti muare gotia yu. Jeyaro Israel sita gāna cūtori mua wa ucu jeoroto riojuaju, yu Masa Rījoru ejagu yiguja yu, yiqui Jesús guare.

²⁴Sīgū riasotiri masu ñre riasoru rēto busaro masigū mami. Ito yicōri sīgū moari masu i ñju rētogū mami. ²⁵Sīgū riasotiri masu ñre riasorure bajiroti yija quena. Ito yicōri moa isiri masu i ñjare bajiroti yija quena. Yu mua ñjare Beelzebú ña wame yi tudija, yu ñarā mua ñajare buto busa muare busiturā yirāji ña, yiqui Jesús guare.

Diore mani güija quena, Jesús i yire gaye

(Lc 12.2-7)

²⁶Ito bajiro ña busitubojarocati ñare güibeja mua. Ñejua yeyo busire ma Dios i tiro riojo. Ñejua masa ña yeyo masirise ma. Jeyaro ti masiguuji Dios. ²⁷Masa jeyaro tuobeto yu muare gotirise jeyaro masa ña tuotoni goti batoba mua. Muare yu yeyo gotirisere masare jimiojucōri ñare gotiba. ²⁸Mua ya rujure sīarāre güibeja mua. Mua ya usijure sīa masimenaji ña. Diore mua güija quena. I ñami mua ya rujure siacōri mua ya usire jeame ñjuroju cōa masigū. Ñre mua güija quena, yiqui Jesús guare.

²⁹Minia jūarācā waja niyeru cotiacā senirāji ña. Waja mana ña ñabojarocati ña quedi godaja ti masiguuji mani Jacu. ³⁰Manire cūni queno tirūnuami Dios. Mani ya rijoga joa co joa ruyabeto cōia masiguuji Dios. ³¹Ito bajiri tuoia oca jaibitiraja manire. Minia rētoro ñasarā ña mani Dios i tija, yiqui Jesús guare.

“Jesure masigū ña yu”, mua yi bojobeja quena, Jesús i yire gaye

(Lc 12.8-9)

³²Masa tiro riojo, “Jesure tuorūnurā ña gua”, yirāreama yu cūni yu Jacu ũmacūju gagure, “Ña ñama yu ñarā”, yi masigū yiguja yu. ³³Ito bajibojarocati masa tiro riojo, “Jesure masibea yu”, ña yija, yu cūni yu Jacu ũmacūju gagure, “Yu ñarā meje ñama ña”, yi masigū yiguja yu, yiqui Jesús guare.

Yure mua tuorūnaja ticōri, muare ti junisinirā yirāji, Jesús i yire gaye

(Lc 12.51-53; 14.26-27)

³⁴“Sīgūre bajiro tuoīacōri masa ña queno wanu quenatoni wadiñi Jesús”, yi tuoīabesa mua. Ñeñaro yi amorā yu oca tuomenati junisinirā yirāji masa. ³⁵Sīgū yure i tuorūnaja i jacujua ñre tudigu yiguuji. Ito yicōri sīgō yure iso tuorūnaja

iso jacojua isore tudigo yigōji. Ito yicōri sīgō yure iso tuorūnɔja iso mañicō isore tudigo yigōji. ³⁶Ito bajiri sīgū yure tuorūnugū ï ñajare, ï ñarā ñabobarāti ïre ti tudirā yirāji ïna. Ito yicōri ïna ñarā yirāji ï wajana, yiquí Jesús guare.

³⁷No ï jacore ï jacure yure rēto busaro maigū, yu yagu ñado mami ïocū. No ï macore ï macure yure rēto busaro maigū yu yagu ñado mami ïocū. ³⁸“Jesure yu suyaja yucutēojɔ yure jaju sīarā yirāji”, yi tuoia güigū, yu yagu ñado mami ïocū. ³⁹No ï catirise maibojaguti godagu yiguji. Ito bajibobarocati yure tuorūnugū, yu oca ï gotija tuo junisinicōri ïna sīagūama catitīñare gaye bujagu yiguji, yiquí Jesús guare.

Dios tu waja bujare gaye

(Mr 9.41)

⁴⁰No mware boca āmirāti yure cūni boca āmirā yirāji ïna. Ito yicōri no yure boca āmirāti yure cōarure cūni boca āmirā yirāji ïna. ⁴¹No, “Diore goti ïsiri masu ñami”, yi masicōri ïre boca āmirā Dios tu ï bujado bajiroti waja bujarā yirāji ïna cūni. No, “Queno yigu ñami”, yi masicōri ïre boca āmirā, Dios tu ï bujado bajiroti waja bujarā yirāji ïna cūni. ⁴²Riti mware gotia yu. No yure suyārare ñasarā meje ïna ñabobarocati ïnare boca āmicōri ïnare ïna ide ioja, waja bujarā yirāji ïnaōna. “Jesure suyagu ñami”, yi masicōri ïre ïna boca āmija, waja bujarā yirāji ïnaōna, yiquí Jesús guare.

“Jesure titēña”, Juan idé guri masu ï yi ñucare gaye

(Lc 7.18-35)

11 ¹Gua ï rāca riasotirā jua gubojeno ñarāre ito bajiro riaso rotiquí Jesús. Ito bajiro ï goti tíoja bero iti sita cutori masare riaso ucurā wacu gua, Jesure suyārā.

²Iti rumu masare idé guri masu Juan tubiara wiju ñañi. Itoju ï ñaroca Jesús ï masare riaso ucure, ito yicōri tiyamani ï ïore gaye oca ejayiju ïre. Ito bajiri Jesure ïna seniāttoni ï rāca riasotirā jūarāre cōañi Juan. ³Gua tu ejacōri ado bajiro Jesure seniācā ïna:

—¿Muti ñati Cristo Dios ï cōaru? Gāji mu ñajama, ¿gājjijware bocatirātite gua? yi seniācā ïna Jesure.

⁴Ïna ito yija tuocōri:

—Wasa, Juan tu tūdi wasa. Ï tu ejacōri mwa tigure, mwa tuogore cūni gotiba ïre. ⁵Ado bajiro ïre mwa gotire āmoa yu: “Timena cūni ticoa. Wamena cūni wacoa. Rujɔ camí jogarā cūni camí yatico. Tuomena cūni tuocoama. Godana cūni tūdi caticoama. Ito yicōri bojoro bujarā cūni Dios oca quenarise gaye tuo, baji ñañi ïna Jesús ï masirise ï ïojare”, yi gotiba, Juan tu mwa ejaja.

⁶No yure tuorūnugū ï jidicābeja wanɔ quenagū yiguji, yiquí Jesús ïnare.

⁷Ïna waja bero Juan idé guri masu gaye masare gotisuoquí Jesús:

—¿Yucu manojɔ warā ñimure tuoia wacati mwa? ¿Sīgū ũmugū mino iti waja, ue rügögūre tuoia wacatite mwa? ⁸Ïocūre mwa tuoia wabeja, ¿ñari masa ya yutabujuri

sãñagũre tuoĩa wacatite mua? “Quenarise yutabujuri sãñarã ñacã ñna ɛjarã tu ñarã”, yi masia mani. ⁹¿Ñimɛjuare tuoĩa wasacati mua? ¿Diore goti ñsiri masure tuoĩa wacatite mua? Riti muare gotia yu. Gãjerã Diore goti ñsiri masa rëtoro ñagũre tiyja mua. ¹⁰Dios oca tutiju Juan idé guri masu gaye ado bajiro gotia:

Mu riojua oca goti yuri masu cõagũ yiguja yu. Ñti ñami mu ejaroto riojua queno yuri masu, yi gotia Dios oca tuti.

¹¹Riti muare gotia yu. Nijua gãji masu, masa jeyaro wato Juan idé guri masure bajiro ñasagu maquĩji. Ito bajibojarocati Dios ñ rotiroju ñasarã meje ñabojarocati ñna ejaja Juan rëto busaro ñasari masa ñarã yirãji ñna, yiquĩ Jesús masare.

¹²‘Cajero Juan ñ riasosurocaju, ito yicõri adi rumuriju cuni jãjarã ñama Dios ñ rotiroju sãja ãmorã. Jãjarã ñabojama ñna ñeñaro yirise jidicãmenati jore sãja ãmobjarã. ¹³Juan ñ ejaroto riojua, “Ñre tuorũnurãre ñ rotiroju miojugu yiguĩji Dios”, yi tuoĩa yurã busiñi Diore goti ñsiri masa. Dios rotirise ucari masu Moisés ñayoru cuni ito bajiroti busiñi. ¹⁴“Diore goti ñsiri masu Elías wame cutigu goaioğũ yiguĩji”, yi goti yuyijarã ñna. “Juana suoriti goaioami ñna tuoĩa yuru”, mua yi tuoĩaja quena. ¹⁵“Gãmo goje cutirã tuoia mua”, yiquĩ Jesús masare.

¹⁶¿Ñena cõiacõri no bajiro bajiatibe adi rumuri gãna masa, yi cõagũtibe yu? Rĩaca cuto gudareco ñna baba rãca aje rujicõri busi rujirãre bajiro bajiama ñna. ¹⁷“Seru jutia gua. Ito bajibojarocati borobea mua. Bojori bujare basa gua sãabojaja otibea mua”, rĩaca yi ajerã robo bajiro bajirã ñama adi rumuri gãna. ¹⁸Ito bajiro ya mua cuni. Mua ãmoro bajiro gãji ñ yibeja, junisia mua. Juan ñ ejaja ticõri, jeyaro ñ babeja, ɛyẽ ide ñ idibeja ticõri, “Rũmũ sãnarũ ñami ãni”, yicu mua. ¹⁹Ñ bero ejacu yu, Masa Rĩjoru. Yu baja, yu idija ticõri, “Jairo bagu ñami ñ. Ito yicõri idiri masu ñami. Ñeñaro yiri masa baba ñami ãni. ɛjarãre yiari waja seni ñsiri masa baba ñami ñ”, yicu mua yure. Ito bajiro mua yibojarocati Dios masirise mua tuo masi ãmoja, ñre masirãre ñna yigore ticõri tuo masirã yirãji mua, yiquĩ Jesús masare.

Cutori gãna riojo cudimena oca

(Lc 10.13-15)

²⁰Ito bajiro ñ yija bero tiyamani ñ ñora cutori gãnare tuoĩacõri ñnare tudisuoquĩ Jesús. Ñeñaro yirisere ñna jidicãbejare ito bajiro ñnare tudiquĩ Jesús:

²¹—Bujato bujarã yirãji mua Corazín gãna. Bujato bujarã yirãji mua Betsaida gãna cuni. Tiro cuto gãna ito yicõri Sidón cuto gãnare cuni muare tiyamani yu ñocato bajiro ñnare yu ñoja iti rumuju ñna ñeñaro yirisere tuoĩa bojori bujacõri jidicãboana ñna. “Gua ñeñaro yirise jidicã gua”, yirona yutabuju bojori baju sãñaboana ñna. Ito yicõri, “Bojori buja gua”, yirona ñna ya rijogaju õja jeoboana ñna. ²²Riti muare gotia yu. Ñeñaro yirisere mua jidicãbeja, Dios ñ waja seniri rumu Sidón gãna, Tiro gãna rëto busaro ñeñaro tõbujarã yirãji mua. ²³Mua Capernaum

gãna, “Ūmacũju Dios ĩ ñaroju ejacoana mani”, yi tũoĩaboja mua. Ejamenaji mua. Jubeju godana tũju jeame ũjũroju ejarã yirãji mua. Sodoma gãnare tiyamani yũ muare iocato robo bajiro yũ ĩnare ĩoja, ĩna ñeñaro yirisere jidicãboana ĩna. Ito bajiri adi rumũriju cuni ñaboadoja ĩna cuto maji. Tiyamani yũ muare ĩbojarocati ñeñaro mua yirise jidicã ãmobeja mua. ²⁴Riti muare gotia yũ, Dios ĩ waja seniri rumũ Sodoma gãna rẽto busaro ñeñaro tũbũjarã yirãji mua, yiquĩ Jesũs masare.

Yũre mua sũyaja tujacãre gaye bũjarã yirãji mua, Jesũs ĩ yire gaye
(Lc 10.21-22)

²⁵Iti rumũri Diore ado bajiro busiquĩ Jesũs:

—Cũna, ũmacũju gagũ Uju ña mũ. Adi tuti gagũ cuni Uju ña mũ. Mũre rũcũbũoa yũ. Yũ riasorise ñasari masa, bũto tũo masirãre cuni ĩna masibitiroca ya mũ. Ito yicõri yũ riasorise bũto ñasari masa meje, bũto tũo masimenare cuni ĩna tũo masiroca ya mũ. Ito bajiri mũre rũcũbũoa yũ.

²⁶Ito bajiro ya Cũna mũ, mũ ãmoro robo bajiro yigũ, yiquĩ Jesũs Diore.

²⁷Jeyaro yũ yirise, yũ ĩogorise cuni yũ yi masiroca yami yũ Jacũ. Yũ Jacũ sũgũti yũre masiami. Gãjerãma yũre masibeama. Yũ sũgũti yũ Jacũre ti masia. Gãjerãma ĩre ti masimenaji. ĩre masitoni yũ gotirã riti yũ Jacũre masirãji ĩna. ²⁸Moare bogarã, rũcũrise ãmiboja bogarãre bajiro bajirã ña mua yũ tija. Ito bajiri yũre tũorã waya. Muare tujacã rotigũ yigũja yũ. Ito yicõri yũre mua tũorũnũja mua tũoĩa oca sũoroca yigũ yigũja yũ. ²⁹Yũ rotiro robo bajiro cudiya mua. Ito yicõri yũ gaye riasoya. Masare ti maigũ ñari sũoro muare rotibicũja yũ. Uširioro yigũ meje ña yũ. Ito bajiri yũ rotiro robo bajiro mua cudiya ticõri, mua tujacãroca yigũ yigũja yũ. Ito yicõri mua ya usijũ sajari oca cutiro yiroja muare. ³⁰Yũ muare rotirise josari meje ña. Ito bajiri yũ gaye mua cudiya bojori bũjamenati queno wanũ quenarã yirãji mua. Rũcũbiti ũmarã bajiro wanũ quenarã yirãji mua, yiquĩ Jesũs masare.

Jesũs rãca riasotirã trigo ajeri beja ãmicõri ĩna bare gaye
(Mr 2.23-28; Lc 6.1-5)

12 ¹Iti rumũri tujacãra rumũ ñaroca ote wato wacu gua Jesũs rãca. Gua ĩ rãca riasotirã ñiocõcu. Ito bajiri trigo ajeri beja ãmicõri bacũ gua. ²Iti gua baja ticõri, fariseo gaye tũoĩarã ado bajiro yicã Jesure:

—Tite. Mũ rãca riasotirã tujacãra rumũ moare gaye mejeti moama ĩna, yicã ĩna Jesure.

³Ito bajiro ĩna yija tũocõri, ado bajiro cũdiquĩ Jesũs:

—Co rumũ David ñayoru ĩ rãca gãna ñiocõ wana ĩna yigore, ¿Dios oca tuti tiĩabiticati mua? ⁴Ñiocõ wana ñari Dios ya wijũ sãjacõri, ĩre rũcũbũorã gãjerã ĩna cũre naju bayijarã ĩna. Paia mesa riti ĩna baroti ñabojayijũ iti. David mesa ĩna baroti meje ñabojayijũ. ⁵“Paia mesa tujacãra rumũ Dios ya wijũ ĩna tujacãbeja ñeñaro yirã meje yiana ĩna”, yi Moisés ñayoru ĩ ucare gaye, ¿tiĩabiticati mua? ⁶Riti muare gotia yũ. Dios ya wi rẽto busaro ñasagu

ña yu. ⁷Dios oca tuti gaye queno tuoña masibea mua. Ado bajiro gotia iti: “Masa gājerāre queno ti maija quena yure. No yibea ecaru siacōri yure ĩna soe ĩsija”, yi gotia Dios oca. Itire mua tuoña masija, gājerāre ti maicōri, “Īnare seti ña”, yibitiboana mua. ⁸Masa Rĭjoru, Dios ĩ cūru ña yu. Ito bajiri tujacāra rumu gaye yu rotiroti cūni cūquĭ Dios yure, yiquĭ Jesús masare.

Āmo digarure Jesús ĩ yisioire gaye

(Mr 3.1-6; Lc 6.6-11)

⁹Ito yija bero judio masa minijuari wiju wacōri sājacu gua Jesús rāca. ¹⁰Iti wiju ñaquĭ sigū co đuja āmo digaru. “Jesure seti ña”, yirona fariseo gaye tuoārā ado bajiro Jesure seniācā ĩna:

—¿Moisés ñayoru reobisijari tujacāra rumu cōrāre yisioire gaye? yi seniācā ĩna Jesure.

¹¹Īna ito yija tuocōri:

—¿Sigū mua ya ecaru ĩ rujaraju ĩ queda roaja āmirā wamenajida mua? Tujacāra rumu ñabojarocati mua ya ecaru ĩ queda roaja ĩre āmirā warāji mua. ¹²Ecaru rēto busaro ñasagu ñami masu. Ito bajiri tujacāra rumure cūni gājire mani ejabuaja quena, yiquĭ Jesús fariseo gaye tuoārāre.

¹³Ito yija āmo digarure ado bajiro yiquĭ Jesús:

—Mu ya āmo ñujoya ĩja.

Ī ñucōarocati jajacoacu ĩja, gaje đuja ricare bajiroti. ¹⁴Ito ĩ yija ticōri, budi wacā fariseo gaye tuoārā. “¿No bajiro yicōri Jesure sĭarujati mani?” yi tuoña busiri seyocā ĩna.

Ado bajiro ñagū yiguĭji Jesús, yi tuoña yure gaye

¹⁵Ito bajiro ĩna tuoĭaja, tuo masicōri gajerojua waquĭ Jesús mucana. Gua cūni ĩ rāca wacu. Jesús ĩ waja ticōri, jājarā masa sūya wacā gua rāca. Ito ĩ waroju ñajediro masa cōrāre yisioquĭ Jesús. ¹⁶Ito yicōri, “Āniti guare yisioquĭ”, yibeja mua, yiquĭ ĩ ĩnare. ¹⁷Isaías ñayoru Diore goti ĩsiri masu ĩ goticādo bajiroti rētacu iti. Ado bajiro goti ucayoñi Isaías ñayoru:

¹⁸Āni ñami yure moa ĩsiri masu yure cudigu. ĩre besecu yu. ĩre maia yu, ito yicōri ĩre wanua yu. Yu ya usi ĩre queo sāgū yiguja yu.

“Masa ĩna ñeñaro yirise waja senigū yiguĭji Dios”, yi masare goti batogu yiguĭji ĩ.

¹⁹Masare oca josabicu yiguĭji ĩ. Ito yicōri masare ma gudareco eja rūgūcōri awasā gotibicu yiguĭji ĩ.

²⁰Yure queno tuorūnusamenare cūni ĩnare cōabicu yiguĭji. Yure queno tuorūnusamenare ĩnare ejabuagu yiguĭji ĩ, yure ĩna queno tuorūnutoni. Ito bajiro ñagū yiguĭji ĩ, masa jeyarore yu ti beseri rumu iti ejarocaju.

²¹“Īti ñami masare masorocu Dios ĩ cōaru”, yi tuoña wanu yurā yirāji masa jeyaro, yi gotia Dios oca tuti, yiquĭ Jesús fariseo gaye tuoārāre.

Rūmúa ɯɟu rotirise boca āmicōri yami Jesús, ĩna yire gaye
(Mr 3.20-30; Lc 11.14-23; 12.10)

22 Ito yija bero sīgũre Jesús tũ āmi ejacã ĩna. Ĩ ñaquĩ tibicũ, busibicũ cuni. Rūmú sãñagũ ñari ito bajiro ñabojaquĩ ĩ. ĩre yisioquĩ Jesús. Ito bajiri tibicũ ñabojaru tiquĩ ĩja. Ito yicōri busibicũ ñabojaru busicoaquĩ ĩja.
23 Itire ticōri masa jeyaro ɯcacã:

—¿David ñayoru janerābatia janamiti ñati āni? yi tũoĩacã masa.

24 Ito bajiro masa ĩna yija tũocōri, ado bajiro yicã fariseo gaye tũoĩarã:
—Rūmúare ĩ bucōaja rūmúa ɯɟu Beelzebú wame cõtigu ĩ masirisena rūmúare bucōami ĩ, yicã ĩna.

25 Ito bajiro ĩna yi tũoĩarise ti masicōri ado bajiro yiquĩ Jesús ĩnare:
—Cũtori gãna ɯjarã gãmeri ĩna junisiniya queno cũto ña rujeabetoja. Co cũto gãna, co wi gãna cuni ĩna gãmeri junisiniya, queno ña masimenaji ĩna.
26 Ito bajiro rūmúa ɯɟu rūmúare ĩ bucōaja queno ña masibiquĩ ĩ. Ito bajiro ĩ yija queno roti masibiquĩ ĩja. 27 “Beelzebú wame cõtigu ĩ ejabuarisena rūmúare bucōami ĩ”, yiboja mua yũre. Ito bajiro mua yũre yi tũoĩabojaja, “Rūmú ĩ ejabuarise rãca bucōama gua rãca gãna”, yirãre bajiro ya mua. “Tũoĩa wisarã ya gua”, yi tũoĩarɯja mũare. 28 Rūmúare yũ bucōaja Espĩritu Santona suoriti bucōa yũ. Ito bajiro yũ yija, “Diore tũorũnrãre ĩ miojuri rũmũ eja waju ĩja”, yi masirã yirãji mua, yiquĩ Jesús ĩnare.

29 Sīgũ gãji sēogũ ya wi sãjacōri ĩre siabicũti gajeoni ĩma masibiquĩ ĩ. ĩre ĩ siaja beroju gajeoni ĩma masiguĩ ĩ. Rūmúa ɯɟu rētoro masigũ ña yũ. Ito bajiri rūmúare bucōa yũ, yiquĩ Jesús fariseo gaye tũoĩarãre.

30 Yũ robo bajiro tũoĩamena yũre tũo terã ñama ĩnaõna. Yũre ejabuabicũ yũre ñeñaro yami ĩocũ, yiquĩ Jesús ĩnare.

31 Riti mũare gotia yũ. Masa ĩna ñeñaro yija, ito yicōri ñeñaro ĩna busija cuni, ĩnare ācabojo masiguĩ Dios. Espĩritu Santore ĩna busituja, itireama ĩnare ācabojo masibiquĩ Dios. 32 Yũ ña Masa Rijorũ. No yũre ĩ busituja, ĩocũre ācabojo masiguĩ Dios. Ito bajibojarocati, no Espĩritu Santore ĩ busituja itireama ĩre ācabojo masibicũ yiguĩ Dios. Adi tutire ũmacũju Dios ĩ ñarõju cuni ācabojo masibicũ yiguĩ Dios, Espĩritu Santore masa ĩna busituja, yiquĩ Jesús fariseo gaye tũoĩarãre.

Ricana suoriti yucũgure ti masia mani, yi Jesús ĩ riasore gaye
(Lc 6.43-45)

33 Yucũgu quenaricũ iti ñaja, quenarise rica cũtiro yiroja. Yucũgu ñeñaricũ iti ñaja, ñeñarise rica cũtiroja. Ricaju ticōri, “Adigu ña quenarise rica cũtiricũ, adigu ña ñeñarise rica cũtiricũ”, yi ti masia mani. 34 Ñeñaro busirã mua ñajare ãña juniro bajiro baja mua ya rise. Ñeñaro riti yirã ñari quenarise busi masimenaji mua. Mani ya ɯsi iti tũoĩaro bajiroti busia mani. 35 Sīgũ queno yigũ quenarise busigu yiguĩ, ĩ ya ɯsi iti tũoĩaro bajiroti. Ito yicōri ñeñaro yigũ, ĩ ya

usi ñeñaro iti tʷoĩaro bajiroti ñeñarise busigu yiguĩji ĩ. ³⁶Riti mʷare gotia yʷ. Dios ĩ waja seniri rʷmʷ rocati mani busiado bajiroti manire waja senigũ yiguĩji. ³⁷Mani busi wado bajiroti waja senigũ yiguĩji Dios. Queno yirã mani ñaja, “Queno yirã ñama ña”, yigʷ yiguĩji Dios manire. Ito yicõri ñeñaro yirãreama, “Seti cutirã ñama”, yigʷ yiguĩji Dios, yiquĩ Jesús fariseo gaye tʷoĩarãre.

Tiyamani mʷ ïore ãmoa gʷa, yi ñna senire gaye

(Mr 8.12; Lc 11.29-32)

³⁸Ito ĩ yija bero, ado bajiro seniĩacã fariseo gaye tʷoĩarã, ito yicõri judio masa rotirise riasori masa cʷni:

—Riasori masʷ, tiyamani mʷ ïore ãmoa gʷa, yicã ñna Jesure.

³⁹Ito yija ado bajiro ñnare cʷdiquĩ Jesús:

—Ñeñaro yirã ito yicõri yʷre tʷorũnʷmena cʷni, tiyamani yʷ ïore ãmoama ñna. Ito ñna yibojarocati ñnare ïoado ma yʷ. Jonás ñayorʷ Diore goti ĩsiri masʷ ĩre rêtare gaye riti ñnare goticʷja yʷ. ⁴⁰Ado bajiro rêtayijʷ Jonásre: ʷdia rʷmʷ, ʷdia ñami wai jaigʷ totijʷ ñabojayijʷ. Ito bajiroti yʷ cʷni Masa Rijorʷ ñami ʷdia ñami ʷmʷa ʷdia rʷmʷ ñagũ yigʷja yʷ sita watojʷ. ⁴¹Nĩnive cʷto ñayoana Dios ĩ waja seniri rʷmʷ mʷcana tʷdi catirã yirãji. Tʷdi caticõri, “Mʷare seti ña”, yirã yirãji adi rʷmʷri gãnare. Nĩnive cʷto gãna ñayoana Jonás ñayorʷ Dios oca ĩ gotija tʷocõri, ñeñaro ñna yirisere jidicãyijarã ñna. Ito yicõri mama usi wasoayijarã ñna. Jonás ñayorʷre ñna tʷorũnʷjare, tʷdi caticõri, “Mʷare seti ña”, yirã yirãji ñna adi rʷmʷri gãnare. Yʷ ado mʷa rãca ñagũ Jonás ñayorʷ rëto busaro ñasagu ña yʷ. Ito bajibojarocati yʷre tʷorũnʷbea mʷa. ⁴²Rocajʷ gago ʷjo ñayoro Dios ĩ waja seniri rʷmʷ mʷcana tʷdi caticoo gʷo yigõji iso. Mʷcana tʷdi caticõri adi rʷmʷri gãnare, “Mʷare seti ña”, yigo yigõji iso. “Salomón queno masigũ ñayijʷ”, yija tʷocõri, sõjʷ gago wadicõri ĩ tʷ ejayijo iso. Ito bajiri adi rʷmʷri gãnare, “Mʷare seti ña”, yigo yigõji iso. Yʷ ado mʷa rãca ñagũ Salomón rëto busaro ñasagu ña yʷ. Ito bajibojarocati yʷre tʷorũnʷbea mʷa, yiquĩ Jesús fariseo gaye tʷoĩarãre.

Masʷre budigocõri mʷcana tʷdi rʷmʷ ĩ sãjare gaye

(Lc 11.24-26)

⁴³Rʷmʷ sīgũre ĩ budija, ide manojʷ tuja ãmogũ ãma ucuguĩji. ĩ bujabeja ado bajiro tʷoĩagũ yiguĩji: ⁴⁴“Yʷ budigoadojʷ tʷdi warʷja yʷre”, yi tʷoĩaguĩji. ĩ budigorʷre mʷcana tʷdi ĩ ejaja, queno wi ʷeri mani wi, queno carari wi robo bajiro ti ejagu yiguĩji. ⁴⁵Ito bajiro ĩre ti ejacõri jʷa ãmojeno rʷmʷa ĩ rëto busaro ñeñaro yirãre ãmi ejagu yiguĩji ĩ. Ito yicõri ñna ñarocõti ʷmʷgũre sãjarã yirãji ñna. Ito bajiro ñna sãjare bʷto busa ñeñaro yigʷ ñagũ yiguĩji ʷmʷgũ ĩja. Ito bajiroti rëtaro yiroja adi rʷmʷri gãna ñeñaro yirãre cʷni, yiquĩ Jesús fariseo gaye tʷoĩarãre.

Jesús i ñarā ado bajiro bajiana, yire gaye
(*Mr 3.31-35; Lc 8.19-21*)

46 Jesús masare i busiroca riti i jaco i ocabaji mesa rāca macūju eja rūgūcā ña. Jesure busirona ñe ji bucōbojacā ña. 47 Sīgū ñe jigū ado bajiro yiquī i Jesure:
—Mu jaco, mu ocabaji mesa rāca ado macūju ñama. Mu rāca busi
āmoama ña, yiquī i Jesure.

48 Ito i yijare ado bajiro cūdiqū Jesús:

—¿Ñimo ñati yu jaco, ito yicōri noa ñati yu ocabajirā? yiquī Jesús ñe.

49 Ito yija gua i rāca riasotirāre ticōri:

—Āna ñama yu ñarā, ito yicōri yu jacore bajiro bajirā. 50 Noa yu Jacu ūmacūju gagū i rotiro bajiro yirā, ña ñama yu ocabajirāre bajiro bajirā, ito yicōri yu jacore bajiro bajirā, yiquī Jesús ñe.

Oteri masu gaye Jesús i goti masiore oca gaye
(*Mr 4.1-9; Lc 8.4-8*)

13 1 Iti rāmūti wire budi wacōri, itajura tūnima rujicu gua Jesús rāca. Ito bajiro yicōri masare riasoqū Jesús. 2 Masa jājarā busa ña minijua wadija ticōri, cumaju sājacōri rujiqū Jesús. Masa minijuacāna jajūju riti tujacā ña. 3 Ito yija goti masiore ocana masare riasoqū Jesús.
Ado bajiro riasoqū i:

—Sīgū wesecaju i ya ote ajeri otegu wayijū i. 4 Weseca ejacōri iti ajerire i wējabateroca, gaje ajeri majū quedi queayijū. Ito bajiri minia ejacōri itire ba batecōyijarā. 5-6 Ito yicōri gaje ajeri gūta watoju quedi queayijū. Queno sita mañijū. Ito bajiri judiboja, yoari mejeti siniacoayijū iti ūmacañi jeana, sita jōrecōri. Ito yicōri ñemari iti manijare siniacoayijū iti. 7 Ito yicōri gaje ajeri jota watoju quedi yijū. Ito bajiri jota mari itire dūrea siacōyijū. 8 Gaje ajeriana sita quenaro quedi queayijū. Iti judi mājacōri queno rica cutiyijū. Coria sarari cien ñari ajeri rica cutiyijū. Gaje sarari setenta ñaricari, gaje sarari treinta ñaricari rica cutiyijū. 9 Mūa gāmo goje cutija, yu busirisere tuo masiña mūa, yiquī Jesús masare.

¿No yija goti masiore ocana masare riasoati mu? ña yi seniāre gaye
(*Mr 4.10-12; Lc 8.9-10*)

10 Ito bajiro Jesús i yija tuocōri, ado bajiro seniāre gua i rāca riasotirā:
—¿No yija goti masiore ocana masare riasoati mu? yicu gua ñe.

11 Ado bajiro guare cūdiqū i:

—“Ñe tuorūnūre i rotiroju miojugū yiguīji Dios”, yi gājerā ña tuoābitire mūa masiroca yami i. Gājerāreama ña masiroca yibeami Dios. 12 No ñe tuorūnūgūre jai busaro tuo masire gaye jidicāgū yiguīji Dios ñe. Ito bajiri jai busaro masigū yiguīji i. No ñe tuorūnūbicare jabetacā i tuoābojarisere ēmacōgū yiguīji Dios ñe. Ito bajiri ñe tuoāre mano tujagu

yiguĩji ĩ. ¹³Ito bajiri masare tuo masire ocana ĩnare riasoa yu. Tibojarāti timenare bajiro ñama ĩna. Ito yicōri tuobojarāti tuomenare bajiro ñama ĩna. Ito bajiri Dios ocare tuobojarāti, “Ito bajiro yireoni ñaroja iti”, yi tuoĩa masibeama ĩna. ¹⁴Ito bajiro ĩna bajija Diore goti ĩsiri masu Isafas ñayoru ĩ gotiadi bajiroti rēta. Dios oca gotigu ado bajiro ucayoñi Isafas ñayoru:

Yure tuobojarāti itire tuo masimena yirāji muu. Tibojarāti, “Ito baja”, yi masimena yirāji muu.

¹⁵Adocāta gāna yu tuoĩaro bajiro ĩna ya usina yure tuoĩa āmobeama ĩna. Tuobojarāti ñeñaro tuo godu weorāji. Ito yicōri tibojarāti bibicāna bajiro bajiamu ĩna. Yu ĩbojarise ti āmobeama. ĩna ya gāmo gojena tuo āmobeama ĩna. ĩna ya usina tuo masi āmobeama ĩna. Ito yicōri yure yisio rotirā ejamena yirāji ĩna, yi gotiami Dios, yi ucayoñi Isafas ñayoru, yiquĩ Jesús guare.

¹⁶Queno wanurā ña muu. Yure ticōri ti masia muu. Ito yicōri yure tuocōri tuo masia muu. ¹⁷Riti muare gotia yu. Jājarā Diore goti ĩsiri masa ñayoana, queno yirā ñagoana cūni muu tirisere ti āmobjayijarā ĩna. Ito bajibojarocati tibisijarā ĩna. Muu tuorise cūni tuo āmobjayijarā. Ito bajibojarocati itire tuobisijarā ĩna, yiquĩ Jesús guare.

Ado bajiro baja oteri masu ye, yi Jesús ĩ goti quenore gaye

(Mr 4.13-20; Lc 8.11-15)

¹⁸“Oteri masu sigũ ado bajiro bajiyijũ”, yirocu muare gotibu yu. Ito bajiri adocāta muare goti rētobugu ya yu, muu queno tuo masitoni. Queno tuo ya muu. ¹⁹“Īre tuorũnurāre ĩ rotiroju miojugu yiguĩji Dios”, yire gaye oca tuobojarāti, itire queno tuo masimenaji gājerā. ĩna ñama ĩ otegu waroca majũ quedira ajeri robo bajiro bajirā. Dios oca tuobojarocati ĩna ācabojaroca yami rūmú. ²⁰Coriarā Dios oca tuocōri queno wanure rāca boca āmibojarāti yoari mejeti jidicārāji ĩnaõna. ĩna ñama gũta watoju sita jōreroacā quedira ajeri robo bajiro bajirā. ²¹Queno Dios oca tuo ñiabiticōri, yoari mejeti jidicārā yirāji ĩna. “Dios ocare yu tuorũnuja ticōri, yu tōbujaroca yama gājerā. ¿No yija Dios ocare tuorũnuatibe yu?” yi tuoĩa bojori bujarā yirāji ĩna. Ito bajiri ĩ ocare jidicārā yirāji ĩna. ²²Gājerāma Dios oca tuo ñiabojarāti buto adi sita gaye tuoĩa usirioama ĩnaõna. ĩna ñama jota wato quedira ajeri robo bajiro bajirā. Buto gajeonire tuoĩa āmosacōri queno Dios ocare tuo suyabeama ĩnaõna. Ito bajiri Dios ĩ āmoro bajiro queno yi masimena yirāji ĩna, ito yicōri ĩre queno moa ĩsimenaji ĩna. ²³Gājerāma Dios oca tuocōri queno tuo ñiarā yirāji. ĩna ñama sita quenariseju quedira ajeri robo bajiro bajirā. Ito bajiri Dios ĩ āmoro bajiro yirā yirāji ĩna. ĩna ñarā yirāji cien rica cutiri sara robo bajiro bajirā. Ito yicōri gājerā sesenta rica cutiri sara robo bajiro bajirā, gājerāma treinta rica cutiri sara robo bajiro bajirā yirāji ĩna, yiquĩ Jesús guare.

Ote quenarise wato ta widirise judire oca

²⁴Mucana gaje goti masiore ocana masare gotiquĩ Jesús:
—“Íre tuorũnũrãre ruyuriogũ yiguĩji Dios. Íre tuorũnũrãre riti ĩ rotiroju miojugũ yiguĩji”, yirocũ goti masiore ocana masare gotiquĩ Jesús: “Íre tuorũnũrãre ĩ rotiroju miojugũ yiguĩji Dios”, yire oca masare mani riasoja, ado bajiro baja iti. Tũote mũa. Sĩgũ ĩ ya wesecaju ĩ ya ote ajeri quenarise oteyijũ. ²⁵Í oteja bero ĩ caniroca ĩ ya weseca ejacõri ta widirise oteyijũ ĩ wajacu. Ito yicõri wacoayijũ ĩ. ²⁶Ito bajiri ote bucua mũa wato ta widirise cũni goayijũ. ²⁷Ito bajija ticõri, ĩ ya moari masa ĩre gotirã wayijarã. ĩ tũ ejacõri ado bajiro yiyijarã ĩna: “¿Gũa ƣjũ ote quenarise riti otebojacati mũa? ¿No yija ito bajibojarocati ta widirise wũsari?” yiyijarã ĩna ƣjũre. ²⁸Ito ĩna yijare: “Sĩgũ yũ wajacu oterũ”, yiyijũ ĩ ĩnare. Ito ĩ yijare: “¿Adocãta ta widirise gũa wãjagore ãmoati mũa?” yĩ senĩayijarã ĩna ƣjũre. ²⁹“Wãjabeja. Mũa wãjaja, ote rãcati wãjarã yirãji mũa. ³⁰Adocãta ote rãca cocati bucuaocõjaro maji. Iti rica cutiroca mũare wãja roticũja yũ maji. Ito yicõri itire soeja quenaroja. Ito bero rica ãmicõri rica cũadoju mũare seo roticũja yũ”, yiyijũ oteri masũ ĩ ya moari masare, yĩ riasoquĩ Jesús masare.

Ado bajiro baja mostaza ajeri, yĩ Jesús ĩ riasore gaye (Mr 4.30-32; Lc 13.18-19)

³¹Mucana gaje goti masiore ocana ado bajiro masare gotiquĩ Jesús:
—“Íre tuorũnũrãre ĩ rotiroju miojugũ yiguĩji Dios”, yire oca masare mani riasoja, ado bajiro baja iti. Tũote mũa. Sĩgũ ĩ ya weseca mostaza ajeri oteyijũ. ³²Gaje ote ajeri rẽtoro mutacã busa ña iti mostaza ajeri. Ito bajiro mutacã ñabobaroti bucua wato gaje ote yucuri rẽto busaro jajocũ ñaroja itigu. Jajocũ itigu ñajare itigu rũjũrijũ minia jibũ menirãji ĩna. Itire bajiroti Dios mani ƣjũ ĩ ñaja, gãjerãre goti ãmorãji mani, jãjarã busa ĩre masirã ĩna ñatoni, yĩ riasoquĩ Jesús masare.

Ado bajiro baja naju wadarise uco, yĩ Jesús ĩ riasore gaye (Lc 13.20-21)

³³Mucana gaje ado bajiro goti masiore ocana riasoquĩ Jesús:
—“Íre tuorũnũrãre ĩ rotiroju miojugũ yiguĩji Dios”, yire oca masare mani riasoja, ado bajiro baja iti. Tũote mũa. Romio pan menigõ waco udia coacõ pan menire gaye ãmiyijo iso. Ito yicõri wadarise uco wũoyijo iso. Ito bajiri iso wũoja jairo wadayijũ iti. Itire bajiroti bajiro yiroja, “Íre tuorũnũrãre ĩ rotiroju miojugũ yiguĩji Dios”, masare mani yĩ riaso ucuja. Ito bajiri jãjarã busa ĩre tuorũnũ warã yirãji ĩja, yĩ riasoquĩ Jesús masare.

Goti masiore ocana Jesús ĩ riasore gaye

(Mr 4.33-34)

³⁴Masare riasogũ goti masiore ocana riti ĩnare riasoquĩ Jesús. ³⁵Ito bajiro masare ĩ riasoja Diore goti ĩsiri masũ ĩ goticãdo bajiroti rĕtacũ. Ado bajiro gotiyoĩ ĩ:

Goti masiore ocana riti masare gotigũ yiguĩji ĩ. Ito yicõri adi macãrucũro rujeoroto riojũa gaye masa ĩna masibitire gotigũ yiguĩji, yi ucaĩni Diore goti ĩsiri masũ ñayorũ yũre tũoĩa yugũ, yiquĩ Jesús masare.

Ote quenarise wato ta widirise judire oca, Jesús ĩ goti quenore gaye

³⁶Ito bajiro masare yi goti tĩocõri, “Wajũ”, yiquĩ Jesús. Ito bajiro yicõri wijũ maja ejacõri sãja waquĩ Jesús. Wijũ sãja ejacõri ado bajiro seniãcũ gũa ĩ rãca riasotirã:

—Ta widirise gaye mũ goti quenore ãmoa gũa, yicũ gũa Jesure.

³⁷Ito bajiro gũa yija, ado bajiro guare gotiquĩ Jesús:

—Ote quenarise otegũ yũti ña Masa Rĩjorũ. ³⁸Ĩ otero ĩ ya weseca bajiro bajia ado mani ñarojũ. Ote quenarisere bajiro bajirã ñama masa Diore tuorũnurã. Ta ñeñarisere bajiro bajirã ñama masa rũmũ ñarã. ³⁹Ta widirise ote rudirũ ĩti ñami rũmũ. Ote bucuariju ĩna ãmireoniti ña adi macãrucũro iti jedirijũ. Ote bucuaroca miorãõnati ñama ángel mesa. ⁴⁰Ta widirise ãmicõri ĩna soeado bajiro bajia macãrucũro iti jedirijũ. ⁴¹Yũ ña Masa Rĩjorũ. Ángel mesare cõagũ yigũja yũ, ñajediro ñeñarisere ĩna besecõatoni. Ñeñaro yirãre cũni besecõarã yirãji ĩna, Dios ĩ rotirojũ ĩna ejabe yirona. ⁴²Ĩnare besecõri jeame ãjũroju ĩnare cõarã yirãji ĩna. Ito jeame ãjũroju ejacõri ñeñaro tõbujarã yirãji. Ito bajiri oticõri buto tũoĩa oca jairã yirãji ĩna. ⁴³Dios ĩ rotiro bajiro yirã mani Jacũ ĩ rotiroju ejacõri, ũmacañi busuro bajiro busu ñarã yirãji ĩna. Mũa gãmo goje cutija, yũ busirisere tuo masiña mũa, yiquĩ Jesús guare.

**Dios ĩ rotiroju mũa eja ãmoja ado bajiro tũoĩaja
quena, yi Jesús ĩ riasore gaye**

⁴⁴“Dios ĩ rotiroju mũa eja ãmoja, ñeñaro yirise jidicãcõri ĩre riti tuorũnurã yirãji mũa”, yirocũ ado bajiro riasoquĩ Jesús guare: Sĩgũ gãji ye bũto waja cutirise sita watoju ĩ yeyobojare bujayijũ. Itire bujacõri mucana itijũti tũdi yeyocũ remoyijũ ĩ. Ito bajiri itire wanũgũ, ĩ gajeoni cutirise ñarocõti gãjerãre ĩsi jeocõyijũ ĩ niyeru bujarocũ. Iti niyeru bujacõri iti sita ãjũre waja yirocũ yiyijũ ĩ. “Sita bujacõri sita wato yeyore cũni bujagũ yigũja yũ”, yirocũ iti sita ãjũre waja yiyijũ ĩ. Dios gaye quenarise mũa buja ãmosaja, ĩre riti tuorũnurã yirãji mũa, yi riasoquĩ Jesús guare.

**Dios ye quenarise mua āmoja ĩre riti tuorũnu
suyaja quena, yi Jesús ĩ riasore gaye**

45 “Dios ĩ rotiroju mua eja āmoja, ñeñaro yirise jidicācōri ĩre riti tuorũnurā yirāji mua”, yirocu ado bajiro riasoquĩ Jesús guare: Sīgũ ñaque buto waja cutirisere āmagũ ñayiju. Iti ñaque perla wame cutirise ñayiju. 46 Iti ñaquere buto āmoyiju ĩ. Ito bajiri, ĩ gajeoni cutirise ñarocōti ĩsi jeocōyiju ĩ, gājerāre niyeru bujarocu. Ito yicōri iti ñaquere āmosacōri waja yirocu yiyiju ĩ. Dios gaye quenarise mua buja āmoja, ĩre riti tuorũnu suyaja quena, yi riasoquĩ Jesús guare.

Wai quenarāre ado bajiro beseama wai jori masa, yi Jesús ĩ gotire gaye

47 “Ado bajiro baja Dios rotiroju ĩre tuorũnurāre ĩ miojuri rambu”, yirocu guare riasoquĩ Jesús: Gājerā wai wayari masa yorigu cōacōri wai jeyarore āmiyijarā ĩna. 48 Jājarā wai bujacōri jajuju ĩnare mocūyijarā ĩna. Jajuju ĩnare mocūcōri ĩnare beseyijarā ĩna. Quenarāre jibuju miosāyijarā ĩna. Gājerā ñeñarāreama cōa roacōyijarā ĩna. 49 Ito bajiroti bajiro yiroja macārucūro iti jediri rambu. Ángel mesa quenarāre beserā yirāji ĩna. 50 Besecōri ñeñarāreama jeame ĩjuoroju cōarā yirāji ĩna. Ito jeame ĩjuoroju ejacōri ñeñaro tōbujarā yirāji. Ito bajiri buto tuoia oticōri oca jairā yirāji ĩna, yiquĩ Jesús guare.

Bucu oca, mame oca Dios gaye bese masirā ña mua, yi Jesús ĩ riasore gaye

51 Ito yija ado bajiro seniāquĩ Jesús guare:

—¿Iti jeyaro muare yu gotirise tuo masicuati mua? yiquĩ Jesús.

—Tuo masia, yicu gua ĩre.

52 Gua ito bajiro yija, ado bajiro cudiquĩ ĩ guare:

—Mua coriarā iti ramuju maji, bucurā oca riasori masa ñayijarā.

Adocātama yu rāca riasotirā ña mua. “ĩre tuorũnurāre ĩ rotiroju miojugu yiguji Dios”, yire oca yu rāca riasoticōri juaji masire gaye ña muare. Dios oca, bucu mua tuogore cuni ña muare. Bucu oca, Dios oca mame cuni masia mua. Ito bajiri gajeoni seoraju bucu gaye mame gaye cuni bese masirā bajiro bajirā ña mua, yiquĩ Jesús guare.

Nazaretju Jesús ĩ ware gaye

(Mr 6.1-6; Lc 4.16-30)

53 Ito bajiro guare goti masiore ocana ĩ gotija bero Jesús rāca wacu gua mucana. 54 Wacōri ĩ ya sita eJacu gua. Minijuara wiju ejacōri masare riasoquĩ Jesús. Queno ĩ riasoja tuocōri, ucacā masa. ĩre tuocōri ado bajiro yicā ĩna:

—¿Iti ĩ riasorise noju riasotiyijaribe āni? ¿Ito yicōri no bajiro tiyamani gaye ioati? 55 Adi sita gagu cumu jāi moari masu macu ñami āni. Ito yicōri María macuti ñami āni. Santiago, José, Simón, Judas rījoruti ñami āni. 56 Ito yicōri ĩ ñarā romia ado mani wato ñama ĩna. ¿No bajiro iti gaye masiati āni? yicā ĩna ĩ ya cuto gāna.

⁵⁷ Ìna ya sita gaguti ì ñajare queno ìre tuorũnubiticã ìna. Ado bajiro ìnare gotiquĩ Jesús:

—Dios oca goti ìsiri masure rũcũbuorã yirãji masa. Ito bajibojarocati ì ya sita gãna, ì ya wi gãna cuni ìre rũcũbuomena yirãji, yiquĩ Jesús masare.

⁵⁸ Ì ya sita gãna ìre ìna queno tuorũnubejare, jaje tiyamani ìo jeobitiquĩ iti cutore.

Juan idé guri masu ì godare gaye

(Mr 6.14-29; Lc 9.7-9)

14 ¹Iti rumuriti Galilea gagu wju, Herodes wame cutigu Jesús gaye oca tuoyiju. ² Ì rãca ñarãre ado bajiro yiyiju Herodes, Jesure tuoia wacu:

—Juan idé guri masuti ñaguiji mucana. Godabojaguti tadi catiguji. Ito bajiri tiyamani gaye ìoguiji ì, yi tuoĩabojayiju Herodes.

³⁻⁴ Ì Herodes ì ocabaji Felipe manojore emayiju. Iso ñayijo Herodías wame cutigo. Ado bajiro yiyiju Juan Herodesre:

—Isore manajo cutibitiruja mre, yibojayiju Juan Herodesre. Ìre tuo amobisiju ì. Ito bajiri Juanre tubia rotiyiju Herodes. Ito yicõri come misina ìre sia rotiyiju ì.

⁵ Juanre sia amobojayiju Herodes. “Diore goti ìsiri masu ñami Juan”, masa ìna yi rũcũbuoia tuocõri, giuyiju ì. Ito bajiri Juanre sia rotibisiju Herodes. ⁶ Herodes ì joeara rodo gãni bia ejayiju. Ito bajiri masare oca cõayiju ì, ìna basa titoni.

Iti rumu rujarumu Herodías maco masa riojo basayijo. Iso basaja ticõri, buto wanuyiju Herodes. ⁷ Ito bajiri: “No amõrise mu senija, yiro roboti mre jidicãcujaja yu”, yiyiju Herodes isore. ⁸ Ito bajiro ì yija tuocõri, “¿No bajiro amoati cana mu?” yigo wayijo iso jacore. Jaco iso gotija tuocõri, ado bajiro yiyijo iso Herodesre:

—Juan idé guri masu ya rijoga jatacõri somotõroju jeocõri ìsiña yure, yiyijo iso Herodesre.

⁹ Ito bajiro iso yija tuocõri, bojori bujayiju Herodes. Masa ìna tuoro riojo, “Yiro bajiroti mre ìsicujaja yu”, ì yire ñajare, ito bajiroti rotiyiju ì ya moari masare. ¹⁰ “Tubiara wiju Juanre rijoga jata amitẽna”, yiyiju Herodes ì ya moari masare. ¹¹ Ì ya rijoga jata amicõri somotõroju jeocõri mamore ìsiyijarã ìna. Ito yicõri isoju jacore rẽto ìsiyijo ìja.

¹² Iti oca tuocõri Juan rãca riasotiana masa ejayijarã. Ito yicõri ì ya ruju ami wacõri yujeyijarã. Ito bajiro ìna yija bero Jesure gotirã gua tu ejacã ìna.

Cinco mil ñarãre Jesús ì ecare gaye

(Mr 6.30-44; Lc 9.10-17; Jn 6.1-14)

¹³ Juan idé guri masure ìna siare tuocõri bojori bujaquĩ Jesús. Ito bajiri cuma sãjacõri ricati waquĩ ì. Ito bajiro Jesús ì waja masicã masa. Gãjerã boejuna Jesure suya wacã. ¹⁴ Majado ejacõri Jesús ì tija masa jãjarã ñayijarã. Ito bajiri ìnare ti maiyiju ì. Cõrãre ìna ami ejaro bajiroti ìnare yisio ìsiyiju Jesús. ¹⁵ Iti rãioja ticõri, gua ì rãca riasotirã ì tujua wacu. Ì tu ejacõri ado bajiro yicu gua:

—Ñamijũ ña ija. Queno masa mama adoju. “Wasa”, yiya masare catorijũ bare ña waja yi masitoni, yibojacu gña Jesure.

¹⁶—Itoju ware ma ñnare. Muati bare ecaya ñnare, yiquĩ Jesús guare.

¹⁷—Bare ma guare. Naju riti co ñujamocōacā ña guare. Ito yicōri wai jũarāti ñama guare, yicu gña Jesure.

¹⁸—Adojua yure ãmi waya maji, yiquĩ Jesús guare.

¹⁹Itire boca ãmicōri ta quenarise joe masare ruji rotiquĩ Jesús. Ito yicōri naju co ñujamocō ñarisere ito yicōri wai jũarā ñarāre ãmi rucocuĩ Jesús. Itire rucocōri ũmacũju ti mũocuĩ Jesús. Ito ti mũocōri, “Queno ya Cũna mũ”, yiquĩ ĩ. Itire igajea batocōri guare ĩsiquĩ Jesús. Ito ĩ yija bero guaju masare batocu ija. ²⁰Masa ñarocōti ba jedicā itire. Ito yicōri sīgũ ruyabeto yaji quenaro riti tujacā ña. Ña ba ruarise jua gũbojeno jiburi ñajacu gña. ²¹Gña itire bagoana cinco mil ũmua ñacu gña. Romiare ito yicōri rĩacare cuni cōĩabiticu gña.

Ide joe Jesús ĩ ware gaye

(Mr 6.45-52; Jn 6.16-21)

²²Cumaju guare sãja rotiquĩ Jesús ĩ riojna gña jẽa watoni. Gña waroca riti masare ware gotiĩni Jesús. ²³Masare ware goti tĩogũ turiaju mũja wañi Jesús. Itoju sīgũti mũja ejacōri ĩ Jacure busiĩni ĩ. Rãio jedija bero itoju ĩ sīgũti ñañi Jesús maji. ²⁴Itajura gũdareco tujacu gña. Ito gña tujaroca jacũtucu guare, mino buto iti wẽajare. ²⁵Busu mũja wadiroca Jesús gña tu ejaquĩ ide joena wadicōri. ²⁶Ide joe ĩ wadija ucacu gña. Ito bajija ticōri:

—Wajo cutiro ya, yi awasãcu gña.

²⁷—Oca sēoña, gũibesa yuti ña, yiquĩ Jesús guare.

²⁸Ito ĩ yija tũocōri, gña rãca gagu Pedro ado bajiro busiquĩ ĩre:

—Yu Ũju, mũti mũ ñajama, ide joe yu mũ tu waroca yiya yure, yiquĩ Pedro Jesure.

²⁹Ĩ ito yijare:

—Wadite mũ, yiquĩ Jesús ĩre.

Ito ĩ yija tuo, wãgãcōri ide joe wasũocuĩ Pedro Jesús tu ejaqu wacu. ³⁰Buto mino iti wẽaja tũocōri, itire gũiquĩ Pedro. Ito bajiri jacũrisena ruja wasũocuĩ Pedro:

—Yu Ũju yure masoña mũ, yi awasãquĩ Pedro.

³¹Ito ĩ yirocati Pedro ya ãmoju ñiacōri ado bajiro yiquĩ Jesús ĩre:

—Queno yure tuorũnũsabea mũ. “Ide joe yu waroca yami Jesús”, ¿yi tuoĩa jidicãri mũ? yiquĩ Jesús Pedore.

³²Cumaju Jesús rãca ña mũja sãjarocati mino wẽata rojocoacu. ³³Gña cumaju ñacãnama Jesús riojo rijomunigãna ñini rũjũcu, ĩre rũcũbuorã:

—Riti Dios Macu ña mũ, yicu gña Jesure.



(San Mateo 14.31)

Genesaret sita gānare Jesús i yisiore gaye

(Mr 6.53-56)

³⁴Ito jēa wacōri Genesaret wame cūtiri sitajū ejacū guā. ³⁵Iti cūto gāna Jesús i ejaja tūo masicōri, masa jeyarore oca batoñi. Ito bajiri masa nārise cūtirāre āmi ejacā Jesús tū. ³⁶“Mū ya yutabuju tūnima guare moaīa rotiya”, yicā masa Jesure. No moaīarācōti cati quenarā tujacā mūcana.

Ñeñaro tūoīacōri ñeñarise yama masa, yi Jesús i riasore gaye

(Mr 7.1-23)

15 ¹Ito ñna yiroca fariseo gaye tūoīarā ito yicōri judio masa rotirise riasori masa cūni ejacā Jesús tū. Jerusaléna wadiana ñacā ñna. Jesús tū ejacōri ado bajiro seniācā ñna:

²—¿No yija bũcũrã ñna yisotire bajiro yiro robo cũdibeati mũ rãca riasotirã? Mũ rãca riasotirã ñna baroto riojua ãmo coebeama ñna. Bũcũrã ñna rotiado bajiro yiro robo yibeama ñna, yicã ñna Jesure.

³Ito bajiro ñna yijare, ado bajiro ñnare cũdiquĩ Jesús:

—Bũcũrã masa ñna rotirejua cũdirona Dios ĩ rotirisejuare cũdibeama mũ.

⁴Ado bajiro rotia Dios oca: “Mũ jacũ, mũ jacore cũni queno rũcũbuoya mũ. No ĩ jaco, ĩ jacure cũni ñeñaro busitugũ godacoajaro”, yi rotia Dios oca.

⁵Mũama ricati bajiro rotia. Ado bajirojua rotia mũa: “No, ‘Jeyaro gajeoni yũ rũcorise Diore yũ ĩsiroti riti ña. Ito bajiri yũ jacũsabatiane ejabua masibeama yũ’, ĩ yija, ĩ jacũsabatiane ejabuabejama quena”, yi tũoĩa rotibojama mũa. ⁶Ito bajiro mũa yija, bũcũrã masa ñna rotirisejua cũdirona, Dios ĩ rotirisejuare cũdibeama mũa. Ito bajiro mũa yija, “Ñe waja ma Dios oca”, yirã bajiro ya mũa. ĩ ocare jidicãrã ñna mũa. ⁷Mũa yiro bajiro yirã meje ñna mũa. Diore goti ĩsiri masũ Isaiãas ñayorũ mũare tũoĩa wacũ queno ucañi ĩ. Ado bajiro ucañi ĩ:

⁸Mũa ya risena riti yũre rũcũbuobojama mũa. Ito bajibojarocati mũa ya usina sũjũ bajiro tũoĩa mũa. Yũre rũcũbuobeama mũa.

⁹Minijucõri yũre mũa rũcũbuobojama, burãti ya mũa. Mũa riasorise masa ñna tũoĩa rujeore ña iti. Itireti, “Dios ĩ rotire ña”, yibojama mũa. Dios ĩ gotirise tũoĩa wacũ ito bajiro ucañi Isaiãas ñayorũ, yi gotiquĩ Jesús.

¹⁰Ito ĩ yija bero masare jicõri ado bajiro yiquĩ Jesús ñnare:

—Yũre tũocõri queno tũo masiña mũa. ¹¹Mani ba sãrise meje mani ñeñaro yiroca yirojama iti. Ñeñaro tũoĩacõri mani bũsirise, iti ña mani ñeñaro yiroca yirise, yiquĩ Jesús masare.

¹²Ito yija gũa ĩ rãca riasotirã ĩ tũ minijucõri ado bajiro yicũ gũa ĩre:

—Ito bajiro masare mũ gotija tũocõri, fariseo gaye tũoĩarã tũo bũjatomenaji ñna, yicũ gũa Jesure.

¹³Ito bajiro gũa yija, ado bajiro yiquĩ Jesús gũare:

—Dise rocati judire ĩ otere meje iti ñaja, ñe rãcati wãjacõagũ yiguĩji iti ote wese uũjũ. Ito bajiroti yigũ yiguĩji yũ Jacũ cũni. Gaje oca ñnasarise mejeti ricati bajiro ñna riasobojama iti jedi waroca yigũ yiguĩji yũ Jacũ.

¹⁴Dios ocare riasomena ñna ñajare, ñnare tũorũnũbejama. ñna ñama cajea mana gãjerã cajea manare tũa wabojarã robo bajiro bajirã. Sũgũ cajea macũ gãji cajea macũre ĩ tũa wabojama, goje ñaro ñna ejajama, jũarãjuti quedĩ sãjacoarã yirãji, yiquĩ Jesús gũare.

¹⁵ĩ ito yija ado bajiro seniãaquĩ Pedro Jesure:

—Iti riasore oca gaye queno gũare goti rẽtobuyama, yiquĩ Pedro Jesure.

¹⁶—¿Tũo masibeati mũa cũni? ¹⁷Mani ba sãrise jeragajũ waro yirojama iti. Ito bero rẽta budiro yirojama iti. ¿Itire queno tũo masibeati mũa? ¹⁸Mani ya usina tũoĩacõri risena busiama mani. Iti ña mani ñeñaro yiroca yirise. ¹⁹Ñna ya usina tũoĩacõri ñeñaro yama masa. Tite mũa. Gãjerãre sãama ñna. Manojocũtirã ñabojarãti gãjerã romiare ajeama. Jeyaro ñna tũoĩaro bajiroti romia rãca ñeñaro ajeama ñna. Riniama ñna. Socama ñna. Rocati oca gotiama ñna.

Ito bajiro yama masa. ²⁰Ito bajiro ñeñarise tuoñacōri iti ña masa ñna ñeñaro yiroca yirise. Mani baroto riojua mani amo coebeja, bucra ñna rotiro bajiro mani yibeja iti gaye meje ña mani ñeñaro yiroca yirise. Ñeñaro tuoñacōri ñeñaro ya mani. Iti ña mani ñeñaro yiroca yirise, yiqui Jesús guare.

Gaje maso Jesure iso tuorūnu suyare gaye

(Mr 7.24-30)

²¹Ito bajiro i yija bero itijua, wacu gua Jesús rāca. Ito wacōri Tiro ito yicōri Sidón wame cutiri cutoriju ejacu gua. ²²Ito gua ejaja bero sīgō Canaán gago itiju ñaro Jesús tujua awasā wadicō:

—Yu Uju David ñayoru janami ña mu. Yure ti maiña. Yu maco rūmú sãñagō ñamo. Ito bajiri buto ñeñaro tōbujamo iso, yi goticō iso Jesure.

²³Ito bajiro iso yibojarocati isore cudibitiqui Jesús. Ito bajiri i rāca riasotirā gua ado bajiro roticu Jesure:

—Isore wa rotiya. Usirioro guare awasā suyamo, yibojacu gua Jesure.

²⁴Ito bajiro gua yija ado bajiro yiqui guare:

—Oveja wisanare bajiro bajirā ñama judio masa. Ito bajiri ñnare yure cūqui Dios, yiqui Jesús.

²⁵Ito bajiro i yiroca i riojo wacōri rijomunigāna ñini rījucō romio:

—Yu Uju yure ejabuaya, yicō iso Jesure.

²⁶Ito bajiro iso yibojarocati ado bajiro yiqui Jesús isore:

—Judio masa riojuaju gājerāre yu ejabuaja, no masia ma yure. Ito bajiro yu yija, rīacare naju ēmacōri yaiare ecado bajiro baja, yiqui Jesús isore.

²⁷—Riti ya yu Uju. Ñna ujarā ba bate queorise bacā yaia. Yu gaje maso ñabojarocati mu ñarā bero yure jabeto mu ejabuaja quena ñaro yiroja yure, yicō iso Jesure.

²⁸Ito bajiro iso yija tuocōri, ado bajiro yiqui Jesús isore:

—Mu romio queno yure tuorūnugō ña mu. Ito bajiri mu amoro bajiroti bajiro yiroja iti, yiqui Jesús.

Ito bajiro i yirocati iso maco tujacoacō.

Jājarā ñarise cutirāre Jesús i yisioire gaye

²⁹Ito yija bero Galilea wame cutirita tūnima wacu gua. Itoju ejacōri turiaju mija wacu gua. Itoju gua joejearoca rujiqū Jesús. ³⁰Jājarā masa ejacā Jesús i rujiroju. Wa masimena, cajea mana, busimena, ruduana, ito yicōri jājarā cōrāre āmi ejacā ñna Jesús tujū. I tu ñna āmi ejaroca ñnare yisioqui Jesús. ³¹Busimena basicā. Ruduana wacā. Cajea mana ticā. Rujū ñeñarā quenari rujū, rujū cuticā. Ito bajija ticōri, ti uacacā masa. Ito bajiri Diore wanu rucubucocā ñna. “Judio masa ñna rucubucoru Dios i ñami quenagū”, yi rucubucocā masa.

Cuatro mil ñaräre Jesús ĩ ecare gaye

(Mr 8.1-10)

³²Ito yija gua ĩ rāca riasotiräre ado bajiro yiquĩ ĩ:

—Ado gānare ti bujatobea yu. Udia rumu tujā ĩja, adocāta yu rāca ĩna ñaroca. Ito bajiri queno bare ma ĩnare. ĩna babetoti ĩna ya wirijū wa roti āmobeā yu. ĩnare yu wa rotija majū boga quedirā yirāji ĩna, yiquĩ Jesús guare.

³³Gñajūa ado bajiro yicu ĩre:

—Ado masa manojū no bajiro masa tĳjaro bare buja masia ma, yicu gua Jesure.

³⁴—¿Nocō jaje naju rucoati mūa? yiquĩ Jesús guare.

—Jūa āmojeno naju ña guare, ito yicōri wai jabetacā ña, yicu gua ĩre.

³⁵Ito yija masare jacajū ruji rotiquĩ Jesús. ³⁶Ī ya āmona naju jūa āmojeno ñarisere ito yicōri wai rāca āmi rucoōri, “Queno ya Cūna mū”, yiquĩ ĩ Diore. Ito ĩ yija bero gua ĩ rāca riasotiräre ĩsiquĩ masare gua batotoni. ³⁷Masare batocu gua. ĩna jeyaro bacā. Ito bajiri sigū ruyabeto yaji quenaro ñacā ĩna. ĩna baja bero jūa āmojeno jiburi gua ba ruarise dajocu gua. ³⁸Gua itire bagoana cuatro mil ũmūa ñacu gua. Romiare ito yicōri rĳacare cūni cōiābiticu gua. ³⁹Ito bero masare ware gotiquĩ Jesús. Ito bajiri cumana Magadán wame cutiri sitajū wacu gua.

Tiyamani ĩoña guare, ĩna yire gaye

(Mr 8.11-13; Lc 12.54-56)

16 ¹Fariseo gaye tuoĳarā ito yicōri saduceo gaye tuoĳarā cūni Jesure tirona ejacā ĩna. “ ‘Riti Dios ĩ cōaru ña mū’, gua yi masitoni ũmacūjū gaye tiyamani ĩoña guare”, yi ejabojacā ĩna.

²Ito ĩna yibojarocati ado bajiro cudiquĩ Jesús:

—Rāiocūro ũmacūjū iti sūaja ticōri, “Quenari rumu ñari seyoa”, ya mūa. ³Busuri jĳjū iti sūaja mūa tija, waju bueri rāca iti ñaja. “Adi rumu quenado ma”, ya mūa. ũmacūjū ticōri, “Ito bajiro rĳtaro ya adi rumu”, yi masia mūa. Ito bajibojarocati adi rumu rĳtarise gaye, “Ito bajiro bajiro wado ya”, yi masibea mūa. ⁴Ñeñaro yirā ña mūa ito yicōri yure tuorūnumena. Tiyamani ĩore yure seniboja mūa. Ito bajiro mūa yibojarocati juaji tiyamani mūare ĩobicūja yu. Jonás ñayorure tiyamani rĳtare gaye riti mūare goticūja yu, yiquĩ Jesús fariseo gaye tuoĳaräre.

Ito bajiro Jesús ĩ yija bero ĩnare wagocu gua.

Fariseo gaye tuoĳarā ya naju wadare gaye

(Mr 8.14-21)

⁵Itajura gaje dūjajū jĳa ejacōri, “Mani baroti naju ācabojacoayija mani”, yicu gua. ⁶Ito yija Jesús ado bajiro guare gotiquĩ:

—Fariseo gaye tuoĳarā, saduceo gaye tuoĳarā ĩna ya naju wadarise uco gaye queno tuo masiña mūa, yiquĩ Jesús guare.

7 Jesús ito bajiro ī yija guamasiti gāmeri tuoīa busicu gua:

—Mani naju ācabojajare ito bajiro busiami Jesús, yi tuoīabojacu gua.

8 Ito bajiro gua tuoīabojaja tuo masicōri, ado bajiro yiquī Jesús guare:

—¿No yija, “Naju ma manire”, yati mua? Queno yure tuorūnubea mua.

9 Queno tuo masibea maji mua. Canu busati co dūjamocō naju narisere co dūjamocō mil masa nārāre eca jeocu yu. Īnare yu eca jeoja bero jaje jiburi dajocu mua. ¿Itire ācabojati mua? 10 Ito bero canu busati mucana jua

āmojeno naju narisere juaria mil masa nārāre eca jeocu yu. Īna masare yu eca jeoja bero jaje jiburi dajocu mua ruyarise. ¿Itire ācabojacoati mua?

11 ¿No yija queno tuoīa masibeati mua maji? Jīju, “Fariseo gaye tuoīarā, saduceo gaye tuoīarā ĩna ya naju wadarise uco gaye queno tuo masiña”, yu yija, naju gayere meje busibu yu, yiquī Jesús guare.

12 Ito ī yijare tuo masicu gua. “Fariseo gaye tuoīarā, saduceo gaye tuoīarā naju wadarise uco gayere tuoīarā ya mua’, guare ī yija, ‘Īna riasorisere queno tuoīa masiña mua’, yireonire guare gotiyijari Jesús”, yi tuoīacu gua ĩja.

Cristo Dios ī cōaru ña mu, yi Pedro ī goti quenore gaye

(Mr 8.27-30; Lc 9.18-21)

13 Mucana ito sōjua wacōri, Cesarea Filipo wame cutiri cuto tu ejacu gua Jesús rāca. Itoju ejacōri ado bajiro guare seniīaquī Jesús:

—Yu ña Masa Rījoru. ¿Yure masa ĩna busija, no bajiro yati ĩna? yiquī Jesús guare.

14 Ado bajiro cudicu gua ĩre:

—Coriarā ĩna busija, “Juan idé guri masu ñami”, yama ĩna mure. Gājerāma, “Elías ñami”, yama ĩna. Gājerāma, “Jeremías ñami”, yama ĩna. Gājerāma, “Diore goti ĩsiri masu ñaguīji gajea”, yama ĩna mure, yicu gua Jesure.

15 —¿Mūama ñimū ñami yati mua yure? yiquī Jesús guare.

16 Ito ī yija tuocōri, ado bajiro yiquī Simón Pedro:

—Muti ña Cristo Dios ī cōaru. Dios catitīñagū Macu ña mu, ya yu mure, yiquī Simón Pedro Jesure.

17 —Riti ya Simón, Jonás macu mu. Ito bajiro mu busija wanu quenagū ña mu. Itire mu busija, masare tuocōri meje busia mu. Itire mu busija, ũmacūju gagu yu Jacure tuocōri busia mu. 18 Ado bajiro mure gotia yu. Iti mu wame ña Pedro, “gūtagā”, yireoni ña iti Pedro. Riti ña mu busirise. Iti oca mu busirise jedibetoja. Gūtagā butirica robo bajiro bajirise ña iti mu busirise. Iti oca tuocōri yure tuorūnurā yirāji mu bero gāna. Ito bajiri yu nārā, nārā yirāji ĩna. Yure ĩna tuorūnujare godana uju ĩnare rētocūbicu yiguīji. Godabobarāti mucana tudi catirā yirāji ĩna. 19 Ado bajiro mure gotia Pedro yu. Soje janado rucogure bajiro mure cūgū yigūja yu. Ito bajiri, “Īre tuorūnurāre ī rotiroju miojugu yiguīji Dios”, yire oca masa ĩna tuo masiroca yigu yigūja mu. Ito bajiro mure cūgū yigūja yu. Adi sitaju mu rēorise, ũmacūju itoju cūni rēore ñaro yiroja. Adi sitaju, “Ito bajiroti yiya”, mu yija, ũmacūju cūni ito bajiroti yire ñaro yiroja, yiquī Jesús Pedroro.

²⁰Ito bajiro Pedroe ĩ yija bero ado bajiro yiquĩ Jesús guare: “Īti ñami Cristo Dios ĩ cōaru, yi masare goti batobesa mua”, yiquĩ Jesús guare.

Yure sīarā yirāji, Jesús ĩ yire gaye
(Mr 8.31-9.1; Lc 9.22-27)

²¹Ito ĩ yija bero itijunati guare goti rēto buquĩ Jesús:

—Jerusalénju ware ña yure. Itoju yu ejaroca bucurā, paia ujarā ito yicōri judio masa rotirise riasori masa cūni quenabeto yu tōbujaroca yirā yirāji ĩna. Itoju yure sīarā yirāji ĩna. Ito bajibojarocati udiā rāmu beroti yu catiroca yigu yiguĩji Dios mucana, yiquĩ Jesús guare. ²²Ī ito yija tuocōri, ricati busa camotadi rūgūcōri, oca sēoro ĩre busisubojaguĩ Pedro:

—Yu Ūju ito bajiro mure rētare āmobiquĩji Dios. Ito bajiro mure rētabeto yiroja, yiquĩ Pedro Jesure.

²³Ito ĩ yija tuocōri, jūda rūgūcōri, ado bajiro busiquĩ Jesús Pedroe:

—Rūmūa ūju Satanásre moa ĩsia mū. Yure camotadiya mū. Dios ĩ āmoro bajiro yu yija, yure camota codea mū. Dios bajiro meje tuoia mū. Masa ĩna tuoiaro bajiro tuoia mū cūni, yiquĩ Jesús Pedroe.

²⁴Ito ĩ yija bero ado bajiro yiquĩ Jesús guare ĩ rāca riasotirāre:

—Sīgū yure ĩ sūya āmoja, ĩ ye ñaroti tuoibaticōri yūjuare tuo mai sūyagu yiguĩji. Yucutēo gajagure bajiro tōbujabojaguti yure riti sūyagu yiguĩji ĩ. ²⁵No ĩ catirise maibojaguti godagu yiguĩji. Ito bajibojarocati yure tuorūnūgū, yu oca ĩ gotija tuo junisinicōri ĩna sīagūama catitiñare gaye bujagu yiguĩji. ²⁶Sīgū adi macārucāroju gajeoni jeyaro ĩ bujabojaja, ĩ ya ūsi jeame ūjuroju iti waja, ĩ ya gajeoni ĩ bujabojare ñe waja ma. Ñe mani ya ūsi rēto busaro waja cutirise manoja. Catirājuti Dios rāca mani oca quenobeja, mani godaja bero ĩ rāca oca queno masimenaji ĩja. ²⁷Yu Masa Rījoru ñacōri, yu Jacu Dios ĩ busurisena tūdi ejagu yiguja yu. Ito yicōri ĩ tu gāna ángel mesa rāca ejagu yiguja yu. Tūdi ejacōri masa ĩna yigoado bajiroti waja senigū yiguja yu. ²⁸Riti muare gotia yu. Mūa coriarā adiju ñarā mūa godaroto rioju, ĩre tuorūnūrāre Masa Rījoru ĩ mioju ejaroca tirā yirāji mūa. Īti ña yu Masa Rījoru, yiquĩ Jesús guare.

Īna tiro riojo Jesús ĩ godo wedire gaye
(Mr 9.2-13; Lc 9.28-36)

17 ¹Co āmojeno ūmūari bero Pedro, Santiago, ĩ ocabaji Juanre cūni ūmari turia joeju ĩnare āmi waquĩ Jesús. ²Itoju ĩna ejaroca ĩna riojo Jesús ĩ ya rio gajero bajiro godo wediyju. Ūmūa gagu ūmacañire bajiro yoyju ĩ ya rio. Ito yicōri ĩ ya yutabuju buto boticōri yoyju. ³Īna tiroca Moisés ñayoru, Elías ñayoru rāca Jesús tu goaioyjarā. Ito bajicōri Jesús rāca ĩna gāmeri busija, tiyjarā ĩna. ⁴Ito bajija ticōri, ado bajiro yiyju Pedro Jesure:

—Yu Ūju adoju mani ñaja quenascōa. Mūa āmoja muare yiaro wi meni ĩsiruja gua. Mure co wi, Elíasre co wi, Moisésre co wi meni ĩsiruja gua, yiyju Pedro Jesure.

⁵Ito bajiro Pedro ĩ busibojaroca riti ide bueri buto yorise ĩnare gũma rãgũyijũ. Iti ide bueri watonati oca ruyuyijũ:

—Aniti ñami yũ Macũ, yũ maigũ. ĩre buto wanũa yũ. ĩre queno tũoyã mũa, yire oca ruyuyijũ.

⁶Iti oca tũocõri buto gũyijarã ĩna. Ito bajiri buto gũirã ĩna ya rio sitajũ muqueayijarã ĩna. ⁷Ito bajiro ĩna bajija ticõri, ĩna tũ wacõri ĩnare moaĩayijũ Jesũs. ĩnare moaĩacõri ado bajiro yiyijũ ĩ:

—Wũmũña. Gũibesã mũa, yiyijũ Jesũs ĩnare.

⁸Ito ĩna ti mũoja, gãjerãre tibisijarã ĩna. Jesũs sigũti ĩ ñaja tiyijarã ĩna ĩja.

⁹Iti tũria ĩna roja waroca ado bajiro ĩnare gotiyijũ Jesũs:

—Janeti mũa tirise masare goti batobeja maji. Yũ ñã Masa Rijorũ. Yũre sãrã yirãji masa. Yũre ĩna sãbojarocati tũdi catigũ yigũja yũ. Yũ mũcana tũdi catiroto riojũa, jĩjũ mũa tigorise gãjerãre goti batobeja mũa, yiyijũ Jesũs ĩnare.

¹⁰Ito yija ado bajiro Jesure seniĩayijarã ĩna:

—¿No yija judio masa rotirise riasori masa, “Elfãsjũa ejasũogũ yigũiji”, yicati ĩna? yĩ seniĩayijarã ĩna Jesure.

¹¹Ito yija ado bajiro ĩnare cũdiyijũ Jesũs:

—Riti yĩni judio masa rotirise riasori masa. “Elfãsjũa ejasũogũ yigũiji. Ejacõri jeyaro quenogũ yigũiji ĩ”, ĩna yija riti gotiĩni. ¹²Ito bajiro ĩna gotibojarocati Elfã ĩ ejaja ĩre ti masibisĩ masa. Riti mũare gotia yũ. Elfã ejacãni. ĩ ejaja ĩre ti masibisĩ masa. ĩna ãmoro bajiroti yĩni masa ĩre. Ito bajiroti yũ Masa Rijorũre, tũbũjaroca yirã yirãji masa yiyijũ Jesũs ĩnare.

¹³Ito bajiro ĩ yija tũocõri, “Juan idé guri masũre busiami ãni”, yĩ tũo masiyijarã ĩna Pedro mesa.

Rũmũ sãñagũre rũmũre Jesũs ĩ bucõare gaye

(Mr 9.14-29; Lc 9.37-43)

¹⁴Roja wadicõri gũa tũ ejacã ĩna mũcana. Jãjarã masa ñacã gũa rãca. Jesũs ĩ tũdi ejaja ticõri, ĩ riojo rijomunigãna ñini rũjũquĩ sigũ. Ito yicõri ado bajiro yiquĩ ĩ Jesure.

¹⁵—Yũ Ujũ yũ macũre ti maiña mũ. Ñama cõre cõsotiami ĩ. Ito bajiri ruje tũbũjasotiami ĩ. Biyaro usi jedi quedisotiami yũ macũ. Coji ruyabeto jeame ãjũroju usi jedi quedisotiami ĩ. Ito yicõri riacajũ cũni usi jedi quedisotiami. ¹⁶Mũ rãca riasotirã tũjũ ĩre ãmi ejabojabũ yũ. ĩre yisio masibeama ĩna, yiquĩ ĩ Jesure.

¹⁷Ito ĩ yija ado bajiro yiquĩ Jesũs masare:

—Queno yũre tũorũnũbeã mũa maji. Masa ñeñaro yirãre bajiro bajia mũa maji. ¿Nocõ yoari mũa rãca ñagũ yigũjada yũ maji? ¿Nocõ yoari yugũ yigũjada yũ, mũa masitoni? Adojũa ãmi wayã, usi jedi quedisotigũre, yiquĩ Jesũs gũare.

¹⁸Usi jedi quedisotigũ ĩ ejaja ticõri, rũmũre budi rotiquĩ Jesũs. Rũmũ ĩ budirocati, cati quenagũ ñacõaquĩ macũacã mũcana.

¹⁹Ito yija bero ricati Jesũs rãca busicũ gũa mũcana:

—¿No yija rũmũre bucõã masibiti gũa? yicũ gũa Jesure.

20—Yũre queno tuorũnubiticõri rãmũre bucõa masibea mua maji. Riti muare gotia yũ. Jabetacã yũre mua tuorũnũja, jaibiti aje mostaza aje robo bajiro yũre mua tuorũnũja, mua rotiro bajiroti bajiroja. I tũriare, “Gajeroju cunĩ rũgũña”, mua yija, mua rotiro bajiroti bajiroja iti. Ñejua mua yi masibiti mano yiroja, queno yũre mua tuorũnũja. 21 Ito bajiro masare ña rãmũa sãñaja, bamena riti Diore mua senija, rãmũare bucõa masirãji mua, yiquĩ Jesús guare.

Yũre sũarã yirãji, macana Jesús i tũdi gotire gaye
(Mr 9.30-32; Lc 9.43-45)

22 Galilea sitaju coju gua waroca ado bajiro yiquĩ Jesús guare:
—Masa Rĩjoru ña yũ. Yũre ña ñiatoni gotigu yiguĩji sũgũ. 23 Yũre ñiacõri sũarã yirãji ña. Ito bajibojarocati udia ramũ beroti yũ catiroca yigu yiguĩji Dios, yiquĩ Jesús guare. Ito bajiri iti tuocõri buto bojori bujacu gua.

Dios ya wi ñaroti ña waja yire gaye

24 Ito yija bero Capernaum wame cutiri cuto ejacu gua Jesús rãca. Itoju gua ñaroca minijuara wi coderã waja seniri masa Pedrore oca seniãrona ejayijarã. I tu ejacõri ado bajiro ñe seniãyijarã ña:

—¿Mũre riasogu Dios ya wi waja yĩbeati i? yi seniãyijarã ña Pedrore.

25—Waja yigu yiguĩji, yi cudiyijũ Pedro.

Jesure busirocu wiju i sãjaroca, Jesujua ado bajiro ñe busigoquĩ:

—¿No bajiro tuoĩati Simõn mu? ¿Adi sita gãna ujarã noare waja seniati? ¿Ña ñarãre seniatite? ¿Gãjerãjuare seniatite? yi seniãaquĩ Jesús Pedrore.

26—Gãjerãre waja seniama ña, yi cudiquĩ Pedro.

ĩ ito yija, ado bajiro yiquĩ Jesús:

—Riti ya mu. Dios Macu yũ ñajare yũre waja seniado mama ña. 27 Ito bajibojarocati ñeñaro manire ña busitube yirona waja yija quena. Itajuraju wasa. Itoju wai joba. Cajero basuoguti ñe sũacõri i ya riseju niyeru cuji bujagu yiguja mu. Iti niyeru cujina manire ña waja senija, ñarocõti tũjacoaro yiroja iti. Iti cuji amicõri ñnare waja yiya, yiquĩ Jesús Pedrore.

¿Ñimũ ñati ñasagu ñarocu? ña yi seniãare gaye
(Mr 9.33-37; Lc 9.46-48)

18 1 Iti rãmũriti, gua Jesús rãca riasotirã ñe seniãacu:
—¿Umacũju Dios i rotiroju ñimũ ñati ñasagu ñarocu? yi seniãacu gua Jesure.

2 Ito bajiro gua yija tuocõri, sũgũ macuacãre amicõri gua wato cũquĩ.
3 Ado bajiro yiquĩ Jesús guare:

—Riti muare gotia yũ. Mua ñeñaro yirise mua jidicãbeja, ito yicõri bucũrãre rĩaca ña tuorũnũro bajiro yũre mua tuorũnũbeja, umacũju Dios i rotiroju ejamena yirãji mua. 4 Ado bajiro bajigu yiguĩji umacũju Dios i rotiroju ñasagu ñarocu. Ani macuacãre bajiro, “Ñasagu ña yũ”, yi

tuoïabicu yiguïji ï. ⁵Noa yure tuorũnucõri ãni macuacãre ïna boca ãmiro bajiro yure cuni boca ãmirã yirãji ïna, yiquĩ Jesús guare.

Ñeñaro mua yi uyaja guiïjorise ña, yi Jesús ï riasore gaye
(Mr 9.42-48; Lc 17.1-2)

⁶Mucana ado bajiro gotiquĩ Jesús guare:

—No macuacã yure tuorũnucõgure ñeñaro yiroca gãji ï yija, ïre buto waja senigũ yiguïji Dios. Quenogoroama ito bajiro yigure ï ya ãmumaju gũtagã jajoca sia yocõri riaca ñcaroju rucõaja quenaroja. ⁷Bujato bujarã yirãji adi macãrucõro gãna ñeñaro yiri masa. Masare ñeñaro ïna yiroca yirise ito bajiro riti bajitĩñaro yiroja. Ito bajibojarocati, gãjerã ïna ñeñaro yiroca ïnare yigure bujato baja ïre, yiquĩ Jesús guare.

⁸Mua ya ãmo, mua ya gũbo, mua ñeñaro yiroca muare iti yija, itire jatacõri sõju cõacõña. Manire co ñuja ãmo manija quenabetoja. Ito bajibojarocati jua ãmo, ãmo cutirã ñabojarãti jeame ñjuroju manire Dios ï cõaja, rêto busaro quenabeto yiroja. ⁹Mua ya cajea mua ñeñaro yiroca iti yija, ruacõri sõju cõacõña. Manire co ñuja cajea manija quenabetoja. Ito bajibojarocati jua cajea, cajea cutirã ñabojarãti jeame ñjuroju manire Dios ï cõaja, rêto busaro quenabeto yiroja. Dios ï ñaroju mani ejaja, buto busa wanu quenarã yirãji mani. “Mua ñeñaro yirise jidicãña”, yirocu ito bajiro yiquĩ Jesús guare.

Oveja wisarure ãmagũ yiguïji coderi masu, yi Jesús ï riasore gaye
(Lc 15.3-7)

¹⁰Mucana ado bajiro gotiquĩ Jesús guare:

—Mutarã yure masisuorãre sigũjuare tibo yibesa. Ñmacũju ángel mesa ñarãji ïnare tirũnurã. Co rumu ruyabeto yu jacu tu ñacãma ïna. ¹¹Yu ña Masa Rĩjoru. Jeame Ñjuroju waboanare masorocu wadicu yu, yiquĩ Jesús guare.

¹²Guare riasorocu ado bajiro yiquĩ Jesús mucana:

—Adocãta yu muare riasorisere queno tuoïaña mua. Sigũ ñayiju cien oveja rucogu. Co rumu gãjerãre wagicõri sigũ wisayiju oveja. ¿No bajiro tuoïati mua? ¿Gãjerã ruyarã, ta weseju noventa y nueve ñarã wisarure ãmagũ waguïjida ï? ¹³Ïre ãmagũ wacu yiguïji ï. Wisarure ï bujaja, buto wanugũ yiguïji ï. Riti ña. Gãjerã wisamena noventa y nueve ñarã rêtoro wisarure ï bujaja wanugũ yiguïji ï. ¹⁴Mani Jacu ñmacũju gagu ito bajiroti bajiami ï cuni. Sigũ yure masisuogu ï wisare ãmobiquïji Dios, yiquĩ Jesús guare.

Mani yagu ï ñeñaro yirise mani ãcabojaja quena, yi Jesús ï riasore gaye
(Lc 17.3)

¹⁵Mucana guare ado bajiro riasoquĩ Jesús:

—Sigũ mua yagu muare ï ñeñaro ï yija, ï rioti oca quenoma, “Riti ya mua, muare ñeñaro yicu yu”, ï yi masitoni. “Riti ya mua”, ï yija oca quenocãna ña mua. Ito bajiri mua yagu rãca queno baba cutirã yirãji mua mucana. ¹⁶“Bajibea

burāti ya mua”, i yija, gājerā jūarāre ji ñucama. Ito bajiri mua busirise ina tuoja. “Riti baja ita”, yi masirā yirāji ina. ¹⁷ Ñare riojo i tuorūnubeja, jājarā Diore masirā riojo gotiba mua. Ina jājarāre i tuorūnubeja, Diore masibicu robo bajiro ire mua rucoja quena. Sīgū ñeñaro yigu, çjarāre yiaru waja seni isiri masure bajiro rucoja quena mua ire, yiqui Jesús guare.

¹⁸ Riti muare gotia yu. Ūmacūju gagu Dios i cūana ña mua. Adi macārucūroju mua rēoja, ūmacūju Dios taju cūni rēore ñaro yiroja. Gajere cūni, “Ito bajiroti bajiya mu”, mua yiro bajiroti ūmacūju cūni bajiro yiroja, yiqui Jesús guare.

¹⁹ Gaje ado bajiro muare gotia yu. Mua jūarā sīgūre bajiro tuoīacōri Diore mua seni āmoja, mua āmoro bajiroti isīgū yiguīji yu Jacu ūmacūju gagu. ²⁰ No jūarā udiarā yure tuorūnūrā ina minijuaja, ina rāca ñagū yigūja yu, yiqui Jesús guare.

²¹ Ito i yija bero Pedro ado bajiro seniīaquī Jesure:

—Yu Ūju sīgū yu yagu yure ñeñaro i yija, çnocōjiri ire yu ācabojoja quenati? ¿Jua āmojeno ire yu ācabojoja quenati? yiqui i Jesure.

²² Ito yija tuocōri, ado bajiro cūdiqū Jesús ire:

—Jua āmojeno rētoro, coji ruayabeto mure i senirocō ire mu ācabojoja quena, yiqui Jesús Pedore.

Gāji i ñeñaro yirise ācaboja āmobicu yire oca

²³ Mucana Jesús guare ado bajiro riasoquī:

—“¿Dios ūmacūju rotigu no bajiro bajiatu i?” mua yi masi āmoja, sīgū çjure tuoīate mua. Ado bajiro yiyiju i. I ya moari masare ji ñucacōri, ire ina waja ru Yuriorisere cōīayiju. ²⁴ I cōīasuoroca sīgū ire jairo niyeru waja ru Yuriogure ire āmi ejabojayijarā ina. ²⁵ I çjure waja yi masibisiju i. Ito bajiri, “Gājerāre yure isi isitēna”, yiyiju çju. Ire, i riare, i manojore, i ya gajeoni jeyaro gājerāre yure isi isitēna. Ina waja mua bujarise yure mua isija, i yure waja ru Yuriorise tījaro yiroja, yiyiju çju ire āmi ejanare. ²⁶ Ito i yija tuocōri, ire waja ru Yuriogū i riojo rijomunigāna ñini rūjūyiju. Ito yicōri ire josayiju i: “Yu çju jabeto yuya maji. Mure yu waja ru Yuriorise waja tiogū yigūja yu maji”, yiyiju i, i çjure. ²⁷ Ito i yija tuocōri, ire ti maiyiju i: “Ba, no yibeati”, yi ire jidicāyiju i, i çju.

²⁸ Ito bajiro i çju yija tuocōri, budi wayiju i. Budi wacōri i baba ire waja ru Yuriogure ti bujayiju i cūni. Ito bajiri i babare i ya āmuma ñia rūgūcōri, “Yure mu waja ru Yuriorise cojiti waja tíoña mu”, yiyiju i ire. ²⁹ Ito i yija tuocōri, i ya rijomunigāna ñini rūjūyiju i: “Jabeto yure yuya maji. Mure yu waja ru Yuriorise mure waja tiogū yigūja yu maji”, yibojayiju i. ³⁰ Ito i yibojarocati tuobisiju i. Ito bajiri tubiara wiju āmi wacōri ire cūyiju i. “Yure mu waja ru Yuriorise mu tiobeja, budibicu yigūja mu”, yiyiju i. ³¹ Gājerā moari masa ito bajiro i yija ticōri, bujatobisijarā ina. Ito bajiri çju tu wacōri ñarocōti gotiyijarā ina. ³² Ito bajiri ire ina gotija tuocōri, “Ire yure ji isitēna”, yiyiju çju. I ejaja ticōri, ado bajiro ire yiyiju

ĩ: “Yũre moa ĩsiri masu quenabisija mu. ‘Yũre mu waja ruyuriorisere ito bajicõato mure’, yibojacu yu, yũre mu josajare. ³³Mure yu ti maicato bajiroti gãji mu babare ti mairujaboyija mu”, yiyiju uju ĩre moa ĩsiri masure. ³⁴Buto junisinicõri ĩre ĩ waja ruyuriorise ĩ waja t̄otoni ĩre tubia rotiyiju ĩ uju: “Yũre ĩ waja ruyuriorise ĩ t̄obeja budibicu yiguĩji ĩ”, yiyiju uju, yi gotiquĩ Jesús guare, gua tuo masitoni.

³⁵Bajiroti gaye guare riasoquĩ Jesús. Ado bajiro guare gotisusaquĩ Jesús:

—Ito bajiro riti yigu yiguĩji yu Jacu ũmacũju ñagũ cuni, gãjerã mua ñarãre ñeñaro ĩna yirisere mua ãcabojobeja, yiquĩ Jesús guare.

Manojore jidicãre ma, yi Jesús ĩ riasore gaye

(Mr 10.1-12; Lc 16.18)

19 ¹Ito bajiro Jesús ĩ yija bero Galilea sitana wacõri, Judea sitaju ejacu gua. Jordán wame cutirisa tu ũmacañi ĩ joeja muja wadiri sitajua ñacu iti sita. ²Jãjarã masa Jesure sãya wacã. Cõrã ĩna ñaja ĩnare yisioquĩ Jesús.

³Itoju gua ñaroca fariseo gaye tuoĩarã ejacã Jesús tu. “Mani seniĩaja, queno cudi masibicu yiguĩji ĩ”, yirona seniĩabojacã ĩna Jesure:

—¿Sĩgũ ĩ manojore ĩ cõaja, ĩ ãmoro bajiroti ĩ manojore ĩ cõaja quenati? yi seniĩacã ĩna.

⁴—¿Dios oca tuti t̄iabiticati mua? ĩ oca gotia, “Cajero rujeonĩ ũmugũre ito yicõri romiore cuni”, yi gotia ĩ oca. ⁵Gaje ado bajiro gotia ĩ oca: “ĩ manojore rãca ñaroca ĩ jacure ĩ jacore jidicãgũ yiguĩji ĩ. Manojore cuticõri jũarã ñabojarãti sigũre bajiroti bajirã yirãji ĩna”, yi gotia Dios oca. ⁶Ito bajiroti bajia iti gaye. Jũarã ñabojarãti sigũre bajiro ñarãji ĩna ĩja. Ito bajiri Dios ĩ babocãre ñajare manojore jidicã masia ma, yiquĩ Jesús fariseo gaye tuoĩarãre.

⁷Ito ĩ yija t̄uocõri, ado bajiro seniĩacã ĩna:

—Riti mu gotija, ¿no yija ricati rotiyijari Moisés ñayoru? Ado bajiro rotiyonĩ ĩ: “Isore mu jidicã ãmoja, jidicãre papera isore ĩsiña”, yiyonĩ Moisés ñayoru, yicã ĩna Jesure fariseo gaye tuoĩarã.

⁸Ito bajiro ĩna yija t̄uocõri, ado bajiro cudiquĩ Jesús:

—Diore ĩna cudi ãmobejare, manojore jidicãre gaye r̄ebisĩ Moisés ñayoru. Ito bajibojarocati cajeroama ito bajiro meje bajiyija. ⁹Riti muare ado bajiro gotia yu. Sĩgũ ĩ manojore gãjire iso ajebitibojarocati ĩ jidicãja, ñeñaro yigu yami ĩocũ. Isore jidicãcõri gajeore ĩ manojore cutija, ajegu yami ĩocũ. Gãji cõaro rãca ĩ manojore cutija, ajegu yami ĩocũ cuni, yiquĩ Jesús fariseo gaye tuoĩarãre.

¹⁰Ito ĩ yija t̄uocõri, gua ĩ rãca riasotirã ado bajiro yicu ĩre:

—Riti ito bajiro iti bajijama manojore cutire ma, yicu gua ĩre.

¹¹Ado bajiro yiquĩ Jesús guare:

—Ñarocõgoroama tuo masi jedi yimenaji adire. ĩna tuo masiroca Dios ĩ yiana riti tuo masirã yirãji. ¹²Coriarã ĩna manojore cuti masibeja, ricati riti bajia ĩna ya rujuri. Coriarã ito bajironati rujeana ĩna. Gãjerãma, gãjerã ũmua ĩnare ñeñoja bero manojore cuti masimenaji ĩnaõna. Gãjerãma ũmacũju gagu Diore riti r̄ucub̄orona manojore manaji ĩnaõna. No itioni gaye cudi ãmogũti cudiguĩji, yiquĩ Jesús guare.

Riicare queno yijaro Dios, Jesús i yire gaye

(Mr 10.13-16; Lc 18.15-17)

¹³Ito yija bero gājerā riicare Jesús tu āmi ejacā. Īna joe āmo jeocōri Diore ĩnare busi ĩsitoni, ĩnare āmi ejacā ĩna. Īna āmi ejaja ticōri. “Āmi wadibesa maji. Ĥsirioro ya mua”, yicu gua ĩnare. ¹⁴Ito bajiro gua yibojarocati Jesuama ado bajiro yiqui:

—Riicare rēobesa, yu tu wadijaro ĩna. Riica nāma yure queno tuorūnurā. Īna robo yure queno tuorūnurāre ĩ rotiroju miojugu yiguiji Dios, yiqui Jesús guare.

¹⁵Ito ĩ yija bero ĩnare yiari Diore busi ĩsirocū āmo moa jeoquī Jesús. Ito ĩ yija bero gajerojua wacu gua Jesús rāca mucana.



(San Mateo 19.13)

Gajeonire buto maisabeja quena, Jesús i yire gaye
(Mr 10.17-31; Lc 18.18-30)

¹⁶ Co rumu sigũ mamu Jesure seniãgũ ejaquĩ:

—¿Queno riasogu catitĩnare gaye yu buja ãmoja, no bajiro yigujada yu? ¿Ñe quenarise gaye yigu yigujada yu? yiquĩ i Jesure.

¹⁷—¿No yija quenagũ yure yati mu? Sigũ ñami queno yigu. Ñti ñami Dios. Catitĩnare gaye mu ãmoja, Dios i rotirisere cudija quena, yiquĩ Jesús mamũre.

¹⁸—¿Ñe rotire gaye yigujada yu? yiquĩ i Jesure.

—Gãjire siabeja. Gãji manojore ajebeja. Romia cuni gajeo manũjore ajebeja. Rinibeja. Gãjerãre rão gotibeja. ¹⁹Mũ jacũre, mu jacore cuni rãcũbuoba. Ito yicõri mu ya rujure mu mairo bajiroti, mu ñarãre cuni maima, yiquĩ Jesús mamũre.

²⁰—Macuacã ñagũjuti itire ito bajiro yisocũ yu. ¿Ñe gaje ruyati yure queno yu yiroti? yiquĩ i Jesure.

²¹Ito i yija, ado bajiro cudiquĩ Jesús:

—Ñarocõti mu cudi jeo ãmoja, ado bajiro yiya. Jeyaro mu rucorise gãjerãre ãsi jeocõña. Ito yicõri iti waja bujacõri bojoro bujarãre ãsima. Ito bajiro mu yija, ãmacũju queno bujagu yiguja mu. Ito bajiro mu yi jeoja bero yu rãca waya, yiquĩ Jesús ãre.

²²Jesús ito bajiro i yija tuocõri, buto bojori buja tũdi waquĩ i, i ya gajeonire maigũ. Buto gajeoni jaigu ñayiju i.

²³Ito yija bero gua i rãca riasotirãre ado bajiro yiquĩ Jesús:

—Riti muare ado bajiro gotia yu. Sigũ gajeoni jaigu Dios rotiroju i eja ãmoja josari ña. ²⁴Mũcana muare goti quenoa yu. Sigũ camello gawa jota susuriju i rãta budi ãmoja, josari ña. Ito bajiroti buto busa josari ña Dios i rotiroju niyeru jaigu i eja ãmoja, yiquĩ Jesús guare.

²⁵Ito i yija tuocõri, buto ucacu gua. Ito yicõri guamasiti gãmeri seniãacu gua:

—¿Ito yija noajua Dios i ñaroju ejagu yiguĩjida? Sigũ ejabiquiji gajea, yi gãmeri busicu gua.

²⁶Guare ticõri ado bajiro yiquĩ Jesús:

—Masamasiti yiado ma itire. Dios sigũti jeyaro yi masiguĩji. Ñejua josarise manoja ãre, yiquĩ Jesús guare.

²⁷Ito i yija tuocõri, Pedro ado bajiro yiquĩ:

—Yu Hju jeyaro gua rucorisere jidicãcu gua. Iti jeyaro jidicãcõri mu rãca suya gua. ¿Ito gua yijama ñe bujarã yirãjida gua? yiquĩ i Jesure.

²⁸Ito i yija tuocõri, ado bajiro gotiquĩ Jesús ãnare:

—Riti muare gotia yu. Co rumu mũcana mame menigũ yiguĩji Dios. Ito bajiro i yiri rumu yu Masa Rijoru rotiroju yori cumuroju rujigu yiguja yu. Mũa cuni yure suyarã, jua gubojeno ñari cumurori rotiroju rujirã yirãji mũa cuni. Israel sita gãna jua gubojeno masa buturi gãnare rotirã yirãji mũa. ²⁹Noa yure cudi ãmorã ãna ya wiri, ãna ñarã, ãna jacũsabatia, ãna manojosãromia, ãna

riã, ito yicõri ñna ya wesecare cuni ñna cû waja, ñna rucobojarise rêto busaro queno bujarã yirãji ñna mucana. Ito yicõri catitiñare bujarã yirãji ñna. ³⁰Jãjarã adoju ñasari masa ñarã, itoju ñmacũju ñasarã meje ñarã yirãji. Ito bajicõri adoju ñasamena ñarã, itoju ñmacũju ñasarã ñarã yirãji, yiquĩ Jesús guare.

Moari masa gaye Jesús ï goti masiore oca

20 ¹“Ïre tuorũnurãre ï rotiroju miojugu yiguĩji Dios”, gua yi masitoni ado bajiro goti masioquĩ Jesús guare:

—Sĩgũ uyé wese co wese rucogu ñayiju. Busuri jiju ïre moa ïsironare ãmagũ wayiju ï. ²Ïnare bujacõri ñnare busi quenoyiju ï. “Co rãmũ ñmũasaro yũre mua moa ïsija, coji denario niyeru cuji mũare waja yicũja yũ”, yiyiju ï ñnare. Ñna cudija tuocõri, “Yũ ya sita moa ïsitẽña yũre”, yiyiju ï ñnare. ³Ito bero yoa busari nueve tũjaroca, gãjerã moa ãmorã cuto gudareco ñna rũgõja ti bujayiju ï. ⁴“Wasa, mua cuni. Yũ ya ote wese moa ïsitẽña. Yiro robo queno mũare waja yigu yigũja yũ”, yiyiju ï ñnare. Ito bajiri ñna cuni ïre moa ïsirã wayijarã. ⁵Mucana ito bajiroti ñmũa gudareco ñaroca, tres ñaroca cuni moari masa bujayiju ï. ⁶Mucana cinco ñaroca cuto gudareco ejacõri gãjerã moa ãmorã ñna rũgõja ti bujayiju ï. Ito yicõri ñnare ado bajiro yiyiju ï: “¿No yija adi rãmũ moamenati ñmũasaro rũgõ ucuati mua?” yiyiju ï ñnare. ⁷“Ñimũjuã guare, ‘Moa ïsiña mua’, yibeama. Ito bajiri ñacõa gua”, yiyijarã ñna ïre. “Wasa mua cuni. Yũ ya ote wese moa ïsitẽña. Yiro robo queno mũare waja yigu yigũja yũ”, yiyiju ï ñnare. ⁸Rãiocũro ñaroca ï ya moari masare coderi masũre ji ñucayiju ï, ï ya moari masare ï waja yitoni. “Bero moare sãjacãnanũare waja yisũoya. Ito yicõri moare sãjasũocãnanũare waja yi gajanoãña”, yiyiju ï, ï ya moari masare coderi masũre. ⁹Ito yija bero moare sãjasusana ejasũoyijarã. Ito bajiri ñna jeyarore coji denario niyeru cuji ñnare waja yiyiju ï. ¹⁰Itocõacã ñna bujaja ticõri, cajero moare sãjasũoana: “Maniama jai busaro bujarã yirãji”, yi tuoiabojayijarã ñna. Ito bajiro ñna tuoiãre ñabojarocati. Co cujiti niyeru cuji boca ãmiyijarã ñna cuni. ¹¹Ito bajiri itocõacã bujacõri ñjũre tudisũoyijarã ñna. ¹²“Gua beroju moasũorã coji cõreti moama ñna. Ito bajibojarocati ñnare mũ waja yirocõacãti guare waja yia mũ. Guama ñmacañi asiro bujaiabojabu gua”, yi tudiyijarã ñna ñjũre. ¹³Ito bajiro ñna yibojarocati sũgũre ado bajiro cudiyiju ñju: “Yũ baba mũre rinibeã yũ. ‘Yicũja’, yũ yiado bajiroti ya yũ. Jiju oca quenocãmũ mani. ‘Co rãmũ moare waja co cuji niyeru cuji waja cutia’, yiarĩ mũre basicãmũ yũ. ¹⁴Mũ moare waja ãmicõri wasa. Mũre yũ waja yiro bajiroti bero moasũasũre cuni itocõti ïsi ãmoã yũ. ¹⁵Yũ ya niyeru ñna. Ito bajiri yũ ãmoro bajiroti ya yũ itire. ¿Ïnare queno yũ waja yija, itire ti junisiniati mũ?” yiyiju ï cajero moare sãjasũorũre, yiquĩ Jesús guare.

¹⁶Gaje ado bajiro yiquĩ Jesús guare:

—Ito bajiroti adoju jãjarã ñasarã ñarã, itoju ñmacũju Dios ï ñaroju ñasamena ñarã yirãji ñna. Gãjerã adoju ñasamena ñarã, itoju Dios ï ñaroju ñasarã ñarã yirãji. Masa jeyarore jibojagũti coriarãreti bese ãmigũ yiguĩji Dios, yisũsaquĩ Jesús guare.

Yure sīarā yirāji, Jesús ī yi busisusare gaye
(*Mr 10.32-34; Lc 18.31-34*)

¹⁷Jerusalénju gwa wasuoroca, gwa jwa gubojeno ñarāre busirocu ricati ji ñucaquī Jesús:

¹⁸—Jerusalénju ejarā warā, muja wasuoa mani. Jerusalénju mani ejaroca Masa Rījorure ñiarā yirāji masa. Ito yicōri paia ujarāre, judio masa rotirise riasori masare cūni ĩre ĩsirā yirāji ĩna. ĩnaju ĩre sīa rotirā yirāji. ĩti ña yu Masa Rījoru. ¹⁹Ito yicōri gaje masa yure ĩna aja tuditoni, yure ĩna bajetoni, ito yicōri yucutēoju yure ĩna jaju sīatoni ĩnare yure ĩsirā yirāji ĩna. Yure sīacōri godana wato yure yujebogarā yirāji ĩna. Ito ĩna yibojarocati udia rmmu bero yu catiroca yigu yiguji Dios yure, yiquī Jesús gware.

Santiago mesa jaco Jesure iso seniā āmore gaye
(*Mr 10.35-45*)

²⁰Ito yija bero Zebedeo rīa jaco ejacō Jesús rāca busiroco. Iso rīa Santiago, Juan rāca ejacō. “Yure queno yiya mu”, yiroco Jesús riojo rijomunigāna ñini rījūcō iso. ²¹Ito bajiro iso yija ticōri:

—¿No bajiro yu yire āmoati mu? yiquī Jesús isore.

Ito ī yijare ado bajiro cudicō iso:

—Mu rotiroju mu ejaja, yu riare sīgū mu ya riojocaduja, gājire mu ya gācoduja rojoba ĩnare, yicō iso Jesure.

²²Ito bajiri iso rīare ado bajiro yiquī Jesús:

—Mua yure senibojarisere queno tuo masibea mua. Quenabeto yu tuoiaroca yirā yirāji masa yure. ¿Yure bajiroti quenabeto tuoia ñemecuti masirā yirājida mua cūni? yiquī Jesús ĩnare.

—Ñemecuticōrāji gwa, yicā ĩna Jesure.

²³ĩna ito yija tuocōri, ado bajiro cudiquī Jesús:

—Riti muare gotia yu. Mua cūni yure bajiroti tōbujarā yirāji. Ito bajibojarocati yu ya riojocaduja, yu ya gācoduja muare rojo masibea yu. “Āna yu Macu tu rujirā yirāji”, yu Jacu ī yicādo bajiroti, ĩnare rojogu yiguji, yiquī Jesús ĩnare.

²⁴Gwa Jesús rāca riasotirā jwa dūjamocō ñarā, “Ito bajiro āmoa gwa”, ĩna yija tuocōri, tuo junisinicu gwa. ²⁵Ito bajiro gwa bajija ti masicōri, ado bajiro yiquī Jesús gware:

—Sita ujarā ñasari masa ĩna roca gānare rotirā yirāji. Ito yicōri mucana ĩnare moa ĩsiri masa, ĩna roca gānare buto busa sēoro rotirā yirāji ĩna. “Ito bajiro yicā masa”, yi tuo masia mua. ²⁶Muama ito bajiro bajimena yirāji. Gajero bajirojua baja. No ñasagu ña āmogū, gājerāre ejabuagu yiguji. ²⁷Ito yicōri cajero gagu ñasuo āmogū, gājerāre moa ĩsigū yiguji. ²⁸Yu cūni ito bajiroti ya. Gājerā yure moa ĩsijaro yigu meje wadicu yu. ĩnajuare ejabuagu wadicu yu. Jājarāre masorocu wadicu yu. ĩna ñeñaro yirisere waja yi ĩsirocu goda ĩsigū wadicu yu, yiquī Jesús gware.

Jūarā cajea manare Jesús ĩ yisioire gaye

(Mr 10.46-52; Lc 18.35-43)

²⁹ Jericó wame cutiri cuto gua budi waroca, jājarā masa sųyacā, Jesure ti āmorā. ³⁰ Itoju gua waroca jūarā cajea timena rujicā ma tųju. Jesús ĩ rētaja tųocōri, ado bajiro ĩre ji awasācā ĩna:

—Gua ųju, David ñayoru janerābatia janamiti ña mų. Guare ti maiña mų, yi awasācā ĩna.

³¹ Ito bajiro ĩna yibojarocati, “Awasābesa maji”, yicā masa. Ito bajiro ĩna yibojaroca riti, buto busa awasācā ĩna mucana:

—Gua ųju, David ñayoru janerābatia janami ña mų. Guare ti maiña, yi awasācā ĩna buto busa.

³² Ito ĩna yija tųocōri, tuja rųgųquĭ Jesús. Ito yicōri cajea manare ji ñucaquĭ ĩ:

—¿No bajiro yų yire āmoati mųa? yiquĭ ĩ ĩnare.

³³ —Gua ųju, cajea ti āmoa gua, yicā ĩna Jesure.

³⁴ Ito ĩna yija tųocōri, ĩnare ti maiquĭ Jesús. Ito yicōri ĩna ya cajeari moaĭaquĭ ĩ. Ito bajiro ĩ yirocati timena ñabojana ticoacā ĩna ĩja. Ito ĩ yija bero ĩna cųni Jesure sųyacā.

Jerusalénju Jesús ĩ ejare gaye

(Mr 11.1-11; Lc 19.28-40; Jn 12.12-19)

21 ¹ Jerusalén cōña warā Betfagé wame cutiri cuto ejacu gua. Jabeto cōñasųocu Jerusalén ĩja. Olivos wame cutiri turia judo ñacu iti cuto. Jūarā gua rāca gānare ĩ rāca riasotirāre, ² ado bajiro rotiquĭ Jesús:

—Mani waroto riojo ñari cutore wasa maji. Itoju ejačōri burro sia rųgōrųre bujarā yirāji mųa. Ito yicōri ĩ macų cųni ñagų yiguĭji ĩ rāca. ĩnare ojacōri āmi wadi ĩsima yųre. ³ Sĭgų mųare ĩ busija. “Mani ųju ĩnare āmoami”, yiba. “Yoari mejeti mucana mure judacōarā yirāji gua”, yiba. Ito bajiro mųa yija tųocōri, “Baų wasa”, yĭgų yiguĭji mųare, yiquĭ Jesús ĩnare.

⁴ Ito bajiro yiquĭ Jesús, sĭgų Diore goti ĩsiri masų ĩ ucado bajiroti yĭgų. Ado bajiro ucayoñi Diore goti ĩsiri masų:

⁵ Jerusalén gānare ado bajiro yiba: “Tiya mųa. Mųa ųju wadiami.

‘Ñasagu ña yų’, yirocu meje ejami ĩ. Burro gajeoni ũmari masų macų ĩ joe jesacōri wadiami ĩ”, yiba, yi ucañi Diore goti ĩsiri masų ñayoru.

⁶ Jesús ĩ rotija tųocōri, ĩ rotiro bajiroti yicā ĩna. ⁷ Burro ĩ macų rācati āmi wadiñi ĩna. ĩna ya yutabujurire ruacōri burro joere jeocā ĩna. Ito ĩna yija bero mųja jeaquĭ Jesús ĩja. ⁸ Ito iti bajiroca masa jājarā ñacā. ĩna ya yutabujuri ruacōri mare eyocų yucā ĩna. “Gua ųju ña mų”, yirona ito bajiro yiyĭjarā masa Jesure rųcųbuorā. Gājerā yucųgųri jatacōri mare cų yucā ĩna. ⁹ ĩ riojua gāna, ĩ berojua gāna cųni ĩre wanųrā ado bajiro awasā wacā ĩna:

—Mũ ña David ñayoru janerābatia janami. Mũ ña gũa Uju. Rētoro masigũ ña mũ. Dios ĩ cōaru ña mũ. Queno yijaro Dios mũre. Quenasacõa Dios ĩ ito bajiro ĩ cõaja, yi awasã wacã masa.

¹⁰Ito bajiro Jesús masa rãca ĩ ejaja, tũo batocõri tũoĩa oca jaicã masa. Jãjarã ĩnamasi gãmeri seniĩacã ĩna:

—¿Ñimũõcũ ñati ãni? yicã ĩna.

¹¹Gãjerã ado bajiro yicã:

—Īti ñami Jesús Diore goti ĩsiri masũ. Galilea sita Nazaret wame cutiri cuto gagũ ñami ĩ, yicã masa.

Dios ya wiju niyeru wasoari masare Jesús ĩ bucõare gaye

(Mr 11.15-19; Lc 19.45-48; Jn 2.13-22)

¹²Ito ĩ yija bero Dios ya wi minijuara wiju sãja wacũ gũa Jesús rãca. Ito wiju waja gãme ñari masare ticõri ĩnare bucõaquĩ Jesús. Masare ĩna niyeru wasoa ñari casabore tujũda queoquĩ Jesús. Ito yicõri bujare ĩna ĩsi rujiri cumurori tujũda cõaquĩ. ¹³Ado bajiro gotia Dios oca tuti yiquĩ Jesús:

—Yũ ya wiama yũre rũcũbũorona ĩna minijuara wi ñaro yiroja. Ito bajibojarocati mũama riniri masa ĩna rudiri wi robo bajiro meniyija mũama, yi gotia Dios oca tuti, yiquĩ Jesús ĩnare.

¹⁴Iti wiju minijuara wiju gũa ñaroca, cajea mana ito yicõri wa masimena ejacã Jesús tũ. ĩna ejaja ticõri, ĩnare yisioquĩ Jesús. ¹⁵Ito bajiro Jesús tiyamani ĩ ĩoja ticõri, paia ujarã ito yicõri judio masa rotirise riasori masa cũni Jesure tũo junisinicã ĩna. “Rētoro masigũ ña mũ. David uju ñayoru janerābatia janamiti ña mũ”, minijuara wiju rĩaca ĩna awasãja tũocõri, Jesure tũo junisinicã ĩna. ¹⁶Ito bajiri Jesure ado bajiro yicã ĩna:

—¿Ito bajiro ĩna busija tũocũati mũ? yicã ĩna Jesure.

—Tũoa yũ ĩnare. Dios oca tutijũ ito bajiro iti gotija. ¿Tĩĩabeati mũa? Ado bajiro gotia iti:

Rĩaca ito yicõri ũjurãcã cũni mũre ĩna wanũ rũcũbũoroca ya mũ, yi gotia Dios oca, yiquĩ Jesús ĩnare.

¹⁷Ito yija bero ĩnare wagocũ gũa. ĩnare wagocõri Betania wame cutiri cutoju ejacũ gũa. Itoju canicũ gũa.

Higuera rica manigũre Jesús ĩ rojare gaye

(Mr 11.12-14, 20-26)

¹⁸Mũcana busuri Jerusalénju tũdi wacũ gũa. Ma gũdareco gũa tũjaroca, “Ñiocõa yũ”, yiquĩ Jesús. ¹⁹Ma tũ higuera wame cutiricũ ñacũ. Itigũ ricare ba ãmogũ ojabojaquĩ Jesús. Rica manicũ itigũjuama. Jũgoti ñacũ. Ito bajiri itigure ado bajiro yiquĩ Jesús:

—Jũaji rica cutibitiatija mũgo, yiquĩ Jesús itigure.

Ito bajiro ĩ yirocaci sinia godacoacũ itigũ. ²⁰Ito bajiro iti rētaja ticõri, ucasũ gũa Jesús rãca riasotirã:

—¿No bajijare yoari mejeti sinia godati itigu? yicũ gũa Jesure.

²¹Ado bajiro gũare cũdiquĩ ĩ:

—Riti mũare gotia yũ. Yũre tuorũnucõri, “Yũre ejabuabiquĩji Jesús”, mũa yi tuoĩabeja, janeti higuera gũre yũ yiro bajiro meje riti yi masirãji mũa. Gaje sũo busarise yi masirãji mũa. I tũriare, “Cũnĩ rũgõcõri riaca jajosajũ quedi roaya”, mũa yija, ito bajiroti rẽtaro yiroja. ²²Diore busirã mũa senija, ĩre mũa tuorũnũjama mũa seniro bajiroti bajiro yiroja, yiquĩ Jesús gũare.

“¿Ñimũ ĩ rotijare ito bajiro yati mũ?” yi Jesure ĩna seniĩare gaye

(Mr 11.27-33; Lc 20.1-8)

²³Ito rẽta wacõri Jerusalẽnjũ ejacu gũa mũcana. Ito yicõri minijuara wijũ sãjacũ gũa Jesús rãca. Ito gũa ñaroca riti paia Ƴjarã, ito yicõri judio masa bũcurã ejacã Jesure seniĩarona:

—¿Ñimũ ĩ rotijare ito bajiro yati mũ? ¿Ñimũ mũre, “Ito bajiro yiba”, yicati? yicã ĩna Jesure.

²⁴⁻²⁵Ito bajiro ĩna yija tuocõri:

—Yũ cũni mũare ado bajiro seniĩagũ ya. Yũre mũa cũdija berojũa, “Ĩ rotirena ya yũ”, mũare yicũja maji. ¿Ñimũ cõayijari Juanre masare ĩ idẽ gutoni? ¿Dios cõayijarite? ¿Masajũa cõayijarite? yi seniĩaquĩ Jesús ĩnare.

Ito ĩ yija tuocõri, ĩnamasiti gãmeri tuoĩa bũsicã ĩna: “ ‘Dioti Juanre idẽ gu rotiĩ’, mani yija, mũcana manire seniĩagũ yiguĩji Jesús: ‘¿No yija ĩre tuorũnũbiticati mũa?’ yi seniĩagũ yiguĩji Jesús manire. ²⁶‘Masati Juanre idẽ gu rotiĩ’, mani yijama, masa bũto ti tudirã yirãji manire. ‘Diore goti ĩsiri masũ ñami Juan’, yi tuoĩarãji masa”, yi gãmeri tuoĩa bũsicã ĩna. ²⁷Ito bajiro tuoĩacõri:

—“Ĩti Juanre idẽ gu rotiĩ”, yi masibea gũa, yicã ĩna Jesure.

Ito ĩna yija tuocõri, ado bajiro cũdiquĩ Jesús ĩnare:

—Ito bajijama ĩ rotirenati adi jeyaro tiyamani ya yũ, yi masibea yũ cũni mũare, yiquĩ Jesús ĩnare.

Sigũ ĩ rĩa jũarãre moa rotire Jesús ĩ riasore gaye

²⁸Mũcana judio masa bũcurãre ado bajiro seniĩaquĩ Jesús:

—Mũare oca gotigu ya yũ. ¿Itire no bajiro tuoĩarã yirãjida mũa? Sigũ ñayijũ jũarã rĩa cutigu. ĩ macũ ñasũogũre ado bajiro yiyijũ ĩ: “Macũ jane yũ ya ote Ƴyere moagũ wacu ya mũ”, yiyijũ ĩ, ĩ macũre. ²⁹“Ãmobeja yũ, wabicũja yũ”, yiyijũ ĩ ĩre. Ito bero gaje tuoĩa quenocõri moagũ wayijũ ĩ ĩja.

³⁰Ito yija ĩ macũ gãjire cũni ito bajiroti moa rotiyijũ. “Baũ, moagũ wacũja cũna yũ”, yiyijũ ĩ ĩja ĩ jacũre. Ito yibojagũti moagũ wabisijũ ĩ. ³¹Mũa tuoĩaja, ¿ñimũjũa ñayijari ĩ jacũ ãmoro bajiro yigu? yi seniĩaquĩ Jesús ĩnare.

Ito ĩ yija tuocõri:

—Cajero ĩ moa rotisũorũ quenañi, yicã ĩna Jesure.

Ito ĩna yija tuocõri, ado bajiro yiquĩ Jesús:

—Riti mware gotia yu. Ujaräre yiari waja seni isiri masa ito yicöri wedi masa romia mua riojuaju Dios i rotiroju ejarä yiräji ina. ³² Juan idé guri masu, “Ado bajirojua mua ñaja quena”, yi mware i riasobojaja, ire tuorünubisija mua. Ito bajibojarocati ujaräre yiari waja seni isiri masa, ito yicöri wedi masa romia cuni ire tuorünunü ina. Ina ito bajiro Juan idé guri masure ina tuorünuja, tibojaräti mua ñeñaro yirise jidicä amobisija mua. Ito yicöri Juan idé guri masure tuorünubisija mua, yiqui Jesús inare.

Queno moare rujeo masimena Jesús i yire gaye

(Mr 12.1-12; Lc 20.9-19)

³³ Gaje goti masiore ocana mware gotigu ya yu: Sigü weseca cutigu i ya weseju uyé oteyiju. Iti wesere ote ticöri iti wesere camotayiju i. Ito yicöri uyé ide bijerotiju coju meniyiju i. Iti wese ñacöri tirünurocu ümacüju casabo meniyiju i. Ito yija bero co rumu gäjeräre tirünu wasoa rotiyiju. Ito yicöri gajeroju wacoayiju i. ³⁴ Ito bajiri co rumu uyé iti rica cutiroca, “Yu ye ñaroti jabeto uyé ämitëña”, yirocu i ya moari masare cöayiju i. ³⁵ Iti weseju ina ejaja ticöri, ito coderi masa inare ñayijarä. Sigüre jayijarä, ito yicöri gäjire siayijarä, ito yicöri gäjire gütana reayijarä. ³⁶ Iti oca tuocöri jajarä busa i ya moari masa cöayiju i, i ya wesecaju i ye ñaroti ina ämitoni. Iti weseju ina ejaroca, iti wese code ñana ito riojua ejanare ina yiado bajiroti yijarä mucana.

³⁷ Ito bajiro ina yija tuocöri, “Yu macujuare rücuööräji”, yi tuoïacöri i macure wa rotiyiju i. ³⁸ I macu ejaja ticöri, ado bajiro tuoïa busiyijarä ina: “Adi sita uju godagoja äni macuti ñami wasoarocu, ito bajiri ire mani siaya, mani ya sita ñaro yiroja ija”, yi gämeri tuoïa busiyijarä ina. ³⁹ Ina tuoïado bajiroti ire söju ñia ämi wacöri siayijarä ina, yiqui Jesús inare.

⁴⁰ Ito bero mucana ado bajiro inare seniäquü Jesús:

—¿I tudi ejaja no bajiro yigu yigüjida inare, iti wese codeanare? yi seniäquü Jesús inare.

⁴¹ Ito i yija tuocöri, ado bajiro cudicä ina Jesure:

—Inare ti maiari meje inare siagü yigüji i iti sita uju. Ito i yija bero gäjeräre tirünu wasoa rotigu yigüji i. Uyé iti bucuaroca iti wese ujure isironare inare wasoagu yigüji i, yicä ina Jesure.

⁴² Jesujua ado bajiro yiqui inare:

—¿Dios oca tuti tiäbeati mua? Ado bajiro gotia iti tuti:

Güta wi meniri masa coga gütagäre cöayijarä ina. Ito bajibojarocati gaje güta rétoro quenarica ñayiju itiga ina cöbojaraga. Itiga gütagäna suoriti quenari wi menigü yigüji Dios. Itiga gütagä manija, menire ma. Ito bajiro ämoñi Dios mani Uju. Ito bajiri itire masicöri buto tuoïa wanua mani, yi gotia Dios oca.

Ito bajiro yini Dios, yure rétaroti tuoïa yugu. ⁴³ Ito bajiri mware ado bajiro gotia yu: “Ire tuorünuräre i rotiroju miojugu yigüji Dios”, mware gäjerä gotibojarocati tuorünubisija mua. Ito mua yija ticöri, gäjerä masa i oca ina masiroca yini Dios.

Ito bajiri ire ña queno cudija ticõri, ñnareama miojugu yiguñi Dios, ñ rotiroju. Mña judio masare ñ rotiroju muare cõ yubojani Dios. Muare yubojacõri gajerãre cõgũ yiguñi Dios ñ rotiroju. Ñ ya weseca ejabuã amõãre bajiro bajirã cõgũ yiguñi Dios ñ rotiroju. ⁴⁴Jijũ gũta gaye muare yu busirise ado bajiro baja: No gũtagã joe quedi jeagure ñ ya gõari jearo yiroja ire. Ito yicõri itiga gũtagã sigũre iti quedi jeaja, mano abocõro yiroja. No yure tuõrũnabicu, catitĩnabicu yiguñi. Ito yicõri noa jeame ñjuroju cõa amõãre yu cõaja, ruyuriorocu cõagũ yigujã yu, yiquĩ Jesús ñnare.

⁴⁵Goti masiore oca Jesús ñnare gotija tuõcõri, “Manireti busiami”, yire masiri seyocã fariseo gaye tuõiarã, paia ñjarã cuni. ⁴⁶Ito bajiri Jesure ñia amõri seyobojacã ña. Ito bajiro tuõãbojarãti masare giurã Jesure ñnabiticã ña. “Diore goti ñsiri masu ñami Jesús”, masa ña yi tuõãjare, masare tuõ giucã ña.

Ãmo siare gaye Jesús ñ riasore oca
(Lc 14.15-24)

22 ¹Mucana masare goti masiore ocana gotisõoquĩ Jesús:
²—“Ado bajiro baja, ire tuõrũnũrãre ñ rotiroju Dios ñ miojuri rãmũ”, yirocu ado bajiro gotiquĩ Jesús: Sigũ ñju ñ macu ñmo siare basa meniyyju. ³“Ti ejabuaronare jitẽña”, yirocu ñ ya moari masare cõayiju ñju. Ito ñ yija tuõcõri, jirã wabojayjarã ña. ña jibojarocati wadi amobisjarã ña. ⁴Ito bajija ticõri, gajerã ñ ya moari masare cõayiju ñju. “Gua ñju muare bocatimi. Ñ ya wecua ri cutirãre sia rotimi ñ. Muare bocati ñami ñ. Ito bajiri ñ macu ñmo siari rãmũ tirã waya mña cuni, yiba ñnare”, yi oca cõayiju ñju. ⁵Ito yija tuõcõri, jirã wabojayjarã ña mucana. Ito bajibojarocati ire cudi amobisjarã ñ oca cõana. Ito bajiri ña gotibojaroca riti, gãjiama ñ ya wesecaju wayiju. Gãji ñ gajeoni ñ ñsiroju wayiju. ⁶Gajerãma ñju ñ cõanare boca ñayijarã. Ito yicõri ñnare jayijarã. Ito yirã riti ñnare siacõyijarã ña. ⁷Itire tuõcõri buto junisiniyyju ñju. Ito bajiri ñ ya surarare ñnare sia rotiyiju, ito yicõri ña ya wirire soe rotiyiju ñ. ⁸Ito yija bero gajerã ñre moa ñsiri masare ado bajiro yiyiju ñ: “Yu macu ñ ñmo siaroti gaye ñajediro ñacã. Jijũ yu oca cõabojanama wadire ma ñnare. ⁹Cuto gudareco wasa. Itoju mari mña ti bujaro bajiroti baba cutiba”, yiyiju ñju ñre moa ñsiri masare. ¹⁰Ñ rotiro bajiroti masa miojuyjarã ña mariju. Quenarã, ñenarã, ña bujaro bajiroti miojuyjarã ña. Ito bajiri ñju ya wi dajacoayiju.

¹¹Ito yija ñ oca cõanare tigu sãjayiju ñju. Sigũ ñ ñmo siara rãmũ sãñare gaye yutabuju ñ sãñabeja tiyyju ñ. ¹²Ito bajiri ado bajiro yiyiju ñ ñre: “Yu baba, ¿no yija ñmo siare gaye yutabuju sãñabeati mu?” yiyiju ñ ñre. Ito ñ yija cudibisiju yutabuju sãñabicu. ¹³Ito yija bare jeori masare ado bajiro yiyiju ñju. “Ñ ya gubori, ñ ya amõri rãca siaya ñnare. Ito yicõri rãitãroju cõaña ñre. Itoju ejacõri ñenãro tõbujagu yiguñi. Ito bajiri oticõri buto tuõã oca jaigu yiguñi ñ”, yiyiju ñju ñ ya bare jeori masare. Ito bajiroti bajiroja ñmacũju Dios ñ rotiroju cuni. ¹⁴Jãjarãre jibojami Dios, ñ ñnaroju ña ejatoni. Ito bajibojarocati coriarãti ñ beseana goti ejarã yirãji ñ ñnaroju, yiquĩ Jesús ñnare.

**Ujaräre mani waja ruyurioja ñaro bajiroti waja yija quena,
Jesús i yire gaye
(Mr 12.13-17; Lc 20.20-26)**

¹⁵Ito i yija tuocõri, fariseo gaye tuoïarã wacoacã. Sîgũre bajiro tuoïacõri, “Josari oca ïre mani seniïaja, cudi masibicũ yiguiji i. Ito bajiro i cudi masibeja tuocõri, ‘Ïre seti ña’, yirã yirãji mani”, yi tuoïari seyobojacã ïna. ¹⁶Ito bajiro tuoïacõri ïna ñaräre ito yicõri Herodes ñarã räca, “Ado bajiro Jesure seniïatëña mua”, yi ñucayijarã ïna. ïna cõana Jesús tũ ejacõri ado bajiro seniïacã ïna Jesure:

—Tũoya riasori masũ mũ. “Riojo gotigũ ña mũ”, yi masia gũa. “Ado bajiro ãmoami Dios”, yi riasogũ ñaro bajiroti masare riasoa mũ. Masa busirise tuorũnubicuti quenarise riasogũ ña mũ. Gãjerã ñasari masa gajero bajiro ïna riasobojarocati, ïnare tuorũnubicuti, ñasarise riasoa mũ. ¹⁷Ito bajiro mũ yija, no bajiro mũ tuoïare gaye tuo ãmoa gũa. ¿Roma cuto gagũ ujũ gũare i waja senija, waja yirãjida gũa, waja yibeatite gajerea? yi seniïabojacã ïna Jesure.

¹⁸“Yũ wisatoni ito bajiro yũre seniïama ïna”, yi masiri seyoquĩ Jesús. Ito bajiri ado bajiro yiquĩ ï ïnare:

—“Queno yirã ña gũama”, yirã ñabojarãti queno yirã meje ña mua. ¿No yija yũ tuo wisatoni ito bajiro seniïati mua? ¹⁹“Sita waja, waja yiroti cuji niyeru cuji yũre ïõña”, yiquĩ Jesús ïnare.

Ito yija niyeru cuji ïre ïocã ïna. ²⁰Iti cuji niyeru cuji ticõri, ado bajiro ïnare seniïaquĩ Jesús:

—¿Ñimũ ya rio ñati adi rio? ¿Ñimũ wame, wame cutiati iti? yiquĩ Jesús ïnare.

²¹—Gobierno masa ujũ César wame cutigũ ya rio ña. Ito yicõri i wameti ña iti, yicã ïna Jesure.

—Gobierno masare mani waja ruyurioja ñaro bajiroti waja yija quena. Ito bajiroti manire Dios i rotija ñaro bajiroti ïre cudija quena, yiquĩ Jesús ïnare.

²²Ï queno cudi masija tuocõri, rujũ ucacã ïna. Ito bajiri mũcana tũdi seniïa uyabiticã ïna ïja. Seniïamenati wacoacã ïja.

**¿Godacõri tũdi caticoarã yirãjida masa? yi Jesure ïna seniïare gaye
(Mr 12.18-27; Lc 20.27-40)**

²³Iti rãmũti saduceo gaye tuoïarã Jesure tirã ejacã. “Masa ïna godaja bero mũcana tũdi catire ma”, yirã ñama saduceo gaye tuoïarã. Ito bajiro tuoïarã ñari, Jesure seniïarã ejacã ïna:

²⁴—Tũoya riasori masũ mũ. Moisés ñayorũ i yire gaye mũre seniïarã wadibu gũa. Ado bajiro yiñi Moisés ñayorũ: “Sîgũ manajo cutigũ rĩa macũti i godagoja, i bero gagũ i rĩjorũ manajo godore manajo cutija quena. Ito bajiri iso räca ñacõri, rĩjorũ ñajacũre wasoagũ rĩa cuti wasoagũ yiguiji i”, yi ucañi Moisés ñayorũ. ²⁵Gũa wato sîgũ rĩa jua ãmojeno ñabojañi. Sîgõreti manajo cutibojañi ïna. Ñasũogũ isore manajo cutisũobojañi. Rĩa macũti godañi i. Ï godaja bero

gãji ï ocabaji wasoabojañi. Rĩa macuti godañi ï cuni. 26 Ñ bero gãna cuni ito bajiroti manajo cutibojañi. Rĩa manati godañi ïna cuni. Ito bero sũsagũ cuni ito bajiroti bajiyiũ. 27 Iso manũjusabatia ïna goda jedija bero iso cuni godacoañi ïja. 28 Godabojarãti mũcana tũdi ïna catija bero, ¿ñimũja ñaguĩjida iso manũjũ ñasarocu ïna ñarocõti isore ïna manajo cutija bero? yi seniĩacã ïna Jesure.

29 Ito ïna yija, ado bajiro cũdiquĩ Jesũs:

—Dios oca tuti gaye queno tuoĩa masimena ña mũa. Dios ï masirise masirã meje ña mũa. Ito bajiro yũre mũa seniĩabojaja, queno tuoĩacõri meje seniĩa mũa. 30 Ado robojũa baja. Godana mũcana tũdi caticõri manajo cũtire ma. Ito yicõri ïna rĩa romiare manũjũ cũti rotimenaji ïna. Ñmacũjũ ángel mesa robo bajiro bajirã ñarã yirãji ïna. 31 ¿Masa ïna godaja bero mũcana tũdi catirã yirãjida ïna mũcana? yija, Dios oca tuti tiya. Dios oca tuti gaye ti jeorã meje ña mũa. Ñmasiti ado bajiro gotiami ï oca tutina: 32 “Abraham, Isaac, Jacob ñayoana Ñjũti ñasotia yũ”, yi gotiami Dios ï ocana. Ito bajiri godana yũ meje ñami Dios, catirã Ñjũjũa ñami, yi tuoĩa mani, yiquĩ Jesũs ïnare.

33 Ito bajiro Jesũs ï riasore gaye ï gotija tuocõri, ucacã masa.

Dios ï rotirise ñasarise gaye

(Mr 12.28-34)

34 Ito bajiro saduceo gaye tuoĩarã Jesũs ï oca taja tuoyijarã fariseo gaye tuoĩarã. Ito bajiri iti tuocõri minijuayijarã fariseo gaye tuoĩarã. 35 Sigũ ïna wato judio masa rotirise riasori masũ ñañi. “No bajiro Jesũs yũre ï cũdija tuocũja”, yirocũ ado bajiro Jesure seniĩagũ ejaquĩ ï.

36 —Riasogũ, ¿dise ñati Dios ï rotirise ñasarise mũa tija? yi seniĩaquĩ ï Jesure.

37 Ito ï yija tuocõri, ado bajiro cũdiquĩ Jesũs:

—Mani Ñjũ Diore bũto maija quena. Mani tuoĩarisenã, ito yicõri mani ya usina Diore mani maija quena. Ñ sigũreti tuorũnũcõri, bũto ïre mani maija quena. 38 Iti ña ñasarise Dios ï rotire. 39 Iti bero rotire gaye itire bajiro bajiriseti ña. Ado bajiro baja iti: “Mũa ya rujure mũa mairo bajiroti gãjerã mũa ñarãre maija quena”, yi rotiami Dios. 40 Iti juajiti ña Dios ï rotirise ñasarise. Iti juaji gaye Dios ï rotire gaye mũa cũdija, Moissũs ñayoru ï rotire gaye, Diore goti ïsiri masa ïna riasorise gaye cuni yiro bajiro cũdirã ñarã yirãji mũa, yiquĩ Jesũs ïnare.

¿Ñimũ janami ñayijari Cristo mũa tija? yi Jesũs ï seniĩare gaye

(Mr 12.35-37; Lc 20.41-44)

41 Fariseo gaye tuoĩarã gũa tũti ïna minijuaroca maji, 42 ado bajiro seniĩaquĩ Jesũs ïnare:

—¿Ñimũ ñati Cristo, Dios ï cõarũ mũa tija? Ito yicõri, ¿ñimũ janami ñati ï? yiquĩ Jesũs ïnare.

—David ñayoru janerãbatia janamiti ñami ï, yicã ïna Jesure.

43 Ñna ito yija tuocõri, ado bajiro yiquĩ Jesũs ïnare:

—Riti mua tuoĭaja, ĩno yija David ñayoru ĩre tuoĭagũ, “Yũ Ʋju”, yiyijari? Tite mua. Ado bajiro ucañi David ñayoru. Espĭritu Santo ĩ rāca ĩ ñajare ado bajiro ucañi ĩ:

44 Yũ Ʋjure ado bajiro yiñi Dios: “Yũ ya riojocaduĭa rujiya, mu wajanare mu rotiroca yigũ yigũja yũ”, yiñi Dios yũ Ʋjure, yi ucayoñi David.

45 David ñayoru janerabatia janami ĩ ñaja, “Yũ Ʋju”, yibitiboru David ñayoru, yiquĩ Jesũs ĩnare.

46 Ito bajiro ĩ gotija tuoĉori, sĭgũjua cuĉi masibiticã Jesũs ĩ gotirisere. “Masi yucãguĭji ĩ”, yi tuoĭacõri itocõti ĩre seniã jidicãcã ĩna ĩja.

“Seti ña muare”, fariseo gaye tuoĭarãre Jesũs ĩ yire gaye
(Mr 12.38-40; Lc 11.37-54; 20.45-47)

23 ¹Ito yija bero ado bajiro yiquĩ Jesũs masare, gua ĩ rāca riasotirãre cuni:

²—“Moisės ñayoru ĩ rotire gaye tuo masirã ñama fariseo gaye tuoĭarã, judio masa rotirise riasori masa cuni”, yama masa. ³Ito bajiri ĩna rotiro bajiroti cuĉiba. Jeyaro ĩna rotiro bajiroti cuĉiba. Ito bajibojarocati ñeñaro ĩna yirisere yibeja itireama. “Ado bajiro ya gua”, yibojarãti ricati yama ĩna. ⁴“Cuĉi masia mani”, masare rotiamã ĩna. Ito bajibojarocati ito bajiro riti ĩnare roti uyama ĩna. “Ito bajiro yiya mua”, yibojarãti ĩnamasiti ito bajiro yibeama ĩna. ⁵Jeyaro ĩna yirise, “Queno yirã ñama ĩna”, masa ĩna yi tijaro yirona ito bajiro yibojama ĩna. Masa ĩna tiro riojo ĩna ya rioweca, ĩna ya ricajudori cuni Dios oca jũ wõbojama ĩna, “Gãjerã guare ti seyojaro”, yirona ito bajiro yibojama ĩna. Ito yicõri yutabujuri yoarise gãjerã rēto busaro

rore gaye sãñabojama ĩna. “Gãjerã guare ti seyojaro”, yirona ito bajirise sãñabojama ĩna. ⁶ĩna ba ruji ãmoja, quenari cumuro ba ruji ãmoama ĩna. Minijuara wirijũ ĩna ruji ãmoja, rũcũbuoraju riti ruji ãmoama ĩna. ⁷Mariju masare ĩna bocaĭa, queno rũcũbuore rāca seniãre ãmoama ĩna. Ito yicõri, “Yũre riasogu”, masa ĩna yire ãmoama ĩna, yiquĩ Jesũs guare.

⁸Muama ricati yija quena. “Yũre riasogu”, masa ĩna muare yiroca yibeja. Mani jeyaro sĭgũ rĩare bajiro bajirã ña mani. Yũ Cristo, Dios ĩ cõaru yũ sĭgũti ña muare riasori masũ. ⁹Sĭgũti ñami mani Jacũ. ĩti ñami Dios ũmacũju gagũ. Ito bajiri adi sita gãnare, gãjerã ũmuare,



(San Mateo 23.5)

“Cuna”, yibeja mua. ¹⁰“Yu ujju”, yi rotibeja gajeräre. Yu Cristo, Dios i cõaru sigüti ña mua Uju. ¹¹Sigü mua rãca gagu muare i ejabuaja, i ñagü yiguüji ñasagu. ¹²No gajerã riojua gagu ña amobojaguti ñabicu yiguüji i. Ito bajiri berojua gagu tujagu yiguüji i. Sigü, “Gajerã rëtoro ñasagu ña yu”, yibicu i ñagü yiguüji ñasagu, yiqui Jesús guare.

¹³Fariseo gaye tuoïaräre, judio masa rotirise riasori masare cuni busigu ado bajiro busiqui Jesús:

—Bujato bujarã wãna ya mua. “Queno yirã ña gua”, yibojarãti mua yiro bajiro yirã meje ña mua. Dios i rotiroju gajerã ña sãjabitoni itire camota mua. Gajerã ña sãja amobojarocati ñare camota mua. Ito bajiri mua cuni sãjamena yirãji, yiqui Jesús ñare.

¹⁴Bujato bujarã wãna ya mua fariseo gaye tuoïarã, judio masa rotirise riasori masa mua cuni. “Queno yirã ña gua”, yibojarãti mua yiro robo yirã meje ña mua. Manuju godagoana romiare ruocõri jairoguti ñare waja senia mua. Ito bajiro yicõri ña rucojarisere ñarocõti emã jeoa mua. Queno yimena ñabojarãti masa muare tuo wanutoni yoari ña tiro riojo Diore busitobuabojã mua. Ito bajiri buto busa muare waja senigü yiguüji Dios. Ito bajiri gajerã rëtoro tõbujarã yirãji mua, yiqui Jesús ñare.

¹⁵Bujato bujarã wãna ya mua fariseo gaye tuoïarã, judio masa rotirise riasori masa mua cuni. “Queno yirã ña gua”, yibojarãti mua yiro robo yirã meje ña mua. “Mani robo gãji i tuoïaja quena”, yi tuoïabojacõri jeyaro masare riaso ucua mua. Sigü muare bajiro tuoïaroca mua yigure buto busa ñeñaro i tuoïaroca ya mua. Ito bajiri mua rëto busaro ñeñaro yicõri jeame ujuroju warujami i cuni, yiqui Jesús ñare.

¹⁶Bujato bujarã wãna ya mua. Cajea mana gajerã cajea manare tãa wabojarãre bajiro bajirã ña mua. Ado bajiro gajerãre yiboja mua: “Dios ya wi wamenati ado bajiro yicuja yu’, yibojarãti mua yiro robo yibeja cuni no yibea iti. ‘Dios ya wiju oro wamena ado bajiro yicuja yu’, mua yija, yiro bajiroti yiba itireama”, yiboja mua gajerãre. ¹⁷Tuo masimena, cajea manare bajiro bajirã ña mua. ¿Disejua ñati ñasarise mua tija? ¿Orojua ñasatite mua tija? ¿Dios ya wiju oro cuji ñariju masa ña ru cubuoriju ñatite ñasariju? yiqui Jesús ñare. ¹⁸Gaje ado bajiro masare yiboja mua: “Diore ña soe isisotira casabo wamena ado bajiro yicuja yu’, yibojarãti mua yiro robo yibeja cuni, no yibea iti. ‘Diore ña soe isisotira casabojã ire isiroti wame rãca ado bajiro yicuja yu’, mua yija, mua yiro bajiroti mua yija quena itireama”, yiboja mua masare. ¹⁹Tuo masimena, cajea manare bajiro bajirã ña mua. ¿Mua tija disejua ñati ñasarise? ¿Diore isiroti iti ñati ñasarise, gaje Diore ña soe isisotira casabojã ire isiroti ñarijujua ñasatite? yiqui Jesús ñare.

²⁰Ado bajiro baja. Tnote mua. No, “Diore ña soe isisotira casabo wamena ado bajiro yicuja yu’”, yigu ite casabo wamena meje riti, “Ado bajiro yicuja yu’”, yiguüji. Diore soe isira casabojã jesarise rãca, “Ado bajiro yicuja yu’”, yigure bajiro bajiami iocü. ²¹No, “Dios ya wi wame rãca, ado bajiro yicuja yu’”, yigu ite wi wame rãca riti meje yiguüji. Dios ite wi ujju wame rãca, “Ado bajiro yicuja yu’”,

yigure bajiro yiguĩji ïocũ. ²²“Ũmacũju Dios ĩ ñaro wame rãca ado bajiro yicũja”, yigu Dios itoju rotigu wame rãcati yigure bajiro yami ïocũ, yiquĩ Jesús ĩnare.

²³Bujato bujarã wãna ya mua fariseo gaye tuoĩarã, judio masa rotirise riasori masa mua cuni. “Queno yirã ña gua”, yibojarãti mua yiro robo yirã meje ña mua. Jũ queno sutirise, anís, menta, comino waja rucubiti gaye mua rucõja, Moisés ñayoru ĩ rotiado bajiroti Diore jabeto ĩsia mua. Ito bajibojarocati rotire ñasarisere tuorũnubea mua. Ado bajiro baja ñasarise, queno yire, gãjerãre ti maire, Diore tuorũnure, itocõti ña ñasarise. Iti gaye yitĩñama mua, Diore jabeto ĩsire gaye cuni jidicãbeja mua. ²⁴Cajea mana gãjerã cajea manare tũa wabojarã bajiro bajirã ña mua. Ado bajiro bajirã ña mua. Ide wato mutarãcã ñarãre ĩna idiroto riojua queno besecãbojacõri camello jaigu bucure idi yucõarã bajiro bajirã ña mua. Rotire ñasabiti gayeama queno tirũnua mua. Ito bajibojarocati ñasarisereama queno tirũnubea mua, yiquĩ Jesús ĩnare.

²⁵Bujato bujarã wãna ya mua fariseo gaye tuoĩarã, judio masa rotirise riasori masa mua cuni. “Queno yirã ña gua”, yibojarãti mua yiro robo yirã meje ña mua. Somotẽro idira tẽrori cuni joejua riti coea mua. Totijuaama ñarocõti ñeri cutia maji. Mua guaja, joe rujũ riti coea mua. Jubejuama ñeñaro tuoia maji. Gãjerã ĩna rucorise ti uorã ĩnare ruoa mua. Ito bajiri bujato bujarã wãna ya mua. ²⁶Mua fariseo gaye tuoĩarã cajea manare bajiro bajirã ña mua. Somotẽro, idira tẽro cuni totijua mu coesũoja joejua cuni ñeri mano yiroja. Ito bajiroti ñeñaro mua tuoĩarise cuni mua jidicãja, jeyaro queno yirã ñarã yirãji mua, yiquĩ Jesús ĩnare.

²⁷Mua fariseo gaye tuoĩarã, judio masa rotirise riasori masa cuni bujato bujarã wãna ya mua. “Queno yirã ña gua”, yibojarãti mua yiro robo yirã meje ña mua. Masari cuma bajiro bajirã ña mua. Ado bajiro baja masari cuma, joeti mani tija queno boti quena. Ito bajibojarocati jubejuama gãrigoti ñaroja, ito yicõri jogare buorise ñaroja. ²⁸Ito bajiro bajirã ña mua. Masa ĩna tija, queno yirã bajiro baja mua. Ito bajibojarãti jubejuama ñeñaro tuoĩarã ña mua. “Queno yirã ña gua”, yibojarãti ñeñaro yirã ña mua, yiquĩ Jesús ĩnare.

²⁹Mua fariseo gaye tuoĩarã, judio masa rotirise riasori masa cuni bujato bujarã wãna ya mua. “Queno yirã ña gua”, yibojarãti mua yiro robo yirã meje ña mua. Diore goti ĩsiri masa ĩna godaja bero masari cuma menia mua. Queno yirãre masari cuma queno tirũnua mua, ito yicõri tija seyorise iti joere jeoa mua. ³⁰Ito yicõri ado bajiro ya mua: “Gua ñicũsabatia ĩna catijama, Diore goti ĩsiri masare ĩna sãroca ĩnare ejabũabitiboana gua”, yi tuoia mua. ³¹Ito bajiro mua yija, “Diore goti ĩsiri masare sãyoana janerãbatia ña gua”, yi tuoia mua. ³²Mua ñicũsabatia ĩna yiyore bajiroti ya mua cuni adi rumuri gãna, yiquĩ Jesús ĩnare.

³³Ãña bajiro bajicõri ĩ robo junirã ña mua. Jeame ujuoru mua tũbujaroti rẽtare ma muare. ³⁴Queno tuo masijaro ĩna yirocu, Diore goti ĩsiri masa, riasori masa gãjerã queno tuoĩarãre cuni cõabojagu yiguja yũ mua tu. ĩnare cudi amomena ĩnare sãrã yirãji mua. Gãjerãreama yucutẽoju jaju sãrã yirãji mua. Gãjerãre

minijuara wiju ñare jarã yirãji mua. Ñare ñeñaro yirona co cuto ruyabeto ñare suyarã yirãji mua. ³⁵Abel queno yigu ñayorure siasuoyijarã mua ñicusabatia ito yicõri Berequiás macu Zacaríasjure siasusayijarã. Dios ya wiju Diore ña soe ñisotira casabo tu Zacaríasre sñayija mua. Mua ñicusabatiare bajiroti ya mua cuni. Ito bajiri queno yirãre ña siagore ñajare seti ña muare cuni. ³⁶Riti muare gotia yu. Mua adi rumu gånare ititi seti ña ejaro yiroja muare, yiqui Jesús ñare.

Jerusalén gånare tuoña maigũ Jesús i otire gaye
(Lc 13.34-35)

³⁷Jerusalén gånã muare cõañi Dios ñre goti ñsiri masa, ito yicõri i oca riasori masare. Ñre goti ñsiri masa, i oca riasori masa cuni muare gotirona cõañi Dios. Ito bajibojarocati ñare sñayija mua. Coji meje muare mioju ñambojacu yu. Cara iso riare caero rocaju iso miojuro robo bajiro, muare yi ñambojacu yu. Ito bajiro yu yi ñambojarocati ñamobiticu mua. ³⁸Queno tuoñaña mua. Mua wiri wagora wiri bajiro tujaro yiroja. Ito yicõri muare jidicãgũ yiguiji Dios. ³⁹Riti ado bajiro muare gotia yu: “Gũare yiarĩ Dios i cõaru ña mu. Mũre queno yĩni Dios”, mua yiroto riojua mucana juaji yure timena yirãji mua, ya yu muare, yiqui Jesús masare.

Dios ya wi õjea bate godaro yiroja, Jesús i yire gaye
(Mr 13.1-2; Lc 21.5-6)

24 ¹Ito bajiro i yija bero, Dios ya wi budi wasuõquĩ Jesús. Ñre suacõri ado bajiro yibojacu gña ñre: “Adi wiri ti ucuto mani”, yibojacu gña ñre. ²Ito bajiro gña yibojarocati ado bajiro yiqui Jesús guare: —¿Adi wirire tiati mua? Riti muare gotia yu. Adi wiri ñarocõti õjea bate quedicoaro yiroja. Ito bajiri adi wi gaye gũtagã gajega joe jesabeto yiroja. Ñarocõti godacoaro yiroja, yiqui Jesús guare.

Adi õmũari jediroto riojua ado bajiro rõtaro yiroja, Jesús i yire gaye
(Mr 13.3-23; Lc 21.7-24; 17.22-24)

³Ito yija bero Olivos wame cutiri turia joeju wacu gña ñja. Ito ejacõri Jesuama eja rũjũquĩ. Ito i rujiroca gãjerã ña manija ticõri, ado bajiro ñre seniãacu gña:

—“Iti rumu wi quediyo yiroja”, mu yi gotire ñmoa gña. ¿No bajiro iti bajija ticõri, “Jesús ejaqu wagu yami”, yi masirã yirãjida gña? ¿Ito yicõri no bajija ticõri, “Adi macãrucũro jediro ya”, yi masirã yirãjida gña? yicu gña Jesure.

⁴Ito bajiro gña yija tuocõri, ado bajiro cudiquĩ Jesús guare: —Queno masima mua gãjerã muare ruobe yirona. ⁵Jãjarã ruori masa ejarã yirãji. “Yuti ña Cristo, Dios i cõaru”, yirã masa ejarã yirãji. Jãjarãre ruorã yirãji ña. “Diore busi ñsirã ña gña”, ña yija jãjarã masa tuobojarã yirãji ñare. ⁶“Masa gãmeri sñarã yiyijarã”, yire oca tuorã yirãji mua. “Gaje cuto gña jane gãmeri sñasuooyijarã”, yire gaye guijorise oca tuorã yirãji mua. Iti ocare mua

tuoja güibeja mua. Ito bajiroti bajiro yiroja bajirea. Ito bajibojarocati jabeto ruya adi macãrucuro iti jediroto. ⁷Co masa gaje masa rãca gãmeri sãrã yirãji. Ito yicõri co sita gãna gaje sita gãna rãca gãmeri sãrã yirãji. Jaje cutori ñio ñaro yiroja. Ito yicõri jaje ñarise ñaro yiroja. Ito yicõri jaje cutorire sita uero yiroja. ⁸Jeyaro iti rëtaja bero buto busa tõbujare gaye ñaro wado yiroja.

⁹Muare ñiacõri gãjerã muare ja ajetoni muare ñsirã yirãji ñna. Aje tiõcõri muare sãrã yirãji ñna. Yu ñarã mua ñajare muare ti tudirã yirãji adi sita gãna jeyaro. ¹⁰Iti rumu jãjarã yure tuorũnubojana tuoia jidicãrã yirãji ñna. Gãmeri ti junisinirã yirãji ñna. Gãmeri oca menicõri gãjerãre ñiaroca yirã yirãji ñna. ¹¹Jãjarã ruori masa ñarã yirãji. “Diore busi ñsirã ña gua”, ñna yija jãjarã masa tuobojarã yirãji. ¹²Jeyaro ñeñarise yirã yirãji masa. Ito bajicõri gãmeri ñna ti mairisere gãmeri jidicãrã yirãji ñna. ¹³No yure tuorũnugũ ñ jidicãbeja adi macãrucuro jedi wari rumu ñre masogũ yiguĩji Dios. ¹⁴“Ñre tuorũnrãre ñ rotiroju miojugu yiguĩji Dios”, yire oca adi sita ñarocõreti ejaro yiroja. Ito bajiri masa jeyaro iti oca masirã yirãji. Ñna masi jediroca adi macãrucuro jediro yiroja.

¹⁵‘Diore goti ñsiri masu Daniel ñayoru ado bajiro ucañi: “Adi macãrucuro jedi wari rumuri sigũ masare ñeñaro ñna yiroca yigu goagu yiguĩji. Ñ ñami masare ruyuriogu wadiru. Dios ya wi rucuboraju ñ rügõja tirã yirãji mua”, yi ucañi Daniel ñayoru. Mua adi papera ticõri, itire queno tuoiaña. “Jabeto ruya adi macãrucuro iti jediroto”, yi masiña mua. ¹⁶Ito bajiro bajiri rumu no Judea sitaju ñarã gãtagũju rudi warujarãji ñna. ¹⁷No ñ ya wi queno jesagu ñ ya wi totiju gajeoni ñarisere rujicõri amibitirujaguĩji ñ. ¹⁸No ñ ya wesecaju moagũ tãdi wacõri ñ ya yutabujuri amibitirujaguĩji ñ. ¹⁹Ito bajiro bajiri rumu romia macu sãnarã, gãjerã rucorã cuni quenabeto tõbujarã yirãji ñna. ²⁰Buto usari rumu, tujacãra rumu cuni iti ito bajija, rudi amomena Diore senima mua. ²¹Ito bajiro bajiri rumuri buto tõbujarã yirãji masa. Adi macãrucuro ñasura rumuri masa ñna tõbujaiabiti rëto busaro tõbujarã yirãji ñna. Iti ñna tõbujaja bero mucana iti robo bajiro bajirise tõbujamena yirãji masa. ²²Yoari masa tõbujaroca Dios ñ yiro bajija sigũ cati ruyagu maniboru. Ñ beseanare ti maicõri yoari mejeti iti jediroca yigu yiguĩji Dios.

²³‘Iti rumuri, “Tiya ado ñami Cristo”, ito yicõri “Titẽña õ ñami Cristo”, sigũ muare ñ yija, ñre tuorũnubeja mua. ²⁴Jãjarã ruori masa, “Yu ña Cristo”, yi ejarã yirãji ñna. “Diore busi ñsiri masa ña gua”, yi ruo ejarã yirãji gãjerã. Tiyamani jaje ñorã yirãji ñna masare ruorona. Dios ñ beseanare cuni ruo amobojarã yirãji ñna. ²⁵Tuoya mua. Jeyaro iti rëtaroto riojua muare goticã yu. ²⁶Ito bajiri, “Yucu manojũ ñami Cristo”, muare ñna yi ruoja, tirã wamenaji mua. Ito yicõri, “Ruyubetoju ñami Cristo”, ñna yi ruoja ñnare tuorũnubeja mua. ²⁷Bujo ñ borea borea yirise usitutuju ñ borea yirise cojisiti iti sojeju quedituaja tia mani. Itire bajiroti ejaqu yiguja yu cuni. Yu ña Masa Rĩjoru. ²⁸No ruju jogarise ñaro itoju barã rujirã yirãji yuca. Itire bajiro masa ñna buto ñeñaro yiroca waja senigũ ejaqu yiguĩji Dios, yiquĩ Jesús guare.

Yu Masa Rïjoru tudi ejagu yigüja, Jesús i yire gaye
(Mr 13.24-37; Lc 21.25-33; 17.26-30, 34-36)

29'Ito bajiro masa ña tōbujari rumu iti jedija bero ūmacañi ūmua gagu rāitiacoagu yigüji. Ñami gagu cuni busubicu yigüji. Ñocōa cuni queda jedicoarā yirāji. Ūmacūju macārucūro cuni uero yiroja. 30'Ito bajiro ūmacūju macārucūroju iti bajija ticōri, "Masa Rïjoru ejagu wagu yami", yirā yirāji masa. Yu ña Masa Rïjoru. Yu ruji wadija ticōri, adi sita gāna otirā yirāji ña. Masirise rāca, yorise rāca, ide bueri rāca yu ruji wadija tirā yirāji ña. 31 Ūmacūju trompeta jutiado bajiro oca sēoro oca ruyuro yiroja. Yu beseanare minijuatoni ángel mesare mioju rotigu yigüja yu. Juaria sojeri gāna yu beseana ñarocōreti miojurā yirāji ña, yiquí Jesús guare.

32'Goti masiore ocana muare gotigu ya yu. Higuera wame cutiricure tuoiate mua. Higueraqu iti ñasātuja, ito yicōri iti jū wasoaja, "Jabeto ruya cuma iti ejaroto", yi masia mani. 33'Ito bajiroti muare yu gotire iti rētaja ticōri, "Jabeto ruya ūmuari iti jediroto", yi masirā yirāji mua. 34'Riti mure gotia yu. Adi rumuri gāna ña goda jediroto riojuaju ito bajiro rētarō yiroja iti. 35'Adi macārucūro ñarocōti jediro yiroja. Ito bajibojarocati yu ya ocama yu yiro bajiroti rētarō yiroja.

36"‘Iti rumu itocō tujaroca ejagu yigüji Jesús”, yirā mama. Ángel mesa cuni masimenaji ña. Dios Macu ñabojaguti, "Itocō ejagu yigüja yu", yi masibea yu cuni. Yu Jacu Dios i sigüti masiguji, yiquí Jesús guare.

37'Noé ñayoru i catiroca Diore rucubobitiyoñi masa. Ito bajiroti bajirā yirāji masa, yu tudi ejari rumu. Yu ña Masa Rïjoru. 38'Jane mejeju adi sita iti rujaroto rioju ñacōayjarā masa maji. Idi mecurātibe, ba yajirātibe, manoyo cutirātibe, ito yicōri ña rīa romiare isirātibe yi ñayjarā masa. Ito bajiro ña baji ñabojaroca riti cuma bucuaju sājayiju Noé ñayoru. 39"‘Ito bajiro wado ya”, yi masibisjarā masa. Ito bajiri ñajasaroti ñare rubatecācōyiju. Ito bajiado robo bajiroti ejagu yigüja yu cuni. Masa Rïjoru ñari, "Itocō ejagu yigüji", masa ña yi masibeto tudi ejagu yigüja yu. 40'Yu ejari rumu jūarā ūmua ña ya wesecaju moa ñarā yirāji. Sigü āmi wa ecogu yigüji. Gāji āmi wa ecobicu yigüji. 41'Romia jūarā quibo tuabo ñarā yirāji. Sigō āmi wa ecogo yigōji. Gajeo āmi wa ecobeco yigōji.

42' Bocatiari ñacāña mua. Yu mua Uju yu tudi ejaroti rumu masibea mua. 43' Sigü wi uju. "Adi ñami riniri masu ejagu yigüji", i yi masija, ña yucāgü yigüji iti wi uju. Riniri masu i sājare āmobicu camotagu yigüji i. 44'Ito bajiri yu ejaroto rioju ña yucāña mua. "Itocō ejagu yigüji Masa Rïjoru", yi mua tuoīabeto ejagu yigüja yu, yiquí Jesús guare.

¿No bajiro bajiguñida queno tuoīagü? yi Jesús i riasore gaye
(Lc 12.41-48)

45'Mua tuoīaja, ¿no bajiro bajiguñida queno cudicōri queno tuoīagü? Ado bajiro bajiguñi iocū. Gājerā i ya moari masare tirūntoni ito yicōri ñare i ecatoni

cūgū yiguūji ī ɛju ire. ⁴⁶Sīgū ī rotiro bajiroti ī moa yuroca ī ɛju ī tūdi ejaja wanu quenagū yiguūji ī. ⁴⁷Riti mware gotia yu. Ito bajiro yiro robo ī yigu űaja ticōri, ī rucorise űaroti ī ya masare cūni tirūnu rotigu yiguūji ire. ⁴⁸Ī ɛju ire ī tirūnu rotija bero ricati ī tūoĳaja, queno moa ĩsigū meje űaguūji ĳocū. “Coji ejabiquūji yu ɛju”, yi tūoĳagū yiguūji. ⁴⁹Ito bajiro tūoĳacōri, gājerā moari masare űeņaro yiswogu yiguūji ī. Ito yicōri mecūri masa rāca baba cuticōri ĩna rāca idigu yiguūji ī cūni. ⁵⁰Ito bajiro ī yi űaroca ī masia mani ī ɛju tūdi ejagu yiguūji. “Janere ejabicu yiguūji yu ɛju”, yi ī tūoĳari rumuti ejagu yiguūji. ⁵¹Ito ī yĳja ticōri, buto busa űeņaro ī tōbujaroca yigu yiguūji ī ɛju. “Queno yirā űa gua”, yibojarāti ĩna tōbujaro bajiroti ī tōbujaroca yigu yiguūji ī ɛju ire. Ito bajiri űeņaro tōbujacōri otigu yiguūji. Ito yicōri buto tūoĳa oca jaigu yiguūji ī ĳja, yi oca gotiquĳ Jesūs guare.

Jua dūjamocō űarā romia ado bajiro yĳjjarā, yi Jesūs ī riosore gaye

25 ¹“Ado bajiro baja, ĩre tūorūnūrāre ī rotiroju Dios ī miojuri rūmū”, yirocu ado bajiro gotiquĳ Jesūs:

—Jua dūjamocō mamarā romia űayĳjarā. Āmo siare basare tirā wayĳjarā ĩna. Mame manajo cutirocure bocarā wayĳjarā ĩna. Ito bajiri ito warā ĩna ya sĳabusuore āmi wayĳjarā. ²Īna co dūjamocō űarā űayĳjarā queno tūoĳarā. Gājerā ĩna rāca gāna co dūjamocō űarā queno tūoĳamena űayĳjarā. ³Queno tūoĳamena ĩna ya sĳabusuoragari āmibojarāti jio wasoarona ųye āmibisĳjarā. ⁴Gājerā queno tūoĳarāma ĩna ya sĳabusuore jio wasoaroti ųye āmi wayĳjarā. ⁵Manajo cutirocu yoari ī sejaja, wūjo jujayĳjarā ĩna. Ito bajiri canicoayĳjarā ĳja. ⁶űami gudarecocō oca ruyuyĳju ĳja. “Manajo cutirocu wadicoami ĳja. ĩre bocarā waya”, sēoro oca ruyuyĳju. ⁷Īna jua dūjamocō romia űarā yujicōri ĩna ya sĳabusuoragari sĳayĳjarā. ⁸Co dūjamocō űarā queno tūoĳamena ado bajiro yĳjjarā queno tūoĳarājuare: “Gua ya sĳabusuoraga ųye jedicoaju guare. Ito bajiri mua ya ųye jabeto ĩsĳna guare”, yibojayĳjarā ĩna. ⁹Ito bajiro ĩna yibojarocati ado bajiro cudiyĳjarā queno tūoĳarā: “Īsĳbea mware. Gua ĩsĳja űejua tujabetoja guare cūni. Mware cūni, guare cūni tĳjado ma iti. Muamasiti ųye ĩna ĩsĳroju wacōri waja yitēņa mua”, yĳjjarā queno tūoĳarā romia queno tūoĳamenajuare. ¹⁰Ito bajiro ĩna yĳja tuocōri, ųye waja yirā wayĳjarā queno tūoĳamena. ĩna wagoja bero manajo cutirocu ejayĳju. Queno űa yucāna romiama ī ejarocati ī rācati sĳajacoayĳjarā ĩna. Āmo siare basa tirā warā sĳayĳjarā ĩna. Ito yicōri soje biacōyĳju manajo cutirocu. ¹¹Soje ī bia sĳja waja beroju ejoboyĳjarā gājerā romia. Manajo cutirocure ado bajiro yibojayĳjarā ĩna: “Gua ɛju soje jānaņa majĳ”, yibojayĳjarā ĩna. ¹²“Yu űarā meje űa mua, ito bajiri mware masĳbea yu”, yĳjju manajo cutirocu ĩnare, yiquĳ Jesūs guare.

¹³Ito bajiri űa yucāņa mua. “Jane busuri itocō űaroca ejagu yiguūji Jesūs”, yi masĳbea mua, yiquĳ Jesūs guare.

Moa İsiri masa gaye Jesús ĩ goti masiore oca
(Lc 19.11-27)

14 “Ado bajiro baja, ĩre tuorũnurãre ĩ rotiroju Dios ĩ miojuri rumu”, yirocu ado bajiro gotiquĩ Jesús:

—Sĩgũ ñayiju gaje sitaju warocu. Ito bajiri ĩ waroto riojua ĩ ya moari masare ji ñucayiju ĩ. “Yu ya niyeruna moacõri jai busaro bujarã yirãji”, yi tũoĩa wacu ĩ ya niyerure tirũnu rotiyiju ĩ ĩnare.

15 ‘Sĩgũre co dũjamocõ mil niyeru cujiri ĩsiyiju. Gãjire juaji mil ĩsiyiju. Gãjire mil ñari cujiriacã ĩsiyiju. “Ado bajiroti moari seyoama ĩna”, yi tũoĩa wacu ito bajiro ĩnare batoyiju ĩ. Ito bajiro yicõri wacoayiju. 16 Co dũjamocõ mil niyeru cujiri boca ãmirũ mũcana itina moacõri gaje co dũjamocõ mil ñariseti buja remoyiju. 17 Gãji juaji mil boca ãmirũ mũcana itina moacõri jua mil buja remoyiju ĩ cuni. 18 Coji mil boca ãmirũama ĩ uju ya niyeru gojeju yujecõyiju.

19 ‘Yoari ĩna uju tũdi ejayiju mũcana. “¿No bajiro yũre moa ĩsiati ĩna?” yirocu ĩnare ji ñucayiju ĩ mũcana. 20 Cajero co dũjamocõ mil boca ãmirũ ejasũoyiju. Ejacõri ĩre co dũjamocõ mil niyeru ĩ ĩsire judacõayiju mũcana, ito yicõri gaje itocõ ĩ buja remore rãcati ĩre ĩsiyiju. “Co dũjamocõ mil yũre ĩsicũ mũ. Ito bajiri itina moacõri mũcana co dũjamocõ milti mũre buja remo ĩsimũ yũ”, yiyiju ĩ uju. 21 “Yũre queno moa ĩsiyija mũ. Yiro robo yũre cudigu ña mũ. Jabetacã yũ wasoarena mũcana itocõti mũ remore ñajare, jai busaro mũ moatoni jai busaro mũre cũcũja yũ. Sãjaña, queno wanũña yũ rãca”, yiyiju uju ĩ ya moari masũre. 22 Ito yija bero gãji juaji mil boca ãmirũ ejayiju. “Yu uju juaji mil yũre ĩsicũ mũ. Itina moacõri mũcana juaji milti mũre buja remo ĩsimũ yũ”, yiyiju ĩ, ĩ uju. 23 “Yũre queno moa ĩsiyija mũ. Yiro robo yũre cudigu ña mũ. Jabetacãna moacõri mũcana itocõti mũ yũre buja ĩsire ñajare jai busaro mũcana moaroti cũcũja yũ. Sãjaña, queno wanũña yũ rãca”, yiyiju ĩ, ĩ ya moari masũre.

24 ‘Ito yija bero gãji mil cujiri boca ãmirũ ejayiju. ĩ ujure ado bajiro yiyiju ĩ: “Yu uju seoro rotigu ñaquĩ ĩ. ĩ otebeto cuni, ĩ biabeto cuni bare buja quena ñaquĩ ĩ, yi tũoĩa wacu, gũicu yũ. 25 Ito bajiri mũ ya niyerure yuje cũcu yũ. Adi ña ñarocõti yũre mũ ĩsicati”, yiyiju ĩ, ĩ uju. 26 Ito bajiro ĩ yibojarocati ado bajiro cudiyiju ĩ uju ĩre: “Moa ĩsiri masũ quenabicũ, rojogu ña mũ. ĩ otebeto cuni, ĩ biabeto cuni bare buja quena ñaquĩ ĩ, yi masibojaguti yũre queno moa ĩsibisija mũ. 27 ĩna niyeru cũri wiju mũ niyeru cũja, mũcana jai busaro bujaboyija mũ”, yiyiju ĩ uju ĩre. 28 Ito yija gãjerãre ado bajiro rotiyiju uju: “Coji mil ñarise niyeru tiri ĩre ĩmacõña, ito yicõri gãji jua dũjamocõ mil rucogũjuare ĩsiña”, yiyiju ĩna uju. 29 “No queno yũre moa ĩsigũreama jai busaro ĩre ĩsi remogũ yigũja yũ. Ito bajiri ñejua ruyabeto yiroja ĩre. No queno yũre moa ĩsibicũreama ĩ rucoriseacãti ñarocõti ĩma jeocõcũja yũ. ĩre ĩmacõri gãji yũre queno moa ĩsigũre ĩsigũ yigũja yũ. 30 Ñni yũre moa ĩsiri masũ ñe waja macũre rãitãroju cõaña mũ. Itoju ñeñaro tõbujacõri buto otigu yiguĩji. Ito yicõri buto tũoĩa oca jaigu yiguĩji ĩ”, yiyiju uju, yi oca gotiquĩ Jesús gũare.

Masa ñeñaräre, quenaräre cuni besegu yiguja yu, Jesús i yire gaye

³¹ Yu ña Masa Rijoru. Uju yu ñari rumu, tudi ejagu yiguja yu mucana. Umacuju gāna ángel mesa rāca gāni bia ejagu yiguja yu. Uju i rotiri cumuro yori cumuroju rujigu yiguja yu. ³² Jeyaro gāna masa yu riojua minijuarā yirāji ña. Ñare besecōri ricati cūgū yiguja yu. Oveja coderi masu ovejare ricati, cabrare ricati i cūado bajiro yigu yiguja yu. ³³ Queno yiräre yu ya riojocaduja cūgū yiguja yu. Queno yimenare yu ya gācoduja cūgū yiguja yu. ³⁴ Ito bajiri yu riojocaduja gānare ado bajiro yigu yiguja yu: “Yu Jacu queno yirocu muare beseni i rotiroju muare ejatoni. Ire tuorūnūräre tuoia yugu i rotiroju quenocāni Dios adi macārucūro meni wacujuti. Ito bajiri itoju ñarā yirāji muare ña. ³⁵ Yu ñiocōja yure bare ecacu muare. Yu idi āmoja yure iocū muare. Yu wa ucuroju caniraju buja isicu muare. ³⁶ Yure yutabuju manija yure isicu muare. Yu cōja cuni yure tirā ejasoticū muare. Tubiara wi yu ñaroca yure tirā ejasoticū muare”, yigu yiguja yu Dios i beseanare. ³⁷ Ito bajiro yu yija tuocōri, ado bajiro yure seniāarā yirāji ña: “Gua Uju, ¿nocāta mu ñiocōja ticōri, muare bare ecacati gua? ¿Nocāta mu idi āmoroca muare iocati gua? ³⁸ ¿Nocāta mu wa ucuroju caniraju muare buja isicati gua? Ito yicōri, ¿noju mu yutabuju maniroca muare yutabuju buja isicati gua? ³⁹ Ito yicōri, ¿nocāta mu tubia ecoroca, mu cōja cuni, nocāta muare tirā ejacati gua?” yi yure seniāarā yirāji ña. ⁴⁰ Ado bajiro ñare cudigu yiguja yu: “Riti muare gotia yu. Yu ñarā ñasamenare queno muare yija, yure queno yirāti yicu muare”, yigu yiguja yu Dios i beseanare. ⁴¹ Ito yicōri yu ya gācoduja ñaräre ado bajiro yigu yiguja yu: “Yure camotadiya muare. Dios i beseana meje ña muare. Jeame yatibitimeju wasa muare. Iti jeamere rūmūre yiari rioñi Dios, ito yicōri i ñaräre yiari cuni. ⁴² Yu ñiocōja yure ecabiticū muare. Yu idi āmoja iobiticū muare yure. ⁴³ Yu wa ucuroju yure caniraju buja isibiticū muare. Yure yutabuju manija yure isibiticū muare. Yu cōroca cuni, tubiara wi yu ñaroca cuni yure tirā ejabiticū muare”, yigu yiguja yu queno yimenare. ⁴⁴ Ito yija ado bajiro yure seniāarā yirāji ña: “¿Nocāta mu ñiocōroca muare ecabiticati gua? Ito yicōri, ¿nocāta mu idi āmoja, mu cani āmoja, muare yutabuju manija, mu cōja cuni, tubiara wi mu ñaja cuni, muare ejabuabiticati gua?” yi yure seniāarā yirāji ña. ⁴⁵ Ito bajiro ña yija tuocōri, ado bajiro ñare cudigu yiguja yu: “Riti muare gotia yu. Yu ñarā ñasamenare queno muare yibeja, yure cuni ito bajiroti queno yibiticū muare”, yigu yiguja yu ñare. ⁴⁶ Ito bajiri tōbujare susabetoju ñare cōagū yiguja yu. Dios i beseanama catitūñadoju warā yirāji, yiqui Jesús guare.

Jesure ñia āmorā ña cunire gaye
(Mr 14.1-2; Lc 22.1-2; Jn 11.45-53)

26 ¹ Ito bajiro i goti jeoja bero gua i rāca riasotiräre ado bajiro yiqui Jesús:

²—Muare masia juare rumu beroti ñaro wado ya Pascua basa. Ito bajiro basa ña meniri rumu Masa Rijorure ñiatoni i wajanare gotigu yiguji sigū. Ito bajiri ire ñiacōri yucutēoju jaju sīarā yirāji ña. Iti ña yu Masa Rijoru, yiqui Jesús guare.

³Iti rumuri paia mesa ujū Caifás wame cutigu ya wiju minijuacōri tuoia ñayijarā paia ujarā, ito yicōri judio masa bucurā cuni. ⁴“¿No bajiro ruocōri Jesure siarā yirājida mani?” yi gāmeri busi ñayijarā ina. ⁵Ado bajiro busiyijarā ina:

—Basa rujarumū Jesure siamenaji mani. Rujarumū mani siaja, buto manire masa oca jaicōri gāmeri oca menirā yirāji ina, yi gāmeri busiyijarā ina.

Romio Jesús ya rijogaju sutirise iso jiojeore gaye

(Mr 14.3-9; Jn 12.1-8)

⁶Betaniaju Simón camí jogagoru ya wiju ñacu gua Jesús rāca. ⁷Iti cuto gua ñaroca sīgō gūtagā toti cutiricaju sutirise jiocōri āmi ejacō. Sutirise iso jioraga alabastro wame cuticu. Buto waja cutirise ñacu iti sutirise. Jesús ī ba rujiroca ī ya rijogaju sutirise jiojeocō iso. ⁸Ito bajiro iso yija ticōri, bujatobiticu gua ī rāca riasotirā. Ado bajiro gāmeri busicu gua:

—¿No yija rocati itire ruyurioati? ⁹Iti sutirise isicōri jairo niyeru bujacōri bojoro bujarāre ejabuaroti ñabojayija iti, yi gāmeri tuoia busicu gua.

¹⁰Ito bajiro gua tuoia busija tuocōri, ado bajiro yiquī Jesús guare:

—Adiore usirio code yibesa mūa. Iti yare iso jiojeoja, queno yare yigo yamo iso. ¹¹Mūa rāca riti ñatīnarā yirāji bojoro bujarā. Ito bajiri inare ejabuatiñarā yirāji mūa. Yuama mūa rāca ñatīnabicu yigūja. Ito bajiri mūa rāca yū ñaroca maji yūjare ejabuaja quena. ¹²Adio yare iso sutirise jiojeoja yare ina yujeroto riojua jiojeo yugo yamo iso. ¹³Riti muare gotia yū. Adiore ācabojamena yirāji masa. Ito bajiro sutirise yare iso jiojeoja bero masa jeyaro tuorā yirāji iti gaye. “Masare masogū yiguīji Dios”, yire oca ina gotiroti iso oca cuni tuorā yirāji masa, yiquī Jesús guare.

Jesure ina ñiatoni Judas ī oca menire gaye

(Mr 14.10-11; Lc 22.3-6)

¹⁴Ito yija bero gua Jesús rāca riasotirā jua gubojeno ñarā gua rāca gagu Judas Iscariote wame cutigu paia ujarāre busigu waquī. ¹⁵Ito bajiri ado bajiro gotiyijū ī inare:

—Jesure mūa ñia masitoni muare yū gotija, ¿nocō jairo yare waja yirājida mūa? yi busiñi Judas inare.

Ito ī yija tuocōri, sīgū masucō gāji ye jua dūjamocō ñarise niyeru tiri isiyijarā ina. ¹⁶Iti niyeru boca āmicōri: “¿No bajiro yicōri Jesure ruorujatibe yū ire ina ñiatoni?” yi tuoia ñayijū Judas iti rumure.

Jesús ī basusare gaye

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷Ito yija naju wadarise uco wuoya mani bara rumū cōña wacu guare. Gua Jesús rāca riasotirā ado bajiro ire seniīacu:

—Pascua basa ñaroca baroti gaye, ¿nojū menirujati mūca? yi seniīacu gua ire.

18—Cũtoju wasa mua. Ito mua ejaja sīgũre bujarã yirãji mua. Ado bajiro ãre yiba: “Ado bajiro roti ñucami gua uju guare. Jabetoti ruya yu wẽjoroto. Ī ya wiju Pascua basa meniana mani, yi ñucami guare riasogu”, yiba mua, yiquĩ Jesús guare.

19“Ito bajiro yiba mua”, Jesús ĩ guare yicato bajiroti yicu gua. Ito bajiroti Pascua basa ãre meni ĩsisuocu gua.

20Iti ñami gua ĩ rãca riasotirã juã gubojeno ñarã ba rujicu ĩ rãca. 21Gua baroca ado bajiro yiquĩ Jesús guare:

—Riti muare gotia yu. Sīgũ mua rãca gagu yure ñiatoni gãjerãre gotigu yiguĩji, yiquĩ Jesús guare.

22Ito ĩ yija tuocõri, buto bojori bujacu gua. Ito bajiri sīgũ ruyabeto Jesure seniãacu gua:

—¿Yu Uju yuti ñabeati yu muare oca menirocu? yi seniãacu gua Jesure.

23Ado bajiro cudiquĩ Jesús guare:

—Yu bari tẽro ba ijagu ĩ ñagũ yiguĩji yure ñiatoni gãjerãre gotirocu.

24Dios oca iti gotiro bajiroti rẽtaro yiroja yure. Yu ña Masa Rijoru. Yure siarã yirãji masa. Bujato yiguĩji yure ñiatoni gãjerãre gotirocu. Rujebiticõ rujabojañi ñama, yiquĩ Jesús guare.

25Ito yija bero Judas Jesure ñiatoni gãjerãre gotirocu basiquĩ. Ado bajiro yiquĩ ĩ:

—Yure riasogu, ¿yuti ñati muare ñiatoni gãjerãre gotirocu mu tija? yiquĩ ĩ Jesure:

—Muti ña, yiquĩ Jesús ãre.

26Ito yija bero gua ba rujiroca ĩ ya ãmoju naju ãmi rucoquĩ Jesús.

“Queno ya Dios mu”, yicõri gua ĩ rãca riasotirãre batoquĩ.

—Baya, iti ña yu ya ruju robo bajiro bajirise, yiquĩ Jesús guare.

27Iti gua ba tioroca rujatẽro ãmi ruocõri, “Queno ya yu Dios mu”, yiquĩ Jesús. Ito yicõri guare io batoquĩ.

—Mua jeyaro itire idiya. 28Iti ña yu ya rí robo bajiro bajirise. Jãjarã ña ñeñaro yirise ña waja yi ĩsotoni, yu ya rí buديو yiroja. Itire ticõri, “Oca mame Dios ĩ goticãdo bajiroti baja”, yi tuoña masirã yirãji mua. 29Riti muare gotia yu. Adi sitaju mucana juaji mua rãca uyé ide idibicu yiguja yu. Umacũju yu Jacu ĩ rotiroju mucana tudi mua rãca idigu yiguja yu, yiquĩ Jesús guare.

“ Jesure masibea yu, yigu yiguja mu”, Pedroro Jesús ĩ yire gaye
(Mr 14.26-31; Lc 22.31-34; Jn 13.36-38)

30Ito ĩ yija bero Diore basacu gua. Basa tĩocõri Olivos wame cutiri tũriaju wacu gua. 31Ito gua waroca ado bajiro yiquĩ Jesús guare:

—Adi ñamiti yure jidicãcõri wagorã yirãji mua ñarocõti. Yure mua wagoja cuni, Dios oca tutiju iti gotiado bajiroti rẽtaro yiroja. Ado bajiro gotia iti. Tuote mua: “Oveja coderi masure siagũ yiguja yu. Ito bajiri ĩ ya oveja rudi batecoarã yirãji”, yi gotiami Dios ĩ oca tutina. 32Yure ña ñiaja ticõri, rudi batecoarã yirãji mua. Ito bajibojarocati yure ña siãja bero mucana tudi catigu yiguja yu. Tudi caticõri mua rioju busa Galilea sitaju wacu yiguja yu, yiquĩ Jesús guare.

³³ Ito ï yija tʷocõri, ado bajiro yiquĩ Pedro ïre:

— Ñnama mure wagobojarocati yuama wagobicu yiguja yu, yiquĩ ï Jesure.

³⁴ Ito ï yija tʷocõri, ado bajiro cudiquĩ Jesús ïre:

— Riti mure gotia yu. Adi ñamiti busurijua cara ï yujiroto riojua udiayi, “Jesure masigũ meje ña yu”, yigu yiguja mu, yiquĩ ï Pedroro.

³⁵ — Yuere ña sã ãmoja cuni, “Jesure masibea yu”, yibicu yiguja yu, yiquĩ Pedro Jesure.

Ito bajiro Pedro ï yija tʷocõri, gua Jesús rãca riasotirã ito bajiro riti yi jedicu gua cuni ïja.

Getsemaní wame cutiri weseju Jesús ï Diore rãcubuoore gaye
(*Mr 14.32-42; Lc 22.39-46*)

³⁶ Warãju Getsemaní wame cutiri weseju ejacu gua Jesús rãca. Itoju ejacõri ado bajiro gotiquĩ Jesús guare:

— Õ Diore busigu yu waroca riti, ado rujiya maji, yiquĩ Jesús guare.

³⁷ Pedroro, Zebedeo rã jãarãre ji waquĩ Jesús. Wacuti bũto tũoĩa bojori bujaquĩ Jesús. ³⁸ Ito yija ado bajiro yiyiju Jesús ï rãca wacãnare:

— Yu ya usiju bũto tũoĩa bojori buja yu. Ito bajiro yu bojori bujaja, usi jediri guiõoro baja yure. Ado yure yu ñaña maji. Canibea. Yu rãcati tiba maji, yiyiju Jesús ñare.

³⁹ Ito yicõri ito sõjua busa wa remoyiju Jesús. Sitaju ï ya rio cũoro muqueacõri Diore busiyiju ï:

— Cuna ñejua mu yi masibiti manõja. Yu tõbujaroti gaye mu camota ãmoja, camota masigũja mu. Ito bajibõjarocati yu ãmoro bajiro meje yiguja mu. Mu ãmoro bajiro mu yija quena, yi busiyiju Jesús Diore. Itocõ ï busi tujarocati canigocõcu guama ïja.

⁴⁰ Ito ï yija bero Pedro mesa tũ tũdi ejayiju ña caniroca. Ado bajiro busiyiju Jesús Pedro mesare:

— ¿Coji cõrecõ canimenati yu rãca ti seõbeati mua? ⁴¹ Canibesa mua maji. Yu rãcati tiya. Rãmure cudibe yirona Diore seniña mua maji. Riti muare masia yu. Mua ya usijua queno tũoĩarã ñabõjarãti mua ya rujuna queno yi masibea mua. Yure queno cudi ãmõbõjarãti queno cudimenaji mua, yiyiju Jesús Pedro mesare.

⁴² Ito yicõri mucana tũdi wacuju ado bajiro Diore busiyiju Jesús:

— Yu Jacu yu tõbujarotire mu camota ãmõbeja quena ñaroja. Mu ãmoro bajiroti bajijaro, yiyiju Jesús Diore busigu. Ito bajiro Jesús ï Diore busiroca canicoayijarã Pedro mesa mucana.

⁴³ Tũdi wacu ña caniroca tũdi ejayiju Jesús mucana. Bũto wũjo ñare jeõbõjaja caniyijarã ña. ⁴⁴ Ito bajiro ñare busicãriti mucana Diore busigu wayiju Jesús. Ito yicõri Diore ï busiado bajiroti tũdi busiyiju mucana.

⁴⁵ Ito yija bero gua tũ ejacõri guare yujioquĩ Jesús:

—¿Tujacā canirā yati mua maji? Itocōti eja wajū Masa Rījoru ñiacōri ñeñaro yirāre ina īsirotijū eja wajū ĩja. ĩti ña yū Masa Rījoru. ⁴⁶Ito bajiri yujiya mua. Wato. Yure ina ñiatoni gotiri masū wadicoami ĩja, yiquī Jesús guare.

Jesure ina ñiare gaye

(*Mr 14.43-50; Lc 22.47-53; Jn 18.2-11*)

⁴⁷Ito bajiro Jesús guare ĩ busi ñaroca riti, jua gūbojeno ñagū Judas ejaquī. Jājarā ĩ rāca wadicā sarera jāiri rūcorā, gājerā yucū rūcorā. Paia ũjarā, judio masa bŭcūrā ina cōajare wadiñi ina. ⁴⁸“Ado bajiro muare goticūja yū”, yi ĩnare busi wadicāri seyoñi Judas:

—Recoti yū usugū ĩti ñagū yiguīji Jesús. ĩre ñiama mua, yi ĩnare busi wadiri seyoñi ĩ.

⁴⁹Gua tū ejacōri ado bajiro yiquī Judas Jesure:

—¿Ñati yure Riasogū mū? yi ejaquī ĩre.

Ito yiguti wayugajū muwācōri Jesure usuquī ĩ.

⁵⁰—¿No yigū wadiri yū baba mū? yiquī Jesús ĩre.

Ito ĩ yiroca ĩre ñiacā Judas rāca wadiana.

⁵¹Ito bajiro Jesure ina ñiaja ticōri, sīgū gua rāca gagū ĩ ya sarera jāi āmiquī, ito yicōri paia ũjū ya moari masure gāmoro jataquī. ⁵²Ito ĩ yija ticōri, ado bajiro yiquī Jesús ĩre:

—Mū ya sarera jāi mŭcana iti wirojū ñusacōña. Sarera jāina gāmeri jarā itinati godarā yirāji. ⁵³Adocāta yū Jacure yū seni ñucaja, ángel mesa jājarāguti jua gūbojeno masa buturi cōagū yiguīji ĩ. ¿Itire masibeati mua?

⁵⁴Ito bajibojarocati ĩre senibicū yigūja yū. Yure ina ñiajare ito bajiro gotia Dios oca. “Ito bajiroti rētarō yiroja”, Dios ĩ yicāre ñari, ito bajiroti bajiro ya yure, yiquī Jesús guare.

⁵⁵Ito yicōri ĩre ñiarā ejarāre ado bajiro yiquī Jesús:

—¿Riniri masure ñiarona bajiro sarera jāiri rāca, yucū rāca yure ñiarā wadiri mua? Co rāmū ruyabeto mua wato riaso rujisotibojacu yū minijua wijū. Ito bajibojarocati yure ñiabiticū mua maji. ⁵⁶Jeyaro yure rētaroti Diore goti ĩsiri masa ina ucado bajiroti rētarō ya, yiquī Jesús ĩre ñiacānare.

Jesure ina ñiaja ticōri, rudicoacu gua. Jesús sīgūti ina rāca tujaquī.

Ūjarā ñasarā, “Seti ña mure”, Jesure ina yire gaye

(*Mr 14.53-65; Lc 22.54-55, 63-71; Jn 18.12-14, 19-24*)

⁵⁷Jesure ñiacōri paia ũjū Caifás wame cūtigū tū ĩre āmi wayijarā. Itojū minijua ñayijarā judio masa rotirise riasori masa ito yicōri ina masa bŭcūrā cūni minijua ñayijarā ina. ⁵⁸Jesure ina āmi waroca sōbūsa yeyo ti sūya wayijū Pedro. Paia ũjū ya wi soje riojo sājacōri rujijijū Pedro. Iti wi coderi masa rāca rujijijū ĩ. “No bajiro Jesure ina yi gajanoaja ticūja yū”, yirocū ito bocati rujijijū Pedro.

⁵⁹Paia ũjarā, ũjarā ñasari masa cūni Jesure sīa āmoyijarā ina. Ito bajiri, “Ado bajiro ñeñaro yiquī Jesús”, yi rŭo gotironare āmabojayijarā ina. ⁶⁰Jājarā

socari masa ñna oca menibojarocati, “Riti baja ñna gotirise”, yi masibisijarã ñna. Susari jüarã ruo gotiri masa ejayijarã ñna. ⁶¹Ado bajiro gotiyijarã:

—“Dios ya wi minijuara wi iti wire yu ruyuriocõja, ùdia rumu beroti mucana iti wire jõrojocõgũja ya”, yiquí ãni, yiyijarã ñna.

⁶²Ito ñna yija tuocõri, paia ujũ wumu rügücõri ado bajiro yiyijũ Jesure:

—¿Cudibicuti yati mu? Ito bajiro mure ñna busituja, ¿no yireoni yirã yati ñna? yibojayijũ ñ Jesure.

⁶³Ito ñ yibojarocati Jesuama cudibisijũ ñre. Ñ cudibeja ticõri, ado bajiro yiyijũ paia ujũ Jesure mucana:

—Dios catigũ ñ tiro riojo riojo gotiya mu. ¿Muti ñati Cristo Dios ñ cõarũ? ¿Ñ macuti ñati mu? Guare gotiya maji, yiyijũ ñ Jesure.

⁶⁴—Mu seniãro bajiroti, iti ña yũ. Gaje ado bajiro muare gotia yũ: Dios jeyaro masigũ ya riojocaduja Masa Rĩjorũ ñ rujiã tirã yirãji mua. Ito yicõri ùmacũju ide buerina ñ ruji wadija tirã yirãji mua. Ñti ña yũ Masa Rĩjorũ, yiyijũ Jesús paia ujũre.

⁶⁵Ito bajiro Jesús ñ yija tuocõri, buto junisinigũ ñ ya yutabuju tũa ñigãyijũ:

—Ñni ùmugũ ñeñaro Diore busituami. Gãjerã, “Ñre seti ña”, yironare ãmare ma ñja. Mua cuni Diore ñ busituja tuoã mua. ⁶⁶¿No bajiatu mucaca? ¿No bajiro ñre yirũjati mani? yiyijũ paia ujũ masare.

—Seti ñasacõã ñre. Siarũjami, yi cudiyijarã masa.

⁶⁷Ito yija Jesús ya riore go ide eobate guyijarã ñna. Ito yicõri ñre jayijarã. Gãjerã ñ ya riojũ jayijarã. ⁶⁸Ñ ya cajea moabiacõri, ñre jayijarã ñna. Ito yicõri ado bajiro ñre seniã tudiyijarã:



(San Mateo 26.63)

—Riti Cristo Dios Macu mu ñaja, “Í yure jami”, yi masigūja mu, yi tudiyijarā ña Jesure.

Jesure masibea yu, Pedro í yire gaye
(Mr 14.66-72; Lc 22.56-62; Jn 18.15-18, 25-27)

⁶⁹Wi totiju ito bajiro rētaroca, macūju soje riojo rujicōayiju Pedro. Sīgō moa isiri maso Pedro tu ejacōri ado bajiro yiyijo ire:

—Jesús Galilea sita gagu rāca wa ucuyiju mu cūni, yiyijo iso ire.

⁷⁰Ito bajiro iso yija tuocōri, masa jeyaro ña tuoro riojo ado bajiro yiyiju Pedro:

—“Riti ya mu”, yi masibea yu mure, yi ruoyiju Pedro isore.

⁷¹Sājasuora soje tu Pedro í ejagu wagu yiroca tiyijo gajeo mucana:

—Jesús Nazaret cuto gagu rāca wa ucuñi í cūni, yiyijo gājerāre gotigo.

⁷²—“Dios í tiro riojo ire masibea yu”, ya yu, yiyiju Pedro.

⁷³Ito bero yoa busari Pedore ado bajiro yiyijarā gājerā:

—Riti ña. Jesús rāca wa ucuguti ña mu cūni. Ñare bajiroti busia mu cūni, yiyijarā ña Pedore.

⁷⁴—Ito bajiro mua busigure tiñabea yu. Ruore oca yu gotija, Dios yure sījaro, yi oca sēoro busiyiju Pedro.

Ito bajiro í yiroca riti cara yujicoayiju ña. ⁷⁵Cara í yujija tuocōri, Jesús ire busigorere tuoia bujayiju Pedro: “Cara í yujiroto riojua udiaji, ‘Jesure masibea yu’, yigu yiguja mu”, Jesús í yire tuoia bujayiju Pedro. Ito budi wacōri buto otiyiju ña.

Pilato taju Jesure ña āmi ejare gaye
(Mr 15.1; Lc 23.1-2; Jn 18.28-32)

27 ¹Busuri gaje rumu paia ujarā, judio masa bucūrā minijua ñayijarā. Sīgūre bajiro riti tuoīacōri, “Ado bajiro Jesure sīaruja mani”, yi tuoia ñayijarā ña. ²Ito bajiro ña yija bero Jesure āmoju siacōri āmi wayijarā ña. Ito yicōri ire āmi wacōri Pilatore isiyijarā ña. Romano masa uju ñayiju Pilato.

Judas í godare gaye

³Judas Jesure ña ñiatoni gotiru, “Jesure sīarā go yiru āna”, yi tuoīayiju Judas. Iti tuoīacōri, “Queno yibiticu yu”, yi tuoia bojori bujayiju Judas. Ito bajiri paia ujarāre, judio masa bucūrāre cūni ña tu wacōri niyeru treinta tiri í bujabojare judacōayiju ñare. ⁴Ado bajiro ñare yiyiju í:

—Queno yibiticu yu. Ñe seti macureti mure oca menibojacu yu, ire mua ñiatoni, yiyiju í paia ujarāre.

Ito bajiro í yibojarocati ado bajiro ire cūdiyijarā ña:

—Ito bajiro mu guare yibojaja, no yibea guare. Mureti seti ñaroja, yiyijarā ña Judasre.

⁵Ito ña yija tuocōri, Dios ya wiju niyeru cujiri rea bateyiju Judas. Ito yi, budicoayiju. Budi wacōri yucuguju mujayiju. Mujacōri imasiti í ya amumaju jūgūbo cano yicōri quedi yoja godayiju.

⁶Dios ya wiyu niyeru cujiri i rea batere mioyijarã paia ujarã. Itire ãmicõri ado bajiro yiyijarã:

—Adi niyeru mani siarocure i goticati waja nacãre nacu adiamã. Siãre waja mani waja yire ña. Ito bajiri Diore yiari masa ña niyeru sãri jechoju sãdo ma, yiyijarã ña.

⁷Sigãre bajiro tuoãcõri, “Riri goje ñari sitaju waja yiana mani”, yi tuoãyijarã ña. “Iti sita ñaro yiroja gaje masare mani yujeroti sita”, yi tuoãyijarã ña. ⁸Ito bajiri adi sita adi rumuri cuni, siãre wajana ña waja yira sita wame cutia maji. ⁹⁻¹⁰Ito bajiro ña yija jane mejeju Diore goti isiri masu Jeremias ñayoru i ucare ado bajiro bajadoja: “Treinta niyeru cujiri ñarise ãmicõri riri goje ñari sita waja yiyijarã ña, Dios i amocãdo bajiroti. ‘Itocõti waja cutiami sigũ umugũ’, yi tuoãyijarã Israel sita gãna”, yi ucañi Jeremias ñayoru. I ucado bajiroti rãta adi.

Pilato Jesure i seniãre gaye

(Mr 15.2-5; Lc 23.3-5; Jn 18.33-38)

¹¹Jesure ãmi wacõri Romano masa uju Pilato wame cutigu tu ãmi ejayijarã ña. Ito bajiri i riojo rügöyiju Jesús. I Jesure ado bajiro seniãyiju:

—¿Muti ñati judio masa uju? yiyiju i Jesure.

—Mu yiro bajiroti baja, yiyiju Jesús ire.

¹²Ito i yija tuocõri, paia ujarã, judio masa bucãrã cuni, “Iti ñami ñeñaro yigu. Queno yigu meje ñami i”, ña yibojaja, ñare cudi ñuca yibisiju Jesús.

¹³Ito bajiro Jesure ña busitaja tuocõri, ado bajiro seniãyiju Pilato Jesure:

—Ito bajiro mre ña seti yija, ¿tuobeati mu? yiyiju i Jesure.

¹⁴Ito i yibojarocati cudibisiju Jesús ire. I cudibeja tuocõri, tuoia oca jai rügöyiju Pilato. Ito bajicõri ñe tuoãre mañiju ire.

Jesure siaruja mani, ña yire gaye

(Mr 15.6-20; Lc 23.13-25; Jn 18.38-19.16)

¹⁵Pascua basa ñari rumure ado bajiro yisotiyiju romano masa uju. Tubiara wiju ñarãre “Ire bure ãmoa gua”, ña yi besegure bucõasotiyiju i, basa ñari rumu. ¹⁶Iti rumuri tubiara wiju ñayiju sigũ, masa jeyaro ña masi jedigu Barrabás wame cutigu. ¹⁷Masa ña minijua ñaroca ado bajiro seniãyiju Pilato:

—¿Nimujuare yu bucõare ãmoati mua? ¿Barrabásre, Jesucristo mua yigure bucõagütite? yi seniãyiju Pilato.

¹⁸“Jesure tuo junisinicõri yure isicã no cuni”, yi tuoia wacu ito bajiro yiyiju Pilato.

¹⁹Gãjerã ujarã rãca Pilato i rujiroca i manajo ire oca cõayijo: “Ñeñaro yibesa ire. Ñe seti macu ñami. Guijoro cãimu yu i gaye. Ito bajiri buto oca jaia yu”, yi oca cõayijo iso, iso manujure.

²⁰Paia ujarã, judio masa bucãrã cuni, “Barrabásjuare bucõa rotiya mua”, yiyijarã ña masare. “Ito yicõri Jesure sãa rotiya mua”, yiyijarã ña

masare. Ito bajiro ñna yijare ito bajiroti tũoĩayijarã masa cuni. ²¹Ito ñna yija bero masare mũcana ado bajiro seniĩayijũ ujũ Pilato:

—¿Nijũare yũ bucõare ãmoati mũa? yi seniĩayijũ Pilato ñnare:

—Barrabásjuare mũ bucõare ãmoa gũa, yiyijarã ñna Pilatore.

²²Ito ñna yija tũocõri, ado bajiro ñnare seniĩayijũ ñ:

—¿No bajiro yigũti yũ Jesure, Cristo mũa yigũreama? yi seniĩayijũ ñ masare.

Ito ñ yija ñna ñnarocõti ado bajiro ñre awasã cudi yijarã:

—Yucũtẽojũ ñre jaju sãacõña mũ, yiyijarã ñna.

²³Ito ñna yija tũocõri:

—¿Ñeonire ñeñaro yicati ãni? yiyijũ Pilato ñnare.

Ito ñ yibojarocati mũcana tũdi awasã yijarã ñna:

—Yucũtẽojũ jaju sãacõña ñre, yiyijarã ñna Pilatore.

²⁴Ito ñna yija tũocõri, “No robojũa yi masibicũja yũ”, yi tũoĩayijũ Pilato. “Ñna ãmoro bajiro yũ yibeja, ñnamasiti gãmeri birarã yirãji”, yi tũoĩayijũ Pilato. Ito bajiro tũoĩacõri ide ãmi rotiyijũ ñ. Ito yicõri masa ñna tiro riojo ãmo coecõri ado bajiro gotiyijũ ñ masare:

—Ñni ñeñaro yibicũre mũa sãaja, yũre seti ma. Mũareti seti ñna, yiyijũ ñ masare.

²⁵Ito ñ yija tũocõri, masa ñajediro ado bajiro ñre cudi jediyijarã:

—Gũa, gũa rĩare cuni seti ñnaro yiroja ñre gũa sãaja, yiyijarã ñna Pilatore.

²⁶Ito yija bero Barrabásre bucõayijũ Pilato. ñre bucõacõri ñ ya surarare ñsiyijũ Pilato Jesure ñna bajetoni, ito yicõri yucũtẽojũ ñna jaju siatoni.

²⁷Jesure ãmi wacõri ujũ ya wijũ ãmi ejayijarã ñna. Surara jeyaro Jesure gãni bia rũgũyijarã. ²⁸Ñ sãñarise yutabuju ruacõri, ujũ ñ sãñarise sũari buju ñre sãyijarã.

²⁹Ito yicõri jota bedo ñna menira bedo Jesure rijogajũ jeoyijarã ñna. Ito yicõri riojocadũja ãmo jota jã ñsiyijarã. Ujũ ñ rucori jã bajiri jã ñre ñsiyijarã ñna. Iti ñre ñsi tũocõri ñ riojo rijomunigãna ñni rũjũyijarã ñna. Gaje ado bajiro ñre aja tudiyijarã:

—Judio masa ujũ yoari catiba mũ, yiyijarã ñna Jesure.

³⁰Ito yicõri go ide ñre eobate gũyijarã ñna. ñ rucori jã ñmacõri ñ ya rijogajũ jayijarã ñna. ³¹Ito bajiro ñre ja tudi tũocõri ñ ya yutabuju sũaro ruayijarã ñna mũcana. Ito yicõri ñ yaro ñnasuoadojũare sãyijarã. Yutabuju sã tũocõri yucũtẽojũ jaju sãarona ñre ãmi wayijarã ñna.

Yucũtẽojũ Jesure ñna jaju sãare gaye
(*Mr 15.21-32; Lc 23.26-43; Jn 19.17-27*)

³²Cũto sõjũa ñre ãmi warãjũ sũgũ Cirene gagũ Simón wame cũtigũre bocayijarã ñna. ñre bocacõri Jesús gajari tẽo gaja rotiyijarã ñna ñre.

³³Ito baji warãjũ Gólgota wame cũtirijũ ejayijarã ñna. “Rijoga gão iti ñnarijũ”, yireoni ñna Gólgota yire. ³⁴Ito ejacõri Jesure uyé ide jiarise wũocõri ioyijarã ñna. Itire idiĩacõri itocõ idi jidicãyijũ Jesús.

³⁵Jesure yucũtẽojũ ñna jaju tũoja bero, “Ñimũjũa ñ ya yutabuju bũjaja tiana mani”, yirona gũta ajerina rea ajeyijarã ñna. Ito bajiro ñna yija Diore goti

ĩsiri masu ñayoru ĩ ucado bajiroti rētayiju. Ado bajiro ucayoñi ĩ. T̄ote: “Yu ya yutabujure ĩnamasi gāmeri batorona gūta ajerina gāmeri rea ajecā ĩna”, yi ucayoñi Diore goti ĩsiri masu. ³⁶Ito bajiro aje t̄iocōri ĩre code rujijjarā surara. ³⁷Jesús ya rijoga weca rujajāi uca wōyijarā ĩna. “Adi seti ña ĩre”, yira jāi uca wōyijarā ĩna. “Āniti ñami Jesús judio masa Ɂju”, yi wāñayiju iti jāiju.

³⁸Jesús rāca jūarā riniri masa jaju ecoyijarā. Sīgure ĩ ya riojocaduja, gājire ĩ ya gācoduja jaju rūgōyijarā ĩna. ³⁹Masa ĩna rētaja, rijogari yureyure yi rētayijarā ĩna Jesure busiturā. ⁴⁰Ado bajiro yi aja tudijjarā ĩna Jesure:

—“Dios ya wire jore batecācōri m̄cana uđia rumu beroti menicōgū yigūja yu”, m̄ yigu ñaja m̄masiti m̄ ya rujure masogū yigūja m̄. “Riti Dios Macu ña yu”, m̄ yijama, m̄masiti yucutēore rujigogu yigūja m̄, yi aja tudijjarā ĩna Jesure.

⁴¹Paia Ɂjarā, judio masa rotirise riasori masa, ĩna masa bucūrā c̄ni ito bajiroti Jesure aja tudi ñayijarā ĩna.

⁴²—Gājerāreama masobojañi. ĩ ito bajibojaguti ĩ ya rujureama maso masibeami ĩ. Judio masa Ɂju m̄ ñaja yucutēore rujigogu yigūja m̄. Ito bajiro m̄ yija ticōri, m̄re t̄orūnrā yirāji gua. ⁴³“Dios Macu ña yu. ĩre t̄orūnna yu”, yicu m̄. Ito bajiri m̄re ĩ maija ĩmasiti m̄re masogū yiguji, yi aja tudijjarā ĩna.

⁴⁴Jūarā ĩ rāca yucutēoju jaju ecoana rācati busituyijarā Jesure.

Jesús ĩ usi jedire gaye

(Mr 15.33-41; Lc 23.44-49; Jn 19.28-30)

⁴⁵Ito yija ũmacañi riojo ñabobarocati rāit̄iacoayiju ĩja. Uđiaji cōrecō rāit̄ia ñayiju. ⁴⁶Ito yija ñamica tres ñaroca sēoro ado bajiro awasāyiju Jesús:

—Elí Elí, ¿lama sabactani? yiyiju Jesús. “Dios yu Jacu, ¿no yija yure jidicāti m̄?” yireoni ñayiju iti ĩ awasārise.

⁴⁷Coriarā itiju ñana ĩ awasāja t̄ocōri, ado bajiro yiyijarā ĩna:

—Diore goti ĩsiri masu Elías ñayorure jigū yiru ĩ, yiyijarā ĩna.

⁴⁸Sīgū ĩre aja tudigu ũmaquedi wacōri ide uđi āmirisena uyé ide jiare weoyiju. Yucuna sia wōcōri Jesús ya rise tu ñutubojayiju. Idibisiju Jesús.

⁴⁹Ito bajiro ĩ yibobarocati ado bajiro yiyijarā gājerā:

—Yibesa m̄ ito bajicōato. Elías ñayoru ĩre masogū ejaja tiana mani, yiyijarā ĩna.

⁵⁰M̄cana s̄sari oca sēoro awasācōri usi jediyiju Jesús. ⁵¹Itiju Dios ya wi yobiado saya webutiro ũmacūjuana ñigā ruji wadicōri jacaju ñigā ruji ejacoayiju. Ito yicōri sita ueyiju. Gūtagāri c̄ni wadicoayiju. ⁵²Masari cumari c̄ni janacoayiju. Ito bajicōri jājarā Diore t̄orūnrā tudi catiyijarā. ⁵³Ito bajiri masari cumaju ñana budiyijarā ĩna. Budicōri Jesús ĩ tudi catija bero Jerusalénju Dios ĩ mairi c̄toju wa ucuyijarā ĩna. Masa jājarā tiyijarā ĩnare, ĩna wa ucuja.

⁵⁴Jesús yucutēo ĩ yosaroca maji, surara ĩna Ɂju c̄ni code ñayijarā maji. Sita iti ueja, ito yicōri gaje iti rētaja ticōri, b̄to gūyijarā ĩna. Ito bajiri ado bajiro yiyijarā:



(San Mateo 27.51)

—Riti baja, Dios Macuti ñabojañi ãni, yiyijarã ñna.

⁵⁵Jãjarã romia cuni sõju ti rügöyijarã. Galilea sita Jesús i ñaroca maji ñre sayasuoyijarã ñna. Ito yicõri ñre ejabusotiyijarã. ⁵⁶Ñna wato ñayijo María Magdalena, ito yicõri María Santiago, José jaco. Zebedeo rĩa jaco cuni ñayijo.

Jesure ñna yujere gaye

(Mr 15.42-47; Lc 23.50-56; Jn 19.38-42)

⁵⁷Iti rãio wadiroca sigũ José wame cutigu Arimatea gagũ ejayijũ. Niyeru jaigũ ñayijũ i, ito yicõri Jesús rãca riasotigoru ñayijũ. ⁵⁸Jesure yujerocũ Pilatore senigũ wayijũ José. Pilato tũ i ejaja i seni ejaro bajiroti rotiyijũ i. ⁵⁹Ito i yija tuocõri, Jesús ya rujare rujiogu wayijũ i. ñre rujiocõri saya ñeri manona ñre gũmayijũ. ⁶⁰Ito yicõri masari cuma mamajũ gũta toti i menirajaujũ ñre cũyijũ. Ito yicõri masari cuma soje gũtagã jajocana biacũ, wacoayijũ. ⁶¹Ito bajiro i yiroca masari cuma riojo María Magdalena, ito yicõri gajeo María ruji codeyijarã ñna.

Jesús ya masari cuma ñna codere gaye

⁶²Gaje rumuti ñayijũ tujacãra rumũ. Iti rumuti paia ñjarã, fariseo gaye tuõiarã cuni Pilatore busirã wayijarã. ⁶³Ado bajiro ñre gotiyijarã ñna:

—Gua ñju tuoya: Jesús socari masũ i yicati gaye masi bujabũ gua. “Udia rumũ bero mũcana tũdi caticũja yũ”, yiqui i godaroto riojũ. ⁶⁴Ito bajiri i ya masari cuma soje tũ surara code roticõaña i rãca riasotigoana



(San Mateo 27.66)

ñami ĩ ya ruju rinime yirocu. ĩ ya rujure ĩna ãmija, “Godaru ñabojaguti mucana tũdi caticoami”, yirã yirãji ĩna. Ito bajiro ĩna yija cajero ruocato rêto busaro socarã yirãji ĩna, yiyijarã ĩna Pilatore.

⁶⁵ Ito ĩna yija tuocõri, ado bajiro yiyiju Pilato:

—Mũare cuni coderi masa ñacãma. Inareti tirũnu rotiba. Queno ĩna tirũnuja quena ñaro yiroja, yiyiju Pilato fariseo gaye tuoĩarãre.

⁶⁶ Ito ĩ yija tuocõri, Jesús ya masari cumare, coderi masare code roti cũyijarã ĩna. Ito yicõri, “Adi masari cumare jana yibesa mua”, yire gaye wame wõyijarã ĩna masari cumaju.

Jesús ĩ tũdi catire gaye

(Mr 16.1-8; Lc 24.1-12; Jn 20.1-10)

28 ¹Tujacãra rumu iti jediroca mucana moasuora rumu iti busu muja wadiroca María Magdalena ito yicõri gajeo María, Jesús ya masari cumaju tirã wayijarã ĩna. ²Ito ĩna waroca ñajasaroti sita ueyiju. Sigũ ángel ruji ejayiju. Ruji ejacõri masari cuma gũta ĩna biabojaragare janayiju ĩ, ito yicõri itiga joere rujiyiju. ³Bũjo ĩ borea yirisere bajiro yogu ñayiju ĩ, ito yicõri ĩ ya yutabuju cuni bũto botirise ñayiju. ⁴Īre ticõri guirã ĩna ya ruju ri nũruoyijarã coderi masa. Godacãna robo bajiro ñayijarã ĩna. ⁵Ito yija ángel ado bajiro yiyiju romiare:

—Gũibesa mua Jesús yucũteõju ĩna jaju sũarure ãmarã ya mua, yu tija.

⁶Mami ado. ĩ goticãdo bajiroti tũdi caticoañi. Īre cũgoraju tirã wadite mua.

⁷Coji wasa ĩ rãca riasotigoanare gotitẽna. “Ī gotiado bajiroti mucana tũdi caticoañi”, yiba. “Mani rioju busa Galileaju warocu ñayiju ĩ. Itoju ĩre tirã yirãji mani”, yĩ gotiba mua Jesús rãca riasotigoanare, ya yu mũare, yiyiju ángel.

⁸Ito ï yija t̃uocõri, masari cuma budicõri güi ùmaquedi wayijarã ïna. Güibojarãti b̃uto wañure rãca Jesús rãca riasotigoanare gotirã wayijarã romia. ⁹Ïna wabojaroca riti ïnare seniãa ejayijũ Jesús. “¿Nati mua?” ï yija t̃uocõri, b̃uto wañuyijarã ïna. Ito bajiri ïre r̃ucub̃uorã ï ya g̃ubo wana cuñiyijarã ïna. ¹⁰Ado bajiro yiyijũ ï ïnare:

—Güibesã mua. Yũ rãca riasoticãnare oca gotitẽña. “Galileajũ wajaro. Itoju ïre tirã yirãji mani”, yiba ïnare, yiyijũ Jesús romiare.

Ado bajiro bajiyija, yi surara ïna gotire gaye

¹¹Romia ïna wagoja bero masari cuma code ñana c̃utoju ejacõri paia ùjarãre gotiyijarã iti r̃etado bajiroti. ¹²Iti oca t̃uocõri judio masa b̃ucurã rãca busirã wayijarã paia ùjarã. Sigũre bajiro t̃uoĩacõri coderi masa r̃uori oca ïna gotitoni ïnare jairo niyeru ïsiyijarã ïna. ¹³Ado bajiro ïnare r̃uo rotiyijarã ïna:

—“Ñami gua canigoja bero Jesús rãca riasotigoana ï ya rujure ãmirã ejañi ïna”, yi goti batoba mua masa jeyarore, yiyijarã paia ùjarã ito yicõri judio masa b̃ucurã c̃uni. ¹⁴Mua r̃uo gotirise ùju ï t̃uo masija guamasiti muare busi queno ïsirã warã yirãji, yiyijarã ïna coderi masare.

¹⁵Iti niyeru boca ãmi t̃iocõri, ïnare ïna rotiro bajiroti r̃uo goti ucurã wayijarã ïna. Ito bajiri adi r̃um̃ari c̃uni, “T̃udi catigũ meje yiñi Jesús. Ï rãca riasotiri masa rinirã yiñi ïna”, yire gaye busiama judio masa adi r̃um̃ari c̃uni.

Ado bajiro yũ oca masare riasoba mua, yi Jesús ï rotire gaye

(Mr 16.14-18; Lc 24.36-49; Jn 20.19-23)

¹⁶Jesús t̃udi catire, romia ïna gotija t̃uocõri, Galileajũ wacu gua. “Ito g̃utagũ joeju bocatiba mua”, guare ï yiadoju wacu gua. ¹⁷Itoju ejacõri Jesure ticu gua. Ito bajiri ïre r̃ucub̃uorã wañucu gua. Coriarã, “Ï meje ñaguĩji”, yi t̃uoĩacã ïna. ¹⁸Ito yija ado bajiro guare yiquĩ Jesús:

—Ûmacũju adi tutijũ c̃uni yũ rotire gaye jeyaro jidicãmi yũ Jacu Dios yũre. ¹⁹Masa jeyarore oca goti ucurã, oca goti ucutẽña mua. Yũ ya oca t̃uorũñuroca yiba ïnare. Yũre ïna t̃uorũñuja ticõri, yũ Jacu wame, Esp̃iritu Santo wame, yũ wame rãca ïnare idẽ guba mua. ²⁰Jeyaro yũ rotirise ñarocõti ïna cuditoni ïnare riasoba. “Co r̃um̃ũ r̃uyabeto mani rãca ñasotigu yiguĩji Jesús. Adi macãruc̃uro iti jediroto riojuajũ mani rãca ñasotigu yiguĩji ï”, yi t̃uoĩama mua, yiquĩ Jesús guare. Itocõ ña.